


中華文史叢書之四十八  
清同治七年刊本影印  
王有立主編

# 戴槃四種紀略

(全)

清、戴槃撰

華文書局股份有限公司印行



國家軍興以來東南幾無完郡大亂旣次第平

朝廷憂憫元元數下詔書敕大吏慎選賢能牧守拊循瘡痍  
所以尉安牧養百姓德意至厚於是 澗鄰戴君以治行尤

異擢守嚴州逾二載又移守溫州我溫之被賊也視嚴日淺  
郡城及我瑞安幸以堅守得全然而四郊之外戎馬蹂躪閭  
閻虛耗重以一切言利之術徵求煩數而民愈困元氣至今  
未復也君以名孝廉宰浙久所至厯厯著聲績守嚴之政嘗  
讀所示宦游紀畧一書而得其詳矣今蒞溫甫一載正己以  
率屬勤事而愛民剔蠹興利百墜具舉一如其治嚴也而尤

惓惓於學校倉儲正人心厚風俗夫教養之具人心風俗之  
故古人言政未有能先之者而俗吏期會簿書日不暇給初  
無意於爲之也卽有意爲之矣非怠則僞乃君一措注間無  
不立起有效非以實心行實政何以及此某規畫方畧亦皆  
紀之以文用示後來蓋欲繼此者遵守勿失且益爲擴充而  
君之意始愜也是真大有造於我溫者矣昔兩漢之隆尤重  
郡守孝宣常稱庶民安其田里而無歎息愁恨之心者政平  
訟理也與我共此者其惟良二千石乎夫天下之大郡邑之  
積也郡邑治則天下無不治然則有郡邑之寄者使各張其

職如君又豈獨溫民之受其賜哉同治戊辰冬日治愚弟孫  
鏘鳴拜序





東甌記畧

潤州戴槃澗鄰氏著

議建同知守備衙門移駐楓林鎮記

禁止溫郡坐筵記

建造府盈餘倉並儲備倉穀記

義倉增積穀石記

重建大觀亭記

改造資福寺記

敕封楊府廟記

重設採訪局記

重修中山書院並增廣膏火記

重修育嬰堂並籌添經費記

增設義學並籌備經費記

增置義地並掩埋經費記

重修府署二此園記

重修溫郡武帝廟記

重修溫郡文昌祠記

重修溫郡城隍廟記

重修四賢祠並刊諸賢實錄記

重修雙忠祠記

改造昭忠祠門徑並設殉難紳民牌位記

重修存濟祠記

附刻

收復樂清縣城記

樂清辦理善後記

楊府君勘亂顯靈記



議建同知守備衙門移駐楓林鎮記

戴 榮

國家設立府縣治暨分防佐貳汛守各官本周禮陳殷置輔  
遺意蓋使民陶化善俗無自放於禮法之外其意至深且遠  
顧或謂深山叢箐中民情獷悍非有令長整齊約束風氣驟  
難變易此永嘉郭明府所以有設縣分治柟溪之議也柟溪  
屬永嘉東北鄉界縉雲仙居黃巖樂清山民頑梗恃其深邃  
遼遠抗糧拒捕習爲固然官以催徵緝捕爲畏途居民小有  
衅端往往糾衆持械互鬪釀成巨案乾隆年間曾移駐縣丞  
把總於楓林鎮鎮爲南溪適中地外有土堡周圍二里許布

置最爲得宜然位卑職小不足以資彈壓且官不到防日久  
竟成虛設改絃而更張之分縣之說誠不爲無見雖然有二  
難焉創始難籌欸尤難築城垣立學校設官屬置衙署建神  
祠工作並興所費甚鉅余再三籌度議移駐同知守備二員  
於楓林以資表率詢之地方紳耆僉曰可查同知在城職海  
防事本簡城守及中左右四營有守備四可移一營文武大  
小各員聲勢聯絡就近彈壓頑梗之習可變緝捕催徵定見  
日有起色此余區區經畫之苦心也所有籌議情形先已通  
稟大憲批准入

奏一面委員前往勘估建造衙署工料若干籌定經費錢數其餘差役兵丁仍照額存舊章無須添設較之分縣之議費用少而成功易一轉移間可收實效所損者少所益者大將見化强悍之風爲善良之俗無恃爲政教所不及而自外焉固百世之利也余與郡之賢士大夫樂觀其成者也故縷述其事之始末以告後之爲政者是爲記





禁止溫州坐筵記

戴 槃

溫俗新婚三日張樂設飲宴新婦於堂衆粲畢集東西兩行坐觀者如堵名曰坐筵見袁簡齋隨園詩集至有客酬酒婦報爵之說此文人之筆好爲夸誕豔稱之以爲美談其實未嘗有是也惟闌入不禁平視無嫌則信有之禮法之家豈宜若是今雖此風稍息尙不能盡除守土者爲之厲禁則可以止矣余守郡以來於教養興修諸大端悉心籌畫此事尙未及禁者誠以禮義修則廉恥生廉恥生則舊染革先其本也今年春郡之諸紳士咸請飭禁余曰可因示以罰並准鄰佑

指告而坐筵之風遂息信乎上行如風下應如草地方官果能隨時訓誡無不可易之風俗也夫東甌古稱小鄒魯乃末流頽放奢靡成習甚至相率效尤恬不知怪其於風俗人心大有關係前永嘉縣陳明府刊列婚喪禮節侈靡各條其中有暴殄天物顯干例禁者不一而足業已通詳大憲一律禁止而至今仍未盡遵行禮曰國奢則示之以儉余竊慕羔羊之義欲以節儉正直化導斯民崇實黜華旣躬行以率之矣今而後毋染舊俗毋犯刑章所謂倉廩實而知禮節衣食足而知榮辱父兄子弟轉相告誡使歸真反樸上追鄒魯之風

豈獨坐筵一節爲當痛除積習歟紳民其共勉之余實有厚望焉是爲記

[illegible]

創建府盈餘倉記

戴槃

浙省自兵燹以後各縣倉穀存者無幾余曾有各郡建一府倉存貯穀石之議前守嚴郡時稟請建倉儲穀辦有成案今蒞任溫郡知舊存永豐鹽義各倉俱廢查府署向有南米盈餘一欸特稟明大憲分成酌提存儲倉穀將六年應提之欸就永豐倉舊基建造倉廩二十二間名府盈餘倉因欸提南米盈餘故也趁此穀價平賤之時動用公欸先行採辦余捐穀五十餘石並前周太守發價買存官穀二千六百餘石一併登倉今已積穀萬石竊謂倉穀爲救荒善策府倉之設尤

所以酌盈劑虛屬縣中偶有偏災其本無倉穀者卽可就郡  
借支便於碾動以視招商買米動需時日者其難易緩急爲  
何如耶夫天下事可與樂成難與圖始余之建有此倉頗費  
經營自今以後年積一年有加無已雖有旱乾水溢民無菜  
色全賴乎此若能久而不廢則造福於民者無窮若夫推而  
遠之使各縣建一義倉或每鄉建一社倉有志者事竟成尤  
望於繼起者之爲之也是爲記

義倉增積穀石記

戴槃

儲穀以備荒仿古常平倉遺法此不涸之源也東甌素稱魚米之鄉未嘗仰給他郡故穀價常平然小有災歉居奇者昂其值不肯售貧民之無食者或攘臂而爭致啟衅端咸豐三年已事可鑒也此倉穀之備以救災實以弭患先務之急無踰於此郡城義倉在府學內咸豐六年教授金衍宗勸捐建造其廩房二十一間捐積穀石至同治六年僅存穀千餘石余於六月間來守斯土值米價翔貴全數糶賣以濟民食是秋歲大熟價平買穀還倉增加六百餘石又將各米舖按年



籌積經費添儲五百餘石委永嘉縣丞張卓人經理余乃倡捐穀五十石復勸各商民共捐穀二千餘石總計已積穀四千一百七十石照數收倉由此積少成多歲有所增雖至萬石無難焉夫社倉之法善矣然一貸一收有息有耗出納之際非經理得宜恐亦不能無弊設遇歉歲收不足數而所存之穀或有不敷散給之處故社倉祇可行於一鄉以濟官穀之不足可以就近分給至郡城積穀旣多原不必專爲救荒而設穀貴則可以平價穀賤則可以增額多多益善民受其利而不知是在官斯上者實心任事而已是爲記

重建大觀亭記

戴 槃

考名勝志永嘉華蓋山巔有吸江亭今改大觀亭又名江山  
一覽載稽郡志不言建自何時蓋闕如也顧亭爲康熙年間  
溫處道陳公永嘉令馬公効節之所登斯亭者英風正氣猶  
彷彿見之今已傾圯二十餘年矣余攝郡篆適董事陳承鏘  
等稟請建造乃捐廉十萬錢並諭令紳士李全英勸捐集貲  
鳩工興作如舊制仍名大觀亭客有從余遊者請曰江山勝  
概如在掌中洋洋乎大觀也亭之仍斯名也其以此歟余曰  
唯唯否否觀之意有大焉者矣觀畎澮之縱橫則思何以利

吾民觀間閭之鱗櫛則思何以樂吾民觀城池之鞏固則思  
何以保吾民觀山海之險要則思何以衛吾民登覽之頃能  
無觸目警心乎哉若夫感慨歎歎憑弔二公之忠烈則又與  
學士文人共焉者也余忝守斯郡豈僅以是爲名勝所係而  
重煩吾民歟於是繹大觀之意而詳言之是爲記

改造資福寺記

戴槃

華蓋山在甌城東偏爲九斗之口有容成太玉洞道書稱天下第十八洞天山之半爲資福寺始自西晉故俗稱此山曰資福人卜車伊始巡視四城登山瞻眺見寺中殿宇窄小房舍漸就傾圯山頂大觀亭遺址僅存山徑亦損壞不堪蓋由軍民斫木掘土牧馬放牛以致形勝之區盡委榛莽不獨無以壯觀瞻亦郡城元氣所關也於是亟議興修適重建大觀亭捐廉泉爲助諭令紳士李全英勸捐集貲乃分七十萬錢鳩工庀材拓其舊而新之榜曰洞天福地旁置山房八間左

八  
名左宜右名右有以資憑眺孤嶼峙其北大海環其東西南  
岷岡甌浦諸峯厯厯在目不啻收羅几案間遊人登亭必於  
是小憩焉實爲一郡名勝之冠今補栽松木並勒碑永禁私  
斫盜葬者有則必懲後之人隨時整頓經理得宜庶有以保  
郡城之元氣而二千餘年古蹟亦永垂不朽焉耳是爲記

敕封楊府廟記

戴 榮

異哉樂清縣城之復也咸豐甲寅十二月土匪瞿逆倡亂廣聚縣城勢張甚大兵未集士民俯首帖耳莫敢撓其鋒忽一日聞然而起齊心殺賊渠魁授首羣匪千七百餘人殲焉城遂以復僉曰此楊府君之助也嗚呼異矣洵非神力不至此時余以剿辦事抵樂聞人言厯厯如繪爲作勘亂顯靈記上其事於大府請於

朝乞加封號順輿情答靈貺也旣而部議飭查未覆至同治六年復請馬中丞題催始得

奏准

欽加福佑二字封典甫下余方攝郡篆恭迎

敕書告於神供奉訖考神之受封飭廟自宋始蓋其著靈海  
濫厯有年所故郡邑皆有廟

國朝自嘉慶以來海匪不靖均賴神力轉危爲安迭資保障  
神之爲靈昭昭也而樂人平賊之事爲尤奇內無主謀外無  
兵力羣賊坐堂皇方謀襲郡城而乃一呼四應義聲震天地  
突起奪賊刀直前刺之殪賊惶遽不知所爲或跪授刃束手  
就戮無敢抗拒者至婦人豎子咸能刃賊亂定後相顧愕眙

率不解其何故謂非天奪之魄而神助吾民耶先是郡中有通賊者約同日起事先一日破獲瑞安逆黨某其子忽作神語白其父謀逆狀事遂洩永瑞之民亦皆以爲楊府君所使則神之禦災捍患有不可思議者膺封號崇祀典宜哉夫不煩兵力羣起而攻之蠢茲醜類一鼓盪平使溫台兩郡無攻剿饋餉之苦非獨神之大有造於樂實大有造於浙東也聖天子以神道設教其卽此意也夫是爲記



--	--	--	--	--	--	--	--	--	--

T

T

重設採訪局記

戴 槃

溫郡自康熙年間耿逆肆擾而後休養生息涵煦我

國家深仁厚澤浹髓淪肌蓋不見兵革幾二百年矣咸豐辛

酉平陽會寇倡亂永瑞平三縣紳民殉難不少同治紀元髮

逆竄入樂城永瑞二縣鄉間均被滋擾計先後一載有餘殉

難者更不乏人雖屢經設局採訪遺漏尙多余乃捐廉二十

萬錢委永嘉教諭王樹榮開局舉辦並諭令司事孫自勵等

分赴各縣會同原辦司事悉心採訪查得永嘉縣殉難紳民

婦女一百三十七人又續報一百六人瑞安得一百八十七

人樂清得七十三人計五百有奇通詳大憲照例請卹嗟乎  
浙省自遭亂以來七十六州縣淪陷殆盡存者僅衢之西安  
處之慶元龍泉溫之永嘉瑞安平陽秦順玉環暨甯之定海  
七縣兩廳耳而溫居其五他郡率被擾數年獨溫之蹂躪日  
淺實由士民倡率團練人自爲戰所在舉義旗剿賊故賊不  
得深入瑞安以南閩疆遂安然而其中或以戰死或不屈死  
先後採訪呈報者已不下千數百人其他郡之死於亂亡者  
浙東西不可以數計矣可勝痛哉省城採訪局至今未撤余  
之重設是局亦誠恐忠義節烈或泯沒而不傳此有司者之

過也是爲記

--	--	--	--	--	--	--	--	--	--

重修溫郡中山書院並增廣膏火記

戴槃

東甌之有書院蓋自宋儒王儒志先生於伊洛未作之先講學東山倡明理學後人因創爲東山書院由來舊矣

國朝乾隆二十五年郡守李君琬旣興復之乃更闢地於中山之陽名中山書院講會有堂肄業有舍層樓傑閣規制崇闓與諸生藏修息遊於其間所以上溯伊洛之淵源將於是乎在雖然東嘉之學至宋而極盛遊程朱張子之門者三十餘人登進士及賢良方正宏詞孝廉諸科數百人其時固未有書院也而克自振拔如此今旣有其地矣往往狃於記誦

詞章之末經史典籍度置高閣以爲無用空疎剽竊苟焉弋取浮名而已古人所謂通經致用者安在無怪自有明以後繼起者難其人也余下車之始首以培養人材爲急查書院房屋歲久失修考試桌櫬及一切物用損壞過半乃亟捐廉十萬錢另籌欸三十餘萬錢重完治之置器具几案洪纖畢備使肄業住院者有托焉遂乃詳請大府於捐局串餘項下每年提錢五百千以爲增廣膏火之用分別加給鼓舞而作興之迄今一載有餘負笈來者日益衆課藝亦彬彬可觀蓋坊間向有余書經集句文賦稿余亦間有持贈受而讀之者

咸知本經籍發爲文章良非虛語而醇茂淵懿之作出空疎  
剽竊之風稍息由是進而求之儲

國家經濟之用紹先哲理學之傳處爲醇儒出爲名臣安見  
元豐九先生醇熙六君子之學問勲業不接踵起也諸生其  
勉之哉是爲記





重修溫郡育嬰堂並籌添經費記

戴槃

育嬰堂之設所以補救天地之所不能生與夫父母雖能生之而仍不能生之憾者也嬰兒之生力不能匍匐以就口食又不能呼天呼父母一日不乳哺則立斃矣而天地父母於是乎窮所賴爲民父母者使他人之母母之以全嬰兒之生卽以弭天地父母之憾此三代以上不獨子其子之義也甌郡育嬰堂創自乾隆初郡守金君洪銓李君琬繼之有堂有舍有田租有息銀至詳且備百餘年來悉仍其舊自嘉慶末年內有房屋倒坍日久未建門堂亦俱損壞查舊存發典生

息銀兩並塗田二十餘頃每年僅供本堂之用並無贏餘以爲修造房屋及圖匱續乏之備遂相率因循以至於今余蒞任之始通盤籌畫廼捐廉十萬錢並籌欸四十萬錢廢者修之墜者舉之另勸各舖戶書定願捐積少成多以期歷久常行每年可得錢八百餘千又於捐局內提錢二百千撥入嬰堂遂飭各縣之無嬰堂者送至郡城一律留養舊立規條稍加整頓余前蒞桐邑時增置田畝計歲入之費可多收養幼孩數十人及守嚴郡適當兵燹後修造堂宇整舊添新俾孤苦兒女有庇蔭餽粥之所今於溫郡猶前志也喜其成規具

在擴而充之經費充則收養多收養多則遺棄少庶幾吾溫  
之遺孩罔不生生用以衍大生廣生之義此郡牧之責也尤  
余之所望於後來者也是爲記



增設義學並籌添經費記

戴 槃

義學卽義塾也建房舍峙錢米延師儒以待貧乏者之子弟就學焉所以輔黨庠州序之不足也故或一鄉有之或一邑有之或一郡有之然必歲有常入有餘蓄而後可否則匱匱則不可以久名存而實廢此溫郡各邑義學久而寢廢者多也惟府義學公所在道署前郡志所不載其延師修脯則於掩埋經費項下支銷由來已久余查掩埋一欸本屬不敷又移而用之義學此名實乖舛之尤甚者斷斷不可余乃籌定銀六十兩每年由府署給發作爲義學經費定之以從學名

數別之以束修多寡或損或益隨時可稽昭覈實也余於蒞任之初先已興修房屋置備桌椅壞者葺毀者完皆捐廉泉以治之蓋旣名爲府義學則由府經理亦惟循名責實焉耳此外有衛義學一所今勸廳縣又各設義學一所均自捐廉舉辦義學之增設豈不大有裨於實政哉余復出錢三萬刊印座右銘三字經陰騭文四言詩以便童蒙誦習由是絃誦之聲達於四境因城及鄉廣設義塾此尤余之所深望而未竟其志者也是爲記

增置義地並掩埋經費記

戴 槃

掩埋之政仁術也周禮秋官蜡氏有埋而置楬之文月令有掩骼埋醢之事後世漏澤園之設所在多有凡以心古昔聖王之心不使長逝者之魂魄私恨無窮也溫郡舊置義塚山地不一叢葬已滿乾隆二十五年李太守籌廣經費存典錢現止一千一百串計得息錢一百數十千文移作義學之用所餘無幾余乃另行籌款歸入義學再籌添存典生息錢六百千並以前存款息錢全作掩埋經費計逐年可得息錢二百二十餘千又於永嘉縣稅契項下每年提錢一百十千再



加租穀錢二十餘千每年可掩埋大小棺骸一千餘具查歷  
來土工葬棺一具不論大小概給一百六十錢今酌定大棺  
一具倍給餘悉如舊另購山地一區坐落永嘉縣之十九都  
翁浦洋地方由上至下計三百三十弓由東至西計二百五  
十弓動用公款錢一百七十餘千又修整停厰用錢五十餘  
千是在後來者詳加稽察無負余與前人創建續籌之苦心  
庶使殄戾全消和氣翔洽仁之至亦義之盡也願無忘澤及  
枯骨之心也是爲記

重修府署二此園記

戴 榮

二此園何爲而作也引流疊石開軒築臺自南豐劉君始有前此者乎曰有之矣樹城李君因桂亭墨池之舊而拓之而新之未嘗以園名自劉君取賢者而後樂此不賢者雖有此不樂之意始以二此名園顧嘗考李君之記在乾隆壬午癸未間劉君則在道光乙未前後七十年當

國家全盛時民和年豐官斯土者與斯民同樂出其餘力以治燕遊之所宜也劉君以來至今三十餘年耳其間東南多故籌餉練兵官斯土者汲汲救過之不暇奚暇樂而二此園

遂蕪穢不治亦宜也然則樂不樂又不盡繫乎賢不賢蓋有時會盛衰之感焉余來守溫郡幸逢

今上御極之六載東南底定余不敏懼不克稱職於是修舉廢墜於教養諸大端次第舉辦日昃不遑冀與斯民同登衽席顧敢自樂其樂耶雖然歐蘇二公之治郡也闢地爲亭曰豐樂築土爲臺曰超然意必有所以樂乎此者今則除剪荆榛葺治廊舍不引流而泉不疊石而山可以臨深可以眺遠乃於隙地內移竹兩行建亭一座榜曰修篁亭公餘之暇偕賓朋僚佐憩息其間雖不敢與歐蘇媲美亦庶幾不忘與民

偕樂之思歟此則余之幸也是爲記

[illegible]

二此園入景詩 并序

園內舊有入景可以棲止者則閱音山館碧淨玲瓏舫味無  
味齋筆峯亭品雪菴餘則九折廊轉玉洞及墨池余同治六  
年冬進署周視園中滿目荒蕪荆榛一片頽垣破屋舊景全  
非惟九折廊轉玉洞墨池遺址尙存乃重加修葺並建亭移  
石種竹栽花改名入景因賦詩以記之

金粟舫

船房外有老桂一株今又添種新桂數株故名

層軒面水屋如舟叢桂留人八月秋愛向天香深處坐此身  
疑入廣寒遊

修篁亭

新於隙地建亭一所左右移竹兩行故名

曲欄干外小池東移植琅玕竹兩叢巧構新亭宜夏日涼生  
左右一林風

冷香閣

閣下新種梅花數株故名

小窗常爲看山開閣下梅花手自栽待得天寒風雪裏坐中  
時有暗香來

綠天居

窗前舊種芭蕉成陰故名

碧雲低處映窗寮繞屋清陰舊種蕉一色蔚藍渾不異秋聲  
還聽雨瀟瀟

清芬室

花臺內新種蘭花故名

春來一室自芬芳靜對幽蘭臭味長惟有心清能入妙此間  
小住得聞香

迴環廊

舊名九折廊因此廊並無九折故改名

迴廊幾曲路彎環步履尋幽興自閒最好引人能入勝牆頭  
數點見青山

轉石洞

舊名轉玉洞因此洞疊石而成故改名

疊石玲瓏勢轉斜敢誇名勝似飛霞嵌空都借他山助一線  
天開景亦佳



古墨池

舊名墨池現池邊栽有垂楊故改名

古來舊蹟墨痕遺太守風流恍見之不學揮毫學種柳而今  
池畔碧於絲

二此園楹聯

集句

春秋多佳日

園林無俗情

不可居無竹

同是宦遊人

每聞佳士輒心許

小築幽棲與拙宜  
凝華結藻久延立  
種花移石自殷勤  
幾多怪石全勝畫  
欲遺吟人對好山  
悠悠花香疏雨相過  
蕭蕭落葉清風與歸

--	--	--	--	--	--	--	--	--

1071

重修溫郡武帝廟記

戴 槃

甌郡武廟在譙樓東道光十九年不戒於火郡人捐貲重建規模宏敞而黝堊丹漆之事未竟近年來爲練勇屯聚頽壞失修余蒞任後朔望行香顧瞻神宇深懼廟貌弗嚴堂廡弗葺不足以肅將祀事乃捐廉十萬錢另籌款三十餘萬錢於同治七年三月興工閏四月工竣由是殿宇肅然棖桷秩然輪奐丹雘亦復巍然煥然竊思帝之赫聲濯靈宜無乎不在我

朝天戈所指往往顯靈助順是以崇奉典禮視歷代加隆追

封三代公爵每歲春秋致祭皆祀以太牢近又增設侑舞與先師廟儀節同嗚呼可謂盛矣夫祀爲入政之一與食貨並重養民事神本無二理今增新廟貌所以尊

國典而妥神靈也後之人其亦與余有同志也夫是爲記

重修溫郡文昌祠記

戴槃

文昌本戴匡六星卽周禮司中司命唐時有文昌宮歷代相沿祀於學校主科名之事至

本朝崇奉極隆自京師以下至郡邑皆有祠春秋二仲致祭享以太牢典至鉅也永嘉縣學之西有文昌祠爲祭祀及朔望行香之所年久失修廊廡牆垣半就彫剝余蒞任後躬拜祠下竊見棟宇摧殘不足以昭誠敬若不興修有司之職曠矣遂捐廉十萬錢另籌款二十餘萬錢重加整理闕者補之舊者新之閱兩月告竣區區修舉廢墜之意所以重科名之

報而申敬神如在之誠竊願與後之守此土者共勉此意焉  
是爲記

重修溫郡城隍廟記

戴 槃

郡邑之有城隍猶之乎府縣也均有守土之責是以操興養立教之權以奠安蒼赤責在府縣司福善禍淫之柄以翊贊幽明責在城隍其有水旱不時災祲洊至則官與民咸請命焉爲闔邑生靈所倚賴於是民和而神降之福否則禍亦隨之則惟明乎事神之道而後能治民彰彰明矣東甌郡城隍廟在府治西創造之始志無考咸豐三年正殿燬於火郡人集貲重建規模宏敞迄今久未修葺前任周太守諭令紳董勸辦需費浩繁卒不果余蒞斯土核實估計土木丹漆工料



其需若干首捐廉十萬錢又籌款二十萬錢並勸各邑令共  
集捐錢三十五萬錢剋日興工正殿寢宮次第修整其中舊  
有園亭之勝靡不一律完固三閱月而告成夫神之所棲不  
壯不麗不足以示威靈郡自削平寇盜雨暘時若年穀屢登  
疵癘不作是誰之賜歟而官斯土者顧於事神之道第曰奉  
行故事已耳則其於治民之事亦惟因陋就簡已耳幽明殊  
途理無二致守土之謂何其有愧於神也多矣余之爲此役  
也不敢謂質諸明神而無愧亦以盡守土之責云爾是爲記

重修四賢祠記

戴 槃

溫郡四賢祠舊在鹿城書院中祀程明道伊川朱晦庵張南軒四先生以鄉賢周行已許景衡等三十三人配皆從遊四先生之門親見伊洛淵源者也當是時嚴黨禁斥僞學者蠶起而此邦先哲篤信好學不遠數千里師事四先生卒爲名儒俎豆千秋可謂盛矣顧祠創於前明郡守鄧君重建者爲郡守衛君後經兵燹僅存數椽

國朝乾隆二十年督學雷公復建而加擴焉未幾爲營兵蔣姓所佔冒蔣叔蒙後裔侵蝕祀田今且祠圯祀廢木主朽蠹

都人士至不能舉其姓氏何以使後學者聞風而興起歟余於同治丁卯攝郡篆深懼無以紹前人創建之意乃籌款興修新粟主定春秋致祭押令蔣姓遷移祀田已賣者捐廉續之祠內留存者按畝而清理之所收租息爲修祠宇祭祀之用並刊附祀諸賢實行錄以備省覽易鹿城書院舊額爲四賢祠紀實也夫諸君子宗仰四賢如泰山喬木流風餘韻六百餘年矣卽斯祠之建旋廢旋復出之榛莽荒穢之中者亦屢矣今又煥然一新世道人心絕續之所繫豈偶然哉抑余之爲是舉也將使郡之士瞻仰遺型進求夫諸賢之講學論

道與夫事業文章更世千百而不朽者度非膠庠其姓氏卽  
可詡詡然曰吾四賢之徒也韓子曰莫爲之前雖美弗彰莫  
爲之後雖盛弗傳永嘉之縣豈必遂無傳人哉此固守斯土  
者之所厚望也是爲記

[illegible]

重修雙忠祠記

戴槃

雙忠祠在郡城華蓋山上祀溫處道陳公丹赤永嘉令馬公  
瑒康熙十三年耿逆自閩窺伺溫郡二公集文武登此山議  
戰守策總兵祖宏勛從逆二公同時被害三十五年浙江巡  
撫線公題請

敕賜建祠崇祀

御書雙忠祠額忠魂義魄千古爲昭矣嗣後馬氏後裔捐田  
百數十畝作修祠祭祀之用爲營兵侵蝕祠宇剝落不加修  
葺余到任後捐廉五萬錢葺而新之並將原置田畝逐一清

理將每年所得租息錢百數十千歸祠應用慨自耿逆之變  
至今垂二百年二公殉節事父老猶能言之泊辛酉壬戌間  
疊遭會匪粵逆肆擾而合郡士民同仇敵愾能戰能守深明  
大義卒保城池安知非二公之靈爽有以默相之者歟守此  
土者上以體

朝廷表忠之意下以作吾民向義之風俾斯祠田產租息永  
永不廢其所係顧不重哉是爲記

改造昭忠祠門徑並殉難紳民設位記 戴 槃

郡城之南建有昭忠祠左祀忠義右祀節孝前周太守委員修理規模雖小祠宇尙新惟大門在田野間春秋祭祀官員齊集出入不便遇雨則行泥淖中非所以將誠敬也余提祠內公欵五萬餘錢另闢大門薙豐草甃石路如砥如矢趨踰之儀肅焉又捐廉俸二萬餘錢將永嘉縣殉難紳民婦女之奉准入祠者五百餘人製造木主送祠祭祀祠內向有田十四畝所得田租亦查明歸祠應用夫忠義節孝足以維風教而正人心載之志乘錫之祀典英風勁節與九斗相高矣邦



三  
之人士列拜祠下其必有曠世而相感者則余之爲此舉亦  
未始非政教之所繫也是爲記

重修存濟祠記

戴槃

祠名存濟何存無祀及有子孫而不能奉祀之主於祠中志厚也夫無祀則主無所歸子孫不能奉祀至無片瓦尺椽之庇主亦無所歸勢必委棄榛莽甚或供薪爨之用慘矣哉傳曰鬼猶求食食既不可得矣至不能保其數寸之主於身後將謂其人已死其鬼不靈耶固仁人君子所宜心惻也祠在華蓋山雙忠祠後向止棟宇三間不知所自始迄今歲月寢久木主香爐無可位置舊存之主亦大半朽壞余憫之諭董事查明登簿以備稽考祠之左右添創房屋六間請於方觀

察發軍工廠木料百株余首捐五萬餘錢又籌款五萬餘錢  
爲工用之需旣蒞事慨然曰今而後苟能使閭閻樂利無饑  
無寒彼爲子孫者不致如葛伯之不祀幸也卽不然與無祀  
之主共存斯祠位置有所未始非仁術之一端也余喜其風  
之厚尤願郡之人常體此意永永勿替也可是爲記

附刻溫郡各楹聯

關帝廟

乃聖乃神乃武乃文至于海濱德威惟畏

自西自東自南自北方行天下祀事孔明

文昌祠

寶氣煥層霄耀天上星輝光聯北斗

文章行大塊主人間風教化及東甌

府城隍廟

作善降祥作惡降殃正直爲神莫道竟無前世劫

曰哲時暘曰肅時雨燠寒成歲惟期長此屢年豐

楊府廟

出守到東甌幸十二年中重瞻廟貌

頒恩來北闕正九重詔下甫答神庥

四賢祠

學重心傳千百載同明聖道

世留手澤卅三人不愧儒宗

文信國祠

孱王幸一息尙存涉險履危能脫身於京口

正氣與兩間常在成仁取義留遺像於江心

雙忠祠

爲國捐軀公沒神靈常在

登亭弔古我來祠宇重新

資福寺山門口

此山勝桐嶺松臺翠微青嶂

斯地有石潭牛塢丹井蒙泉

資福寺山房

天開斜景徧

山遠與人齊

舉頭望明月

盪胸生層雲

大觀亭

大觀在上

小住爲佳

孟樓

憶故鄉兩點金焦同斯佳境

到此地一樓風月助我清談

府大堂

因人成事因地制宜墜舉廢修惟在實心實政  
以儉養廉以勤補拙上行下效要期有守有爲

府二堂

居一日官盡一日心無怠無荒當思於物有濟  
治百姓難愛百姓易同好同惡惟在強恕而行

中山書院

地傍中山築室於茲惟講學  
居同廣廈寒儒到此亦歡顏



育嬰堂

保息重周官曰仁曰慈問何以心推赤子  
併幪同夏屋是究是度要無慚身坐黃堂

收復樂清縣城記

戴槃

甲寅冬十二月樂清瞿振海等謀爲亂倉猝變起縣城不守姚署副將暨趙典史均遇害逆黨四出賊焰甚張省中警報叠至大吏爲之震驚適余委署湯溪縣事尙未起程赴任其時撫軍檄發大兵令溫州葉總鎮帶兵千名處州毛總鎮帶兵千名台州吳總鎮帶兵千名委余亦帶兵勇千名會同攻勦並兼辦各路支應余曰任大責重宜檄委司道大員一人前往勦辦撫軍曰藩司無出省之例臬司有留防之事運司催徵鹽課糧道辦理海運均關緊要汝卽日起程無稍諉卸

遂改授台州司馬之職余應命邁行是役也催督兵勇兼程  
並進中途得賊勢猖獗信將謀襲郡城余憤且懼余聞溫郡  
地方濱大海臨高山樂清界乎溫台之間山海爲之阻隔將  
欲進兵攻勦人力又恐難施正在籌策之際我兵已抵溫郡  
翌日樂城卽報收復夫樂城何爲而復也樂之士民同聲倡  
義自已及午渠魁授首賊匪殲斃者千七百餘人城遂以復  
在婦人豎子咸能手刃斃賊厥功尤奇檢點我民無一傷亡  
此其中有神助焉余厯觀史冊所載古之善用兵者興師滅  
寇靡不藉資兵力今乃未煩一兵未戰一士卒能殲除醜類

立奏膚功樂之人既無首倡又無軍器若使賊軍抗拒無以制勝乃天奪其魄一鼓盪平人力不至於此余以從事樂清得晉升階是爲記



樂清辦理善後記

戴 槃

余抵溫郡之翌日樂城收復將所帶兵勇截留郡城首赴樂清安撫居民並查點屍骸令署樂清縣李君掩埋事畢適運司慶公由省赴台州查辦金溪土匪滋事撫軍委赴樂清同余辦理善後事宜余自到樂後招集流亡撫恤難民其餘練勇設防賞功問罪靡不次第舉行而於查拏逆黨一事搜捕尤急未及兩月先後拏獲要犯僧靖毛等二十餘名首逆瞿振海等家屬二十餘名又謀襲郡城未行在外創刼之犯王得宗等十餘名在監逃逸應行斬絞之犯徐時鑑等十五名

晝夜承審通詳各大吏或解省定擬或留禁候示以外所拏脅從之民不可勝數余概行訊釋絕不株連全活甚衆余查瞿逆之據縣城也私雕印信分設僞官鄉城之民被脅者不可以數計倘欲盡法懲治則誅之不勝誅且恐急則生變是以運司有欲辦之案余屢爲之力爭乃止時有犯人徐錫禮者供在官書役被脅者十餘人運司派員查拏書役聞之聲言樂清被脅民人盡欲拏辦煽惑大衆滿城人心皇皇幾至釀成事變余乃卽日傳各書到案訊明爲之開釋而人心大定余豈好爲其寬而不爲其嚴哉亦猶是古人所云殲厥渠

魁脅從罔治之意也虹橋爲瞿逆起事地方瞿逆伏誅省中官兵旣至不得明示以威逆司行抵虹橋余首請拆毀瞿逆宗祠次及倪陸兩姓以示孫子之謀逆者祖宗不能有其祠用昭炯戒居民悉令安堵無恐而民心攝服後有樂清縣役因赴虹橋拏案妄言此地居民有劫奪要犯一事其言達於上派都司宋某會同樂清營縣往拏某等未敢前去乃同稱虹橋地民有抗拒之勢其時余同運司已移駐溫郡令余選調兵勇前往勦辦余謂此事無煩兵力乃隻身帶隨役數人親至其地曉諭居民所要之人立時送出訊明情節乃知



前言之誣其事遂息而大獄不復再興是役也自甲寅冬十二  
二乃至乙卯四月夏旋省乃得竣事是爲記

楊府真君勘亂顯靈記

戴 榮

古之神人有功德於民廟食百世載之志書班班可考後人  
道其姓氏里居靡不詳悉溫郡各屬有楊府君廟鄉之人迎  
神賽會咸致敬焉咸豐甲寅十二月樂清瞿振海等聚衆作  
亂縣城不守逆黨羽翼甚多勢難撲滅乃未幾而樂之士民  
齊心殺賊登時四處響應外則奪門而入內則羣起而攻雖  
婦女幼童無不持刀相助頃刻屍橫遍地樂城遂復萬姓咸  
曰此楊府神之力也當賊之初起謀時溫州永嘉等縣意欲  
同時襲取郡城之爲內應者先一日破獲故未及舉發瑞安

逆黨某某其幼子忽若有神附身如顛狂狀自言其父謀逆先期亦卽道破機關已露未敢肆行此二縣者百姓咸以爲楊府神所助而樂人殺賊之事尤彰明較著余收復樂清後聞士民言感且惕乃詣真君廟齋肅報謝因求神之時代事蹟無可考者迨至郡城謁神廟於瞿嶼山之陰得舊碑一字漫漶難辨命工洗剔之始可讀乃知神蓋宋時人也初得道於桃山歿而靈感迭著遂受封敕廟明嘉靖間浙東按察副使袁公以禦倭出洋忽大風起壞倭船送公舟抵岸無恙歸神示之夢次日詣廟行香乃恍然於夜間所見之神卽此神

也遂立碑於楊府山之廟以紀其事云余以神之能爲民禦  
災捍患請於大府奏加封號用崇祀典余感神之德誦神之  
功願神之護國佑民永永無極甌之人終不忘夫神貺也是  
爲記

--	--	--	--	--	--	--	--	--	--

ノ

京口爲江南名郡金焦北固諸山雄傑特起長江如襟帶出肘腋間磅礴鬱積發爲偉人自古然矣

國朝自京江相國以來名臣輩出戴氏爲潤州望族內而卿士外而封疆代有傳人 潤鄰觀察生長是邦邃於經術著集經文賦稿卓然成一家言及奉銓來浙所在以實心行實政始終如一名公卿咸推爲經術飾吏治方之兩漢循吏云方公之總理清賦局也力主分成量減及裁津貼之說讀減漕諸記詳審精密抒下情宣

上德藹然仁者之言先是我嘉善畝田空糧民困百數十年

公請奏裁大府允行仰邀

朝廷未有之曠典飲水知源宜何如感也

咸彌

自咸豐甲寅

秋司瑞安鐸是冬樂清土匪滋事縣城不守公以剿辦來甌  
事既定招流亡恤難民訊釋脅從全活甚衆固已聞之熟矣  
逾年宰桐邑軍書旁午收漕勘災於萬難措手中出以獨斷  
民情貼服鄰境咸取法焉稱我鄉賢父母最彌又得聞之同  
治乙丑守嚴州兵燹後瘡痍滿目公乃墾荒儲穀興學校建  
祠署未一年百廢具舉嚴郡舊有九姓漁課由明至今五百  
餘年遂力請於大府咨部裁革並令各漁戶改賤爲良而積

習爲之一變

彌

嘗讀宦游記畧得聞其詳然猶未及親見公

之爲政也及丁卯夏來蒞溫郡日高春視事夕奏功皇皇若  
不及如故也於是修祠廟建山亭重整中東書院增廣膏火  
創造府盈餘倉儲備穀石以及嬰堂義學義塚各善舉經費  
靡不籌添所以爲教養計者罔弗周永嘉之枏溪民情頑梗  
則議移駐同知守備於楓林俾官民相親潛移而默化之申  
請大憲見諸施行坐筵爲溫郡陋習又能革而禁之凡此實  
心實政如雨露不擇物而施如泉源不擇地而湧公嘗謂做  
一日官行一日事今實親見之而後歎公真不可及矣

彌忝



附癸卯同年幸又爲所屬得見公治溫善政旣出所撰東甌  
記畧見示言皆徵實以今準昔猶一日也所謂德被生民功  
施社稷經術之效孰大於此他日建牙開府爲一代偉人爲  
兩浙名臣是編特嘗鼎之一臠也敢述所聞見者質言之而  
綴於簡末同治七年歲次戊辰冬十月嘉善戴咸弼謹跋

留別東甌士民

七律四首

戴槃

澗鄰

來往均逢夏午時匆匆忽又代瓜期敢云霖雨千家徧但有  
清風兩袖隨駟馬高車非我志一絲半粟亦民脂慚無實惠  
施黎庶萬口空鐫德政碑

十年往事記前游卯歲重來序已週

咸豐乙卯因樂清土匪滋事奉差來溫至同治

四年再到溫郡歲已一週

自昔神功多福佑

余前收復樂清請加楊府君封號至余權篆溫郡已十

二年始蒙

奏准

頻年樂土慶豐收工成廉俸清分鶴

余修文

敕封福佑

武廟郡廟及四賢祠雙忠祠存濟祠書院嬰堂義學皆捐廉首倡以成其事

政在辛勤拙補鳩縱

目江山憑一覽

余建大觀亭落成以資憑眺

敢希王謝舊風

流

敷政端憑教養先廢修墜舉亦求全視如已事皆民事賴有  
前賢啟後賢學紹程朱期克繼名稱鄒魯幸猶傳從茲薄俗  
澆風革不獨奢靡罷坐筵

舊時五馬記行春再到嚴陵證夙因  
詔下九天君

命重轅攀萬姓衆情眞海山俯仰成陳迹琴鶴追隨自在身  
此去東甌重話別願留鴻爪慰斯民

東甌闔郡紳士公啟

懿夫推誠布治神君頌以三年

特簡眞除慈母離於一日憶自我

澗鄰觀察憲戴大公祖大人之權守甌也心期報

國政在養民循良第一龔渤海斂手後賢治行無雙黃潁川  
比肩往古固已二千石之知名魚懸虎渡十萬戶之受福鹿  
夾雉馴矣 公簪纓華胄鉞鏤名門讀書舉制科作宦典劇  
郡冠大江南北之通儒徧兩浙東西而游宦世欽石氏門庭  
增光史乘民愛馮君兄弟迭起謳歌美政紛綸請陳梗概添

膏油而興講院加意儒林廣儲積而葺社倉殫心歉歲溥仁  
人利預籌鄉會川資歡寒士顏會見科名蔚起諸凡義塾聿  
新造小子也壇祠衆建肅民心也恩周鞠育恤藐孤也惠普  
掩埋澤枯骨也構臺榭則山川倍勝禁追呼則撫字逾恆日  
坐堂皇寅清益勵刻求民隱辛瘁忘疲悉畏威而懷德遠邇  
臚歡統隆舉而廢興經猷丕煥茲當萬物含和之日適值三  
年報最之秋恭膺

簡命移守睦州此地緣慳他鄉福厚及瓜而代行李將離吾  
儕久隸仁帡同遊惠宇挽留乏計報稱有忱爰製德博化光

四字額以誌不誼增拔薤蔭棠之思長偕謝客亭留成郇膏  
傳雨之區輸與嚴陵山峙他日建牙開府還期騶從重臨此  
時臥轍攀轅可乏驪歌相送所冀方聞碩彥弇雅通材其有  
戴天至悃各成擲地佳篇况切梓桑涵濡已久皆叨蔽芾揚  
扨何難舉駢詞與韻語都密咏而恬吟不定體裁聊當去思  
之頌先爲墮引彙成餞別之篇賢大夫非阿私所好請攷  
公厯官行已之循聲都人士定喜騁其才請示我頌德歌功  
之鉅製謹啟



東甌留別和章

上卷

同寅親友和章均用原韻

秦湘業

澹如

龔黃治行冠清時王謝風流遠可期  
好水好山頻管領一琴一鶴自追隨  
颶薰麥隴車初下雨潤桑田輦載脂  
五邑謳歌胥感戴請看道左去思碑

甌江兩度紀來游撫字心勞惠澤週  
新綠田多催夏種陳紅倉滿備秋收  
神功孚應災驅鱷吏治均平化協鳩  
後樂何如同樂好開園不獨集名流



輸君五馬著鞭先經濟文章事事全儘有江山供一覽可無

觴詠繼前賢題詩孤嶼愁難和留像各藍合並傳

江心寺有文信國及

先侍郎石刻像

君

父老攀衣渾欲泣也如當日北亭筵

嘗拓以見寄

仁風到處播陽春雁宕龍湫話宿因士願識韓名望重人思

借寇性情真頌聲此日聽盈耳著作先時早等身去去嚴陵

迎竹馬棠陰重慰舊黎民

王蔭棠

芾南

昔年攝篆憶同時

丁卯五月間事

瓜代慙余早及期牛後從來讓雞

口蕭規猶幸得曹隨

余未攝金衢嚴道時君已先署嚴州

能剛早已知無欲

不潤何須論處脂

溫州嚴州自他人視之有肥瘠之殊君正己率屬視之無異也

競爽二

難賢太守

哲兄友梅時守廣州

東南棠棣合成碑

十載慇懃記宦游

君所著宦游記畧不脛而走

東西浙水惠全週詩刪漆

洧漁蠲課

君裁九姓漁課去百年積弊

賦減租庸歲有收

杭嘉湖減漕事君董其役

風化從茲除佩犢閭閻不更歎無鳩烏龍山訪希文蹟始信

### 先生第一流

雅亮清公比孝先牛刀小試目無全冰心自矢懷前哲俗骨

難醫陋世賢經術專家誰得似

君精熟尚書

循良有譜定須傳懷

君不盡離羣感寂寞年時北海筵

自君典郡文譙頗形寂寞

梨棗知名二十春

君所著書經集句  
文賦幾於家置一編得諧宦轍亦前因締

交金石逢 君少閱世蹉跎愧我真矯矯青雲看偉望堂堂

白日負閒身小詩偶作巴人和痴嗜休輕付手民

薛時雨

慰農

春湖五馬送 君時又見公堂受代期舊郡篠驂迎郭伋征

途芋帛送何隨殘黎亂後安耕鑿新婦筵前洗黛脂

君革  
溫州坐

筵陋  
習

往日風流推謝客磨厓重勒使君碑

鴛鴦湖上舊同游星紀推遷又一週報最有書僚案式

自縣君

令躋郡守所至政  
蹟均刊刻成書

採風入告史官收摩天翮健追黃鵠控地

形微笑鸞鳩試向東甌談治蹟澄江如練水安流

此去嚴陵慰勞先瘡痍爾日漸安全經生各讓侍中席漁父

能誇太守賢

用張  
蠡詩

叔度重來興頌熟鮮于一路福星傳何時

容我春江住爛醉鰣魚櫻筍筵

煙霞沈痼幾經春蘿袞從知各有因管鮑論交翻覆少張高  
尋夢性情真江湖放浪懷同輩風月消閒老此身今日與  
君重唱和頭銜自署葛天民

楊鏡涵

蓉初

餞行正值餞春時惜別還思訂後期分隔雲泥心景仰身非

琴鶴夢追隨羨 公刻羽看垂翼愧我元駒尙戀脂此地攀  
轅彼望歲政成到處誦豐碑

屈指趨陪海上游光陰荏苒歲將週殫彰神力封書奏澤濟  
屠糧獲稔收此日黌宮應繼鳳昔時廟宇仗工鳩須知太守  
恩波廣直與甌江春水流

祖生羣讓著鞭先循吏儒林品望全手澤式孚名宦蹟口碑  
爭說使君賢集經詩賦三江重華國文章兩浙傳驀地春風  
榮別緒四圍山水悵離筵

愧無佳句和陽春聊述萍踪各有因 帝命迪成新未艾

輿情早洽別彌真集成一品傳斯世名在千秋定及身還望  
睦州山上月不徒分照海東民

錢國珍子奇

萍跡甌江憶昔時曾盟江水證心期珍曾奉檄三署瑞篆幸聞惠政懸

蒲治未得前驅負弩隨仁粟非同儲蕙苾廉泉從不染膏脂

遙知華蓋山亭誌前蒙賜新修大觀亭碑誌應比羊公峴首碑

兩浙旌幢記宦游聲名十郡已咸週弊除轉漕民生賴察減觀

漕有賦正荒田地利收觀察總出郭清風車夾鹿行途甘

雨屋鳴鳩侍中經術敷經濟雅望端宜邁眾流

清畏人知率屬先都從善後計安全龔黃雅化追前蹟王謝  
流風繼昔賢再治巖陵 心簡渥徧聞海國口碑傳竭來  
幾度瞻旌旆聊供山穀話別筵

舊頌桐君閱十春題詩紀盛續前因

咸豐八年曾奉  
題桐溪紀畧

治清海

寓塵氛靖坐領名山面目真豸繡朝

天看近日熊車載

道惜勞身鹿城多少攀轅句留得甘棠慰衆民

陳王齡 鐵峯

去任逾榮赴任時攀轅臥轍尼行期滿城父老壺漿餞夾道

兒童竹馬隨治行交推彰德化

士民送德博  
化光匾額

風標卓立戒羣

脂長生到處馨香祝

到處設長生祿位牌

不獨謳歌載口碑

十五年來紀宦游東西兩浙感恩週桐山作宰甘霖降

宰桐君

為民求雨得甘霖

梅嶺分符絕祀收

君蒞嚴求子陵裔僅存二人為籌款奉祀

賦減四

郊除碩鼠課裁九姓慶安鳩

君請裁九姓漁課舟居皆得陸居

文章政事俱

千古

君有書經集句文賦稿行世

不愧人稱第一流

東甌布政積倉先

君蒞甌首積倉穀

更有遺嬰賴保全

君修嬰堂籌添經費

衆建祠壇崇廟貌

文武廟郡廟及四賢祠雙忠祠存濟祠均次第修理

聿新講院啟英

賢

君修中山書院並增廣膏伙

風希王謝高蹤繼學闡程朱道統傳

崇祀君

四賢並刊刻附祀諸賢實錄

儉德清操堪化俗此邦忍復坐華筵

止坐筵君禁



俗陋

將離惜別感三春況是葭葦有舊因兩載論心關性分一生  
接物總天真嚴陵又見添新政滄海猶然繫此身遙想旌旗  
方蒞止郊迎鼓舞睦州民

陳桂齡  
揖清

昔年身到武林時屈指剛逢歲暮期奉檄羨君邀賞識臨  
民愧我未追隨化行風動孚遐邇駕鳳星言載輦脂剔弊除  
奸胥吏肅頌揚一路口鐫碑

旌旆東來作宦游慈祥愷惻湛恩週典崇大比多方計惠及

遺骸是處收宥罪從輕歌德駿庀材舉廢喜工鳩秋成雨載  
豐穰慶霖雨旁施厚澤流

穀積千倉養育先整躬率物教兼全歡欣羸得兒童躍鼓舞  
交推太守賢願紹龔黃名其播不隨王謝話同傳江山一覽  
閒登眺敢事奢華列綺筵

嚴陵別後幾經春此日重臨續舊因令出惟行綱紀立子來  
偕樂性情真訟詞悉泯譟張幻節儉何慙俯仰身末俗澆風  
羣感格歌功今又徧斯民

陳彭壽

椿伯

睽隔慈顏五載時精神如昨慰心期樛材不棄栽培厚茅塞  
能開步履隨大澤羣覩施兆庶坐筵俗更禁韋脂吏胥弊絕  
輿情洽滿路聲聲聽口碑

回思往歲詠來游浩蕩仁恩蔀屋週積穀陳陳倉廩裕掄才  
濟濟譽髦收網開三面功真駿工集羣材事盡鳩養老恤鰥  
兼保赤共欽大德比川流

臨別殷勤造士先爲謀生計策安全一心深體黎民隱闔郡  
同稱父母賢願借寇恂懷莫遂治同龔遂績常傳試看耆老  
攀轅意遮道而來繞別筵

任卸嚴陵兩度存

楓宸特簡續前因他年敷教恩同沐

此日重來道樂真有要有倫齊以禮克勤克儉本諸身紀綱

聿整今猶昔又聽謳歌徧士民

--	--	--	--	--	--	--	--	--

東甌留別和章

中卷 屬吏紳士和章均用原韻

瑞安縣學訓導 戴咸弼

甘棠垂蔭幾何時此去嚴陵一昔期  
江上旌麾留不住道旁父老願相隨  
清風只許攜琴鶴惠澤甯誇載稻脂  
治行早經推第一好憑萬口爲鐫碑

輶車載德紀前游持節重來歲已週  
案牘苞苴先斥絕江山風月儘兼收  
訟庭虛寂調雙鶴民事勤勞飭五鳩  
政績於今邁王謝惟公端不愧名流

爲民司牧問誰先  
教養兼施策萬全  
績奏龔黃收實效  
名存鄒魯溯前賢  
錦囊麗句臨歧贈  
孔壁佳篇到處傳  
試向大觀亭上望  
令人回首悵離筵

自憐樗櫟亦逢春  
鳴鹿同歌有夙因  
課士談經慙末學  
論交折節見天真  
儒生空負名山業  
循吏當爲許國身  
浙水東西方引領  
福星一路慰斯民

代理永  
嘉縣 曾傳楷

荊州初識廣陵時  
彈指光陰十載期  
自昔戎行蒙顧盼  
而今甌國得追隨  
渥承厚澤容鳩拙  
莫挽離懷秣馬脂  
惠愛及民

資教養欣看勒徧去思碑

東甌游罷睦州游舊治重臨歲月週晝戟好從江上去錦帆  
遙向望中收 恩來九陛惟攜鶴慶協三遷歷爽鳩自此  
升恒無限福棟樑材本異時流

重重德政在人先績媿龔黃事事全歷久名場多後輩建新  
祠宇繼前賢兩年雨化諸生感四字詩頒萬戶傳把盞恰同  
春並餞最關情是別離筵

滿眼鶯花正好春忽傳驪唱亦前因嚴灘甌海風俱古鶴舫  
琴裝樂最眞 太守才兼卿相度閒曹羞說宰官身依依未



盡攀留意豈獨懷恩在四民

溫州府  
經歷 張朝楷

小草剛剛被潤時自憐大澤未逢期雖承首領趨堂暫不勝  
心欽執鐙隨抱得烏情追驥尾聽來驪唱秣車脂仁人卽去  
仁恩在入耳聲聲滿道碑

下僚初到未全游瞥見功成業已週廟貌翻新神亦格山容  
改舊景齊收興寶髦士庠飛鷺觀政英耆杖策鳩寄語紳民  
須記憶恩波終貫大江流

凡事親勞統率先清勤兼慎此身全但看堂育如兒愛方曉

官慈似母賢絜矩課題由內發本廉古訓至今傳

公將去任課書院

文題是以君子有絜矩之道也詩題六事廉爲本

任憑祖道攀轅餞不受都門一席

筵

仁風觸處總成春想是甌東寓舊因流水有情迎與送虛堂  
能察假和真詰經久冠三江士勒記常存百世身莫贊差同  
游夏輩妄思效法治黎民

候補府經歷

金贊勳

經濟文章出聖時舉興百廢應昌期買牛似劍今重覩載鶴  
將琴本自隨披膽名方垂竹帛駐顏壽豈在松脂懸魚彈雀

尋常事試向東甌聽口碑

戎馬曾隨記舊游滄桑忽歷一星週

乙卯隨帶兵來溫

公才如康樂

心相印功羨叔倫指顧收小劫當時憐墮燕

樂清餘逆賴

公網開一面

大工不日慶成鳩

溫郡各工程倡捐計日完功

公

新亭從此資吟眺始見

甌江清自流

仲由爲政在勞先事事親裁果萬全立法但須觀後效居官

原不讓前賢文翁德化無矜色陶侃勞勤豈秘傳菲食自來

崇古訓黃堂從未列華筵

五馬曾經兩度春永嘉山水漫無因一官伏櫪恩重渥萬世

遮轅愛始真竹馬又逢垂釣客

楓螭不放臥雲身他年

擁節臨甌栝豈獨歡迎是部民

候選同知  
瑞安縣丞阮祥藻

兒童竹馬記當時

公於乙卯到甌公幹丁卯蒞郡守任相隔一紀

忽忽重逢報政

期合浦清風曾共懷平原霖雨喜相隨六時案牘勤民瘼千

里桑麻裕國貽我愧感恩更知己但懷遺愛拜豐碑

廿載臨安紀宦游

公有兩浙宦游紀畧之刻

萍蹤小聚歲三週

公守溫三載

藻到瑞丞任亦三載

春風願向公門植小草欣承藥籠收掩卷衙齋閒

飼鶴勸耕時節喜聞鳩甌江三折回頭水合共神君愷澤流

經筵吾鄉邊孝先文章經濟夙兼全  
慣因索句分唐宋偶爲  
啣杯中聖賢元禮門牆原不峻  
和凝衣鉢愧相傳渭城一曲  
懷人調譜入甘棠侑別筵

懷如秋蕭藹生春覲面相投亦夙因  
久宦世欽平仲儉耽吟  
人愛樂天真一樽清酒難爲別  
兩郡蒼生寄此身自笑邯鄲  
空學步慙無實惠到斯民

候補  
縣丞毛鳳起

福星移曜夏初時士庶攀轅請後期  
沃野欣看苗黍膏輕舟  
惟有鶴琴隨祥徵甘雨同霑澤  
飲酌廉泉不潤脂留得棠陰

生意滿摩崖好勒去思碑

時艱未忍事優游浙水東西跡已週上考循良書課最通才  
經濟效兼收藝林露湛培植幹蔀屋風恬紀扈鳩重鎮當年  
資保障高撐廉石砥中流

文藝原資器識先德功並立一身全龔黃政績孚民望鄒魯  
儒風繼古賢虎觀才名心契久鹿城惠澤口碑傳從知治術  
皆經術公暇論文壓四筵

竹馬歡迎有腳春釣臺訪舊亦前因 九天雨露承

恩渥兩地農桑勸語真借寇莫償童叟願瞻韓共仰長官身

節樓翹首 黃扉近遠陰甌江舊部民

升用知縣  
候補縣丞 周正淮

憶昔鄉同異地時趨承何日慰襟期  
一帆江北風相送五夜  
浙東月共隨正擬花陰常帶雨  
忽驚車駕又塗脂士民多少  
攀留意豈但鐫成德政碑

甌江此次是重游暑往寒來歲兩週  
昔日干戈偏域定於今  
風景滿城收教期學校騰龍鳳  
養課陰晴聽鵲鳩興利更能  
除弊政不甘俗尚水同流

居官民事自爲先人樂神安貴爾全  
大啟廟堂尊古聖崇加

封號闡前賢忠貞祠建名無朽陰隲詩成句永傳豈止大觀  
亭宇迴好憑游眺敞瓊筵

草茅方幸澤如春爭奈攀轅各有因舊地恩深知望切離歌  
語摯亦情真騰霄鵬翥頻年事泛水鳧趨異日身一曲巴人  
言未罄聊同頌德徧黎民

候補  
縣丞 錢熾昌

柑酒聽鶯正及時福星又值量移期隼旟采徹仁風播鹿轂  
春深化雨隨法肅雷霆恩湛露清懸冰鑑白凝脂雙歧五袴  
謳歌徧海上新鐫德政碑



爲愛名山著屐游東甌保障已重週門牆桃李千蹊熟瀛海  
珊瑚一網收惠政車前覘擁鵲醉翁亭上聽嘯鳩此行再謁  
嚴陵廟化蜀功深慰枕流

善舉思開必有先雙忠存濟力求全廟成文武崇前聖祀重  
程朱列後賢懷少恩隆源乳臭啟蒙學正續心傳救荒有備  
原無患菲食從來節盛筵

向陽花木易爲春爭說陳陳粟屢因自昔高車惟表德從來  
臥閣但含真攜琴雅韻陶吾性飲水廉明勵此身縱目大觀  
邀福佑神人終始奠斯民

候補  
縣丞 鄒寶善

執轡從公憶昔時三年報最忽逢期歌聞驪唱難留別念  
切鳬趨恨莫隨德媿龔黃垂政績轅攀父老挽車脂萬家霖  
雨羣沾惠入耳聲聲頌口碑

甌江兩度話重游廢墜都興庶務週義塾頻添看教立豐年  
屢獲慶倉收千秋業在羣欽駿百事工成早集鳩經濟文章  
斯世重恩波浩蕩比川流

勵已勤勞政率先純儒良吏德兼全黃堂望重神君頌赤子  
心慈似母賢學衍朱程源克紹風流王謝譽同傳情深附驥

多依戀無限滌洄悵別筵

仁風徧播總成春重到嚴陵記舊因  
寵錫  
楓宸

恩自重歡迎竹馬愛彌真此時擁旆看遮道他日開牙定及  
身績著棠陰同惜別而今惠布睦州民

候補  
巡檢  
陳文偉

光陰又屆浴蘭時教養三年慰衆期  
北極絲綸從闕下

東甌霖雨與車隨盟心夙願原如水夾道攀轅漫載脂自有  
深恩淪浹在不徒德政共鐫碑

昔年宦跡記重游竹馬歡迎歲序週足食民由知信始鋤頑

神佑協功收政成仁愛村馴雉瑞應豐穰戶有鳩修葺名區  
同喜雨允偕白鹿溯源流

教士惟憑器識先量材易事勿求全俗猶鄒魯添新政績嫺  
龔黃紹昔賢王謝流風瞻步武朱程舊業衍薪傳應知父老  
臨岐意豈第離懷繫別筵

仁風到處擬陽春雨郡蒼生感風因實政久能祛俗廣愛人  
本自出天真雙蜺雲靄依行轡一水程遙悵繫身共祝重迎  
開府節東山碩望洽斯民

永嘉縣  
典史 丁鍾文

記得錢塘奉檄時一年瞬屆及瓜期甌江差幸帡幪託雲岫  
還思杖履隨行篋將移琴護錦征車早駕輦凝脂江干父老  
攀轅切一路稱賢聽口碑

東甌有幸共來游郭伋曾經德化週欣看兒童迎竹馬不聞  
士女刺桑鳩文章濃郁胸中吐山水雄奇筆底收勝跡重新  
資鶴俸蒙泉一勺漱清流

修己臨民表率先醇儒循吏行兼全舊編著作人爭誦新製  
篇章世共傳驅鯉韓文同戴德選錢劉寵並稱賢匆匆上道  
攜琴鶴祖帳填衢列餞筵

萬姓難留有腳春他鄉被澤亦前因推行仁政恩膏渥化育  
英才賞識眞此去清風攜滿袖本來明月是前身睦州好慰  
閭閻望來暮歌聲徧四民

代理長林場大  
使候補鹽經歷 張來川

大名卓犖冠當時濟世文章早歲期四代典謨功最遂

精通六經

尤長於書六經註腳筆相隨學成樑棟堪擎柱詞屏鉛華洗盡脂

賦手文心推第一傳流千載擬韓碑

著有書經集句文賦及卦名律句各稿久已膾

炙人口通行各省

什年宦蹟浙東游教養兼施惠徧週九姓淪湑沈苦救

浙江茭白

中

船戶九姓係前明罰為漁戶完稅者前署睦州事詳請萬民  
裁稅並准改業士農工商今九姓均得化莠為良矣

祗席偉功收乙卯歲收復樂清琴書到處惟隨鶴政賦均平試詠鳩

良吏醇儒應合傳不矜王謝比風流

持節甌江保赤先功成兩載慶安全社倉廣積分清俸講院

宏開毓俊賢雨膏黍苗留蔭厚風遺鄒魯衍薪傳化光德博

民思仰甌民恭懸德博化光匾額亭峙江山設几筵江山一覽亭落成之日民心感仰設長生

祠

自愧蹉跎卅載春從來知遇有前因惠風坐我天懷曠和氣

親人率性真架上圖書知滿腹階前尺地許容身睦州此去

重敷政父老歡迎舊子民

候補  
從九 蘇克敬

偉績奇功振一時鹿城冠蓋值昌期歡騰郡邑羣生慰化治  
絃歌到處隨柳絮迎風餘翡翠桃花帶雨落胭脂眼前春色  
留難住惟向東風記口碑

三年清宦此優游恤吏循民事事週借寇心期驚莫遂依劉  
恩荷慨然收路經枯嶺琴同鶴山入嚴陵杖荷鳩煥啟大都  
新政治舊邦膏澤冀波流

王謝風流繼後先儒林聲價獲矜全江亭東郭留千古祠宇



中山重四賢功業不隨車馬去文章自與姓名傳冠裳復見  
小鄒魯從此經筵勝酒筵

竹馬重迎到處春釣臺峻望亦前因風塵洗盡江山舊霄漢  
長明日月眞 九陛重承籌國計三台連進致 君身  
同霑雨露東西浙暗祝心香豈獨民

監生  
蔡保東

喬木鶯遷首夏時懷仁未忍問行期但崇儉德蘇彫劫不市  
私恩縱詭隨春泛甌江牽荇帶風香華蓋勵松脂追尋王謝  
千秋遠輿誦聲聲口有碑

橫舍儲材戒惰游誦絃無間四時週聚螢綴學憐車允驚蝶  
浮華薄魏收鉅集示人轡龍虎好音懷我化鷹鳩公餘只可  
談風月重勗清流挽濁流

誠民要在作孚先教養關懷策萬全積穀社倉籌保息烝髦  
鄉遂待興賢銀黃身綰官箴肅清白心盟世德傳還恐奢華  
成習俗班春鄭重警初筵

七里灘迴問富春預知敷政勑兼因尙餘父老謳思切未改  
書生面目眞海晏不波涵舊澤月明如水證前身漫嫌樸野  
言詞拙雁蕩山居太古民

鹽運使 孟璜  
運同銜

來是陽春有腳時  
留心教養與民期  
十年戎馬滄桑變  
兩度蓉江雨露隨  
講院橫經興士氣  
神倉積粟厚民脂  
改絃易調薰風曲  
滿耳謳歌載道碑

追踪王謝續前游  
瞬息光陰已十週  
斧鉞纔臨強寇剪  
旌旗將發戰功收

指丁卯歲平樂匪事言

青山故絳棲  
仙鶴綠樹新田喚曉

鳩暫與江山風月別  
重來登覽憶名流

仁民澤物整躬先  
百物維新策萬全  
折獄片言人愛戴  
衡文多藝士瞻賢  
白頭自笑虛駒隙  
青眼還蒙附驥傳  
差幸非公

稀晉謁今朝餞別喜開筵

嚴陵何幸地回春父老歡迎話夙因自昔沿河鉦角起從茲  
比戶誦絃真甘棠海甸留遺蔭霖雨蒼生感及身羽扇揚風  
深挾髓恩膏隨處慰斯民

布政使  
理問銜 李全英

父老依依送別時未能借寇慰心期王喬履舄雙鳬去清獻  
宦囊一鶴隨教化雍容祛積弊性成淡泊厭塗脂甌江三載  
恩膏厚爭勒羊公峴首碑

東甌重到溯前游屈指光陰一紀週華蓋築亭名勝復中山

校士衆材收俸分書院官捐鶴糧足嬰堂母哺鳩二百年來  
風化美從知循吏是名流

博物居然似茂先文章經濟兩能全龔黃治績超千古召杜  
勳名歷衆賢桃李新陰今日盛甘棠遺澤後人傳衡文雅愛  
諸生集資福寺中敞綺筵

聽唱驪歌正暮春瞻韓我幸有前因工程料理非閒務杖履  
追隨但率真甌海攀留生佛駕朝廷倚重老臣身義倉  
積穀知多少留待他時活萬民

舉人  
黃書誥

藉藉廉名獨冠時重來逸少愜民期仁聲遠樹儕龔遂介節  
高標媲卞隨帶劍常年除草竊囊琴何處落松脂甘棠從此  
留遺愛去後長懷有道碑

同在光天化日游情深望歲歲三週公門桃李春風植碧海  
珊瑚鐵網收養裕童蒙資立鵠宏開廣廈庇安鳩金臺講學  
淵源古心鏡同澄仰萬流

紉縵星雲快覩先光分部屋慶安全一麾譜入循良傳五邑  
爭稱太守賢崇祀褒功新廟貌譚經奮席舊家傳寇公欲借  
情難遂祖道攀轅共敝筵

羣黎忭舞樂熙春敦俗農桑利普因麥秀兩歧欽政懋支流

一派感

恩真

丁卯冬樂邑族人與鄉鄰構訟釀成積案公以片言折之洗其冤

須知良吏

碑傳口猶是儒生玉惜身此去嚴陵瞻福曜定將霖雨澤生

民

舉人胡玠

桐江捧檄幾多時甌海移旌又及期明月關河千里共清風

琴鶴一身隨有心借寇舟難挽無計攀劉轄已脂潮汐回頭

真可信

甌江俗有回頭水之說去必復來

福星長祝去思碑

莫問前游與後游重來已是歲星週五城絲粟胸中畫一覽

江山筆底收

公捐廉重修大觀亭  
即江山一覽亭舊址

挾策譽髦欣吐鳳

公增添

中東兩書院膏伙按月  
親加覆試士林感奮

望旌父老喜扶鳩慈雲到處人爭仰

名士於今第一流

士藝何如器識先如 公才學况兼全舟車宦蹟窮山海風

雨衙齋揖聖賢

公講習程朱語錄  
每以此勸民課士

吟嘯亭臺留葉本文章

碑碣證薪傳

公重修大觀亭落成手撰聯匾復於亭右資  
福佛院添置左右山房各系以詩並爲文勒石

以江干婦豎爭相送忍聽驪歌唱祖筵

浙水同誇有腳春雪泥鴻爪總前因中興日月人情厚大旱

虹霓士論眞謝客巖頭添別恨嚴公臺下妬吟身應聲勉效



甘棠詠慙愧南疆舊部民

試用訓導陳鈞

春風化雨正當時又道嚴陵訂去期半粟半絲思分定一琴

一鶴願身隨傳家禮學皆矜式華國文章不買脂

讀公著作皆根據

經籍澤徧鹿城傳萬口歡聲載道頌賢碑

豚兒門下許從游幾載栽培寵渥週侍坐黍居桃李屬持衡

不棄菲葑收

男鏘乙卯鄉試蒙公薦卷

才慙文筆輸鳴鳳志在詩書拙

守鳩賴有師承貽後學相傳衣鉢溯源流

自古經猷學問先政修百廢策安全

公重修文武廟郡廟及存濟祠書院嬰堂義

學等處皆捐廉以成美舉循良報績經三載公下車以來將近三載廟貌維新謁四

賢前為鹿城書院今改設四賢祠一覽江山名勝復大觀亭一名江山雙忠一覽亭公重建

氣節古今傳雙忠祠公亦重修從茲風俗奢靡革多士宏開翰墨筵

文風丕振公蒞溫郡

何時重到腳陽春持節甌東證夙因陰被召棠餘澤渥雨懷

郁黍舊情真萬家生佛羣沾惠兩袖清風祇潔身酒餞江頭

難賦別攀轅無計慰黎民

候選縣丞陳承鏘

來暮纔歌條別時幸逢名世際昌期杜陵廣廈千人庇清獻

行滕一鶴隨獻獄無偏心似秤養廉相率戒如脂棠陰拂拭

加珍重萬本爭摹內史碑

公於甌郡諸善舉皆勒碑記事詞翰俱佳

惠宇三年快共游星輶小駐歲逾週屠蘇赤手叨安堵

於公

卯歲提兵剿辦樂城土匪全郡無危

薦鸚青冥荷並收

公分校浙闡瑞安劉孝廉祝三永嘉任部郎

振颺家學博鏘皆出公門下

重蒞海邦輪夾鹿歡迎父老杖扶鳩文章華

國猶餘事仰鏡傾風萃士流

有爲不讓古人先善政還宜善教全衆口交推循吏最

九重早識使君賢簪纓累葉清芬紹棣萼相輝治譜傳

令昆公

友梅歷守劇郡有聲士民爲刊東牟攀轅錄三廉輿頌以傳何幸睦州移福曜一杯祖道

悵開筵

樗散叨噓筆下春名鐫三字豈無因

公於義倉大觀亭均蒙敘及微名與有幸焉

賢侯愛以遺斯永多士恩緣去愈真鍾鼎兼耽泉石癖神仙  
偶現宰官身出山到處爲霖雨念切惻瘼不負民

試用訓導 陳宗鼇

送 公迥異迓

公時

公守甌百廢具舉氣象一新

怕近香花祖道期感

切每思圖像祝誠傾長願執鞭隨萬間廣廈皆叨庇

續捐文成會事

多士感戴尤深

兩袖清風不潤脂匪敢阿私曹好狗閭閻嘖嘖口傳

碑

兩浙東西徧宦游福星重蒞歲星週

公前於乙卯歲克復樂清駐甌數月參

岑如與囊中選

謂同門劉孝廉祝三任郎中振颺家學博鏘鄉闈卷均出

公門下巖壑都煩

筆底收

謂重葺大觀亭及創建資福寺兩齋碑記

赤子歡傳廉卻鮓蒼生信有化

馴鳩斗山不出民謠應辜負循良第一流

吾甌有斗山不出頭好官難久留語

見郡志

腹笥便便軼孝先儒林良吏兩能全海壖難挽彭城駕鄰郡

爭迎太守賢萬卷圖書三味飫扁舟琴鶴幾人傳臨歧父老

遲攀戀櫻筍厨開滿餞筵

早知有腳是陽春卿月移償未了因如此好官寰宇少難於

本色性情真文章報稱堪華國著述流行况等身轉盼建  
牙迎竹馬慈雲一樣覆甌民

候選訓導梅慶元

憶昔兵戎奏績時撫綏曾已愜民期咸豐乙卯樂匪滋擾自公帶勇來甌剿滅

從此去旌旗別何幸重來雨露隨政紹龔黃恢吏治策全富  
庶裕民脂翩翩五馬優游處萬口都傳載道碑

萬姓羣欣化宇游涵濡忽忽已三週公自丁卯蒞任於今三載文章壽

世爭矜式公有文稿刊行桃李盈門盛賓收中山書院肄業者衆肺

石情懷消角雀民情向化案牘寥寥心儀感慕誦鳴鳩棠陰黍雨思無

極浹髓淪肌惠澤流

廢墜興修倡自先慨分清俸計周全足民何待籌三載

添置義倉

未及半年增穀累萬葺廟猶能奉四賢

重修文武廟郡廟及雙忠存濟四賢三祠皆公捐廉首倡

赤子無知蒙化育

育嬰堂增置產業以利久遠

青氈有教廣師傳

郡有義學捐資

延師不才愧我邀青鑒

蒙委中山書院司事

試院會叨侍宴筵

每遇考試獎賞

之外設席待士余亦屢蒙筵宴

正幸吹噓草木春無端別思起何因也知此地攀留切卻羨

鄰邦感化真

調公現卸篆守嚴郡

一覽江山新豁目

江山一覽亭自公首捐得以

落成雙攜琴鶴舊隨身相期惟有長生祝頌德歌仁獻士民

民

感 恩深重無以酬報各處奉  
長生祿位並歌頌以誌不誼

候選 訓導 孟守廉

已是三年報最時賢侯無奈賦歸期東來盡造黎元福西去

惟留筆硯隨人愛棠甘常有蔭手栽松老漸成脂

公重建資福寺補

種華蓋山松竹花木

羊公重到知何日感泣應鐫德政碑

郡民愛慕不已因為公

立生祠並建德政碑

十二年中兩度游

乙卯歲樂清土匪作亂公奉差來溫辦理軍務又於丁卯歲蒞溫府任已一週矣

流光容易已成週萬家生佛同聲頌

公重立育嬰願改造中東書院添增膏伙修

建四賢祠諸善政一時並舉臨行時又諄諄各司事無慙其為甌之教養計也周矣

一覽江山極目收

七

中



華蓋山舊有江山一覽亭傾圯已久公蒞任  
之始捐廉興造並刻聯句以誌勝亦盛事也  
地角天涯消  
唳鶴烟蓑雨笠驗啼鳩數年以來沿海恬靖歲穀豐收皆為善政所感  
去思不逐甌  
潮散但見恩波日夜流

關心民命政為先積粟神倉策書全公捐廉舉辦曲水流

觴仍勝事公宴多十於大元同字有真傳公著有尚

律賦雨浙寧游錄東甌紀量才每賞休文句公考取觀風

畧四賢祠諸賢實錄行世兩書院及肄經

堂皆蒙拔取以冠多士遮道難留杜母賢五馬出郊何草草

忍聽驪唱起當筵

睦州風月又生春琴鶴重遷有夙因公再蒞原州買犢償刀

成雅化聽驪酌酒亦天真絲絲梅雨憐長別渺渺雲泥證後  
身勲業文章均不朽公行何速痛吾民

恩貢 王維鈞

回溯春風下馬時冰銜一片證心期人瞻北斗文章重

通經公

學夙有文名惠洽公車雨露隨歷仕名區報國應須推柱石爲

民何止惜膏脂禁除催科稅契一切差費勒石萬家生佛循

良吏合勒甌東衆口碑

雅愛謝君著屐游旌旗未至澤先週栽成桃李承恩渥

整飭中東

書院課試之法並積滿倉箱卜歲收廣儲社倉多惠如公

添膏伙士林鼓舞

積滿倉箱卜歲收

廣儲社倉

多惠如

公

廉潤鶴

續捐文成會川資多士感恩

不才似我拙藏鳩

自公蒞治生無公事未嘗投謁

去思無限棠陰望山自長青水自流

著鞭莫讓祖生先吏治儒宗信克全孤嶼千秋標介節大觀

萬古式名賢

捐修大觀亭勒石題額古蹟重新

十年偉績從頭數

公平樂匪到溫至

今已過

兩載清風自此傳

榮任府篆兩年間刑清政簡名譽益著

忽報瓜期催

已速江干無奈餞離筵

此去嚴陵各有春福星移照話前因官多美政遷逾速

重修文

武廟郡廟及四賢祠雙忠祠存濟祠書院嬰堂義學美政甚多

詩帶離聲意倍真

讀公留別詩有戀

戀不舍之意

臥轍空勞鄒魯地買金擬鑄宰官身

甌民欲挽留不得惟設立長生

祿位奉祀  
以誌不忘  
何時重遂瞻韓願竹馬爭迎慰萬民

貢生  
徐丙介

記得明公到郡時此心久與聖賢期  
欲將孔孟真傳繼未許蕭曹並駕隨  
多士每思親道範佞人何敢逞韋脂  
無窮德澤深人處載道歌聲有口碑

勤政未嘗汗漫游三年治術徧能週  
育嬰薪水錢關設取士珊瑚鐵網收  
重築山亭千仞象頻興土木百工鳩  
循良傳裏誰能似藉藉賢聲契上流

教養著鞭祖述先關心民事最周全  
鷹鷂必逐良民幸鳥雀

不羅太守賢安靖田房蠲我稅清釐契尾永流傳

永嘉稅契積至十數

年不發公設局清釐始得給

發並除我稅積弊勒石永禁

經一筵

聞道行旌到富春釣臺再過有前因人歌叔度來何暮我愛  
鄧侯挽更真抱負早儲伊呂志經綸想像禹臯身福星應有  
重來日好把甘霖濟萬民

貢生

樊聯升

持節東來未幾時三年報最忽瓜期月移天上光原普雲去  
山中雨自隨庭示懸魚甘淡泊身惟伴鶴杜韋脂蕪詞貢頌

無私語載道昌黎有口碑

回首風塵溯舊游鴻泥重印計星週

公於乙卯奉檄剿辦樂匪曾來甌郡成

陰棠棣連枝茂

公季兄友梅觀察自大令歷守東牟三廉均有惠政刊有攀轅贈別兩錄公前宰桐

鄉守嚴郡政績班班亦有兩浙宦游記畧

到眼江山一覽收

江山一覽亭一名大觀亭公重葺

之爲甌士論翕時咸立鵠民情貼後感安鳩

一以教養爲事公奉命守甌

郡勝概如加給中東兩書院膏伙添鄉試文成川資以桐江蜃海無

多路兩地恩波一樣流

教民自以惠爲先撫字常勞策萬全十萬戶欣沾教化二千

石不愧循賢甌東政績於今永江左才名自昔傳惆悵北門

將祖道江聲莽莽沸離筵

五馬蕭蕭去富春

君恩偏重豈無因功能藉手咸思濟

論不吹毛但率真風過花猶留遠韻水寬魚樂縱游身願

公此去三遷驟一瓣心香祝部民

廩貢生 馬雲路

福星兩度照甌時白鹿城中慰夙期風採輜軒蒙作養文高

訓典願追隨

觀風沐取超等得讀  
公集尚書文賦

堂新庇廈叨餘蔭人望還

車賦載脂治術悉從經術出萬家合誦去思碑

公餘有暇卽山游小築齋亭屢屢週心鑒冰壺消暑熱菓登

場圃祝秋收

公勸置義倉儲穀備飢

在郊絲組歌良馬懸壁蒲鞭陋爽

鳩柑酒聽鷗追仲若太平官府自風流

猷爲直在古人先培養甌民事事全衣被慈推杜母德棠甘

士仰召公賢

育嬰堂分給絮袄中山館增添膏伙

孝廉望重三吳著生佛休聲

兩浙傳 公有文章孔鄭註應追漢學列經筵

攀轅無計駐陽春澤溥甌東證舊因弊政能除民樂業澆風

頓革俗歸真

公審結誣告諭禁坐筵

綸音褒及臣熙績輿論羣賡德潤

身珠玉留題情惓惓從茲忭頌徧生民

廩生 傅 傳



三  
花驄駕別不多時公餞無忘訂後期勤政何關千甓運出郊  
祇有一琴隨仁風譜就薰風曲野露凝成甘露脂好共嚴江  
留頌額吾甌復勒去思碑

送行誰不學鄒游擁轍攀轅面面遇爲愛葺修功已補爭傳  
頽廢事兼收四賢祠古崇遺像一覽亭高了八鳩自是實心  
行實政龔黃邵杜羨同流

循循善誘作孚先學行兩途要取全評論鴻文忘長吏分頌  
鶴俸禮羣賢金丹換骨深陶鑄玉尺量才豈浪傳愧我荊州  
猶未面音塵莫得接高筵

記得慈雲覆富春  
兩年治績結前因  
風行郅屋羣生洽  
情貸蒲鞭一味真  
聽訟不矜蕭氏律  
防河還借寇公身  
嗣來輿頌知何屬  
遺愛聲聲聽士民

生員 陳宗麟

海天膏雨沛芳時  
早慰羣黎仰望期  
一介微如魚亦卻  
雙旌祇許鶴相隨  
冰心朗澈休懸鑑  
鐵面清嚴儼潤脂  
拔地甘棠欣漸大  
試聽嘖嘖道旁碑

東浙題詩徧宦游  
樂成偉績十年週  
殲除醜類恩無外  
感召天和歲有收  
紫氣載瞻輪夾鹿  
白頭重話杖扶鳩  
數來惠政

難更僕豈讓當年召杜流

化蜀文翁勸學先春風入座荷生全分沾廉俸甦寒峻大起  
宏規踵昔賢玉尺無偏叨首選金鍼不秘示薪傳栽培自愧  
非桃李立雪頻教與綺筵

甌路爭迎有腳春睦州移守證前因自忘方面諸侯貴我道  
明公至性真擅宰相才膺 帝眷樂山水窟駐吟身台

星轉盼褒 綸綍舊治來旬望慰民

生員 陳啟濤

餞道驪歌忽唱時芳辰正屆麥秋期名區五邑仁風播大道

一車甘雨隨再到嚴陵承

帝命重來甌郡惜民脂今思

百廢俱修後勒石爭看德政碑

曾向甌邦記宦游今朝屈指歲偏週黃童赤子懷深育東箭  
南金仰廣收蜃海一船看載鶴鹿城萬戶樂安鳩堂虛懸鏡  
眞賢宰廉比清泉水上流

發政施仁四者先於今上下慶安全萬家生佛民人頌兩袖  
清風太守賢粟積欣歌年大有置郵喜見德流傳青青柳折  
斜陽裏遮道擎杯淚滴筵

膏雨千家甌海春口碑獻頌豈無因宏開講舍崇文教欲革

澆風務本真偃草欣歌君子德傾葵爭慕大夫身晚潮欲送  
舟千里臥轍攀轅在子民

生員高綺

竹馬歡迎憶舊時行旌無奈促歸期牛刀犢劍風如在鶴隴  
琴囊喜共隨五袴歌聲騰里閭一錢揀選念膏脂於今恁作  
攀轅計黎庶熙熙口勒碑

非關張翰悵秋游屈指光陰候已過花燦鹿城春雨足帆歸  
蜃海暮雲收訟消庭靜無爭雀工葺亭新共樂鳩去歲公捐廉重建

大觀亭百工趨功一路福星高照處甌江父老仰承流  
赴事按日而成

化擬文翁憶後先勤勞教養更求全循良足婉龔黃業樂只

宜歌召杜賢藥餌濟人心惻隱

公設延壽藥局濟人

詩書造士澤流

傳援鞭截鐙無長策一曲驪歌餞別筵

草綠西堂感暮春謝公雅治繼相因冰壺懸鑑誠非爽玉尺

量材不失真

中山書院每逢公課揀選二十名覆試各加增膏伙

三載仁風清肺腑

五封化雨浹心身

九天鳳詔榮膺命東浙來旬慰萬民

生員

王德音

隼旗乍駐幾多時爭奈留恂未許期安石仁風宜扇贈鄭宏  
霖雨感車隨民生勤恤情通隱婦孺名香口有脂南國棠陰

何處是慈雲齊拜路公碑

甌東宦跡記重游電掃欃槍歲一週勝地湖山資補葺詩人  
風月愛兼收筍輿徧踏廉隨鶴竹杖閒扶健策鳩坐嘯大觀  
亭著句清名原不愧江流

政成端自一身先避毀何心企瓦全東里愛遺曾有謗南陽  
威畏豈非賢刑清豻獄奸民少治格烏翔肅吏傳從此黔黎  
歌戴德驪駒忍聽唱離筵

星駕輶回到富春嚴陵風雨證前因歡迎竹馬兒童慣熟食  
莼鱸趣味真保赤原無分異地宰官敢自惜閒身重來與訂

攜柑約釀酒蓉江祝小民

生員

項鳴珂

奉命輶回夙駕時雉馴陰覆麥秋期千家膏澤羣霑沐一榻  
琴書喜自隨治譜人因欽吏術神君祿未竊民脂仁風遺扇  
爭傳頌不朽豐功願勒碑

昔時五馬記行游逸少光風今復週別墅煙霞供嘯傲訟庭  
案牘盡閒收冰心一片酬封鮓網面三開狎放鳩公正廉明  
儒雅吏如君真不愧名流

示朴教成天下先澆風薄俗毀方全徹金裴相嚴家法脫粟



公孫勉後賢鄒魯絃歌承雅化程朱理學契薪傳甘棠處處  
歌遺愛忍使驪駒唱祖筵

三月鶯花續富春嚴陵再訪紀前因詩書蜀治增新化面目  
廬山識舊真兩袖清風惟載石一車霖雨許隨身聽鵬有約  
君無負柑酒重攜祝此民

十一齡  
童生 陳壽宸

棠陰清潤勝花時瓜代於今悵及期五馬春風曾有識一瓢  
江月與追隨知移名郡重承簡欲挽高車莫載脂父老攀轅  
情不淺聲聲遺愛口如碑

東浙題詩足宦游  
甌江暫駐歲重週  
海邊士有登龍慕  
壁裏經堪集腋收  
官舫隨身惟賸鶴  
農家趨事慣聽鳩  
笑予竹馬兒童輩  
也附中山第一流

鄒魯從來禮樂先  
使君教化更求全  
更新風俗歸才畧  
終古文章繼聖賢  
已卜聲華斯世重  
共推品節是家傳  
此行留戀中川否  
別思應添送客筵

華蓋山留萬古春  
詩情宦跡總前因  
一雙塔影離愁遠  
十九泉香舊夢眞  
學士堪題三過字  
客星須識再來身  
天邊風露樓還在  
億兆仍爲杜牧民



東甌留別和章

下卷

屬吏紳士和章不拘體韻

中東書院掌教孫鏘鳴

十年重聚鬢毛斑政在甌民萬口間判事公庭無滯牘

歷官公

以來無不可立結之案蓋有明決過

庇人廣廈有歡顏

吾郡書院

嬰堂義學君皆捐俸重修添設經費厚給膏伙

耕桑海角連年稔禮樂天南運漸

還試向大觀亭上望已知潤色到湖山

重建華蓋山大觀亭

其有離愁對酒盃寒瓊懷抱向誰開文章孰繼乾涸美

重修君

四賢祠鄉賢周恭叔以下三十悃悃難逢卓魯來嚴瀨定知

下

喧竹馬謝巖何日築書臺

君與余言省局官書將刻成欲令各縣籌款詳請多行印發以爲

書院考課獎賞之用而余尤欲廣購全史經疏及諸有用之書儲藏院中俾有志實學者得資攷證而廣見聞然君旣行恐無有能爲之者矣

蜃江入海桐江接頻上江樓望斗魁

候選知縣張兆熊

五馬初來治道張省耕省斂兩忙忙此邦昔早稱鄒魯太守  
今尤邁謝王政必便民清利弊官惟造福進賢良下車未久  
多新治百廢俱興意未遑

華峯高聳出雲端新建名亭極大觀一片江山天外矚萬家  
煙火眼前看襟懷願與同憂樂經濟材能策治安豈第游觀

增勝景愛民心切恤民艱

願將福惠庇斯民資福宏開兩院新四面窗懸仁壽鏡一心  
佛證宰官身閒來禪寺參神妙每向民間問苦貧聞宴佳賓  
頻勸酒和風散作十分春

當日雙忠舊有祠飄搖風雨半傾欹重新隆構華山頂復振  
芳徽甌水湄百代英靈昭肝鬢五城官吏奉箴規我從異地  
來瞻仰風教維持衆所推

重修兩院舊祠壇膏火新添衆盡歡愛士不忘爲士日生才  
匪易育才難衡文巨眼風崇正立教深心道尙寬此後科名

應鵲起滿城桃李屬春官

重闢層臺爲育嬰端知撫字具深情二千石祿能捐盡數百  
家孩務養成鳥覆羊腓誰誕寘女羈男角並含生使君懷少  
恩彌至蔀屋流歡徧頌聲

正直臨民務養民凶荒預備念艱辛室家合計方千里菽粟  
宏籌累萬困保庶其循東魯訓濟飢重見宋臣仁從今詎患  
流離苦樂歲人含大地春

甌城羈跡已經年喜聽仁聲到處傳時雨甘流千里潤慈雲  
覆徧萬家煙民皆赤子深烏愛我附蒼生拜馬前異日巡方

留蔭遠棠陰樹樹綠遮天

署溫州府  
學教授 王樹榮

五馬重來閱二年海邦爭頌使君賢  
龔黃治績於今繼元白  
才名自昔傳桃李春風材廣育  
黍苗膏雨澤無偏甘棠此日  
留餘蔭會待碑銘德政鐫

杜老窮愁懷廣厦香山歸隱念民裘如  
公喜處得爲地當  
事先爲急務謀困積陳因虞歲患祠新報薦景儒修登臨更  
復名山蹟豈爲公餘事宴游

未須班伯號神明坐理雍容政自成  
杜絕夤緣持藻鑑破除

下



成見協輿情利源豈獨茶桑辨民隱都消雀鼠爭試問攀轅  
諸父老心歌腹詠自輸誠

酌水當年早勵清從教五邑播仁聲蒲鞭示辱知刑省蔀屋  
騰歡見政平經濟出來根學問通才端不負科名行春此去  
嚴陵道看取兒童竹馬迎

舉人 葉 俊

莫綰長亭楊柳絲使君鄭重別民時九山如斗瞻韓切

郡治有九

斗五馬臨岐借寇遲

士民愛公擬進省保  
留因格於例而止焉

方幸萬家霖雨

足其如一度歲星移漫言父老攀轅衆信有恩膏繫去思

兩載東甌治體崇實心實政莫如

公

重整中東書院及義學義塚嬰堂諸善舉

籌添經費

文章力挽衰頹氣

衡文首崇經術

習俗先除侈靡風

甌俗婚嫁奢侈坐筵

尤甚

公皆

拔薤有時成果決懸蒲終竟示寬宏

公決獄如流豪強

屏迹然亦不尚刑威

須知一事關心盡倉粟盈盈利不窮

建造府盈餘倉及義倉儲

備穀石

嚴陵舊政號稱神

同治丙寅俊抵嚴州謁謝房師李續石夫子其時兵燹之餘瘡痍滿目公墾荒儲

穀興學校建祠署百廢具舉稱神君焉

此去官程祇一旬明月不妨千里共慈

雲常覆兩家春

公前以剿辦樂清上匪來溫後又擢守嚴州由嚴移溫今又任嚴宦迹蓋拳拳兩地云

勤求民隱知荼苦

捐廉重設採訪局得男婦五誼篤交游抵百餘人照例請卹以彰節烈

可

下

酒醇何幸識荆酬夙願休休雅度倍情親

回憶當年始下車一函鴻寶賜傳書

公到任蒙以書經集  
句文賦易經卦名試帖

及兩浙宦游記畧見賜  
經術吏治窺見一斑

定知著作名山富旋覺心期白水如

行李僅裝清獻鶴宦情仍戀子陵魚

嚴州有子陵釣魚臺  
公重爲之建祠寅

僚我有師恩重憑仗東君暖氣嘘

房師李續石夫子  
向任嚴州府同知

優貢生儘先選用  
同知直隸州知州任振颺

泰岱薄青天仰止小培塿堂廟響洪鐘奚屑聽瓦缶卓哉

戴夫子禮經富二酉江左景才名甌東來作守伊昔下車時

歡聲溢節綬瘡痍兵燹區寬嚴難措手迨夫政教成賢良實

稱首笑比黃河清喜怒毫不苟瞻彼庭懸魚餽遺知不受關  
西迺同心清獻信僚友爲民雪覆盆東海無冤婦爲民免嗷  
鴻倉庾積紅朽寒峻亦歡顏廣厦千間有育嬰分俸錢方生  
祈黃耆教養兩自全召父與杜母風雨召和甘休徵從無咎  
所以連歲間黃雲覆南畝年稔人自安化民俗不莠材厯夜  
無聲荏蒲清淵藪此是大經濟豈徒榮印紐尙憶賓興年衡  
文瞻山斗鶚薦雖虛邀鴻恩卻自厚未舞羊公鶴璫璫呼負  
負朽木蒙重雕循循仍善誘自笑出山雲遲遲戀岫口蹉跎  
復蹉跎而公曰否否努力須及時欲行毋掣肘懷訓倍悚

惶千金思敝帚小草被春風尙思博升斗今公奉恩

綸催公五馬走我行未有期公鞭指嚴阜新都六邑民

雲霓望恐後甘棠昔留陰葱葱瞻道右指日餞行旌攀轅觀

童叟留公膏雨車酌公婪尾酒渺渺甌水波依依長亭

柳杜宇漫山唳驪歌急舷扣公稱古循良得公惜未久

門牆語豈私口碑鐫岫嶠裁詩譜風謠用以告我后

世襲雲  
騎尉 陳樹藩

昭代循良重神君政績成三年留治化萬事仗修明自守嚴  
江日先聽廉吏名魚租蠲一一黔首賴生生奈抱雲霓望難

杼飢渴情焚香看記畧引領盼來旌况昔兵戎際曾經斧鉞  
征冬風方蹙發賊勢正猖橫膽已民間落風聞大吏驚是誰  
能禦寇有客請長纓仗義公崇勇邁征敵莫撓湯溪移節  
使我邑見神兵策自籌帷幄軍知肅旆鉦旗旌纔雨沛號令  
已雷轟叢爾么麼伏公然海宇清寇戎如竹破婦豎盡心傾  
一自籌謀善兼知運量宏脅從憐逆黨招集撫流氓宥過千  
村活明刑萬獄平只緣深體恤彌復見真誠從此風聲著爭  
傳月旦評甘棠賦南國苗黍誦西京爭奈天恩重偏教  
宦迹更富春迎太守甌海別名卿遺愛知誰繼深恩到處賡

下

福星談道里樂府譜簫笙 公自鶯遷後民懷鵠度正姓名  
千戶識翦伐一心盟何幸珠還浦重覘國有楨一時傳邸報  
萬口動歡聲父老壺漿備兒童竹馬迎行旌飛遠道喜色滿  
重城計日剛初夏聞風共向榮令名羣逖聽官舍力經營自  
接檀車至爭知竹節貞海邦瞻越石 帝室驗梅羹果是

官箴肅從教治道亨魏公原羽翼長吉本瑤瓊化雨隨時至  
清風兩袖盈心心殷保赤默默善持衡駒影從分惜鳩工逐  
事精下車時正始執政事兼并廉肯輸清俸庖還減大烹懲  
奢明禮節分縣鎮強勅信自豚魚格庭無雀鼠爭文風徵院

課士學振庠黌典祀崇文武昭忠建廡楹貞賢香火續穀粟  
社倉羸廢墜因時舉功勳次第呈旣然勤養正猶復計全嬰  
幼穉知絃誦號呼免癸庚只聞風藹藹不見泣嗶嗶從此澆  
風革奚煩木鐸鳴 公還當政暇時尙覺心忤廢祀憐枯骨  
荒郊恤故塋園因思漏澤徑爲辟叢荆置榻遵遺制修祠葺  
舊疊鬼從免食餒民豈致心盲鵠式消頑鈍鳧趨任使令春  
臺懷德禮夏屋萃豪英化善覘風草刑清息二花村忘犬  
吠綠野課農耕邦已新如此天從降以禎人咸歌有豸時不  
待祈鯨風俗仍鄒魯年時協雨晴蓉臺花皎皎蓮幕月瑩瑩



却趁公餘際偏多逸趣萌大觀春覽睥二此晝聽鶯梵刹因  
生色林泉資勝行登臨雙足健踪跡一僧偵似此官堪愛伊  
誰念不縈感恩方刻骨飲餞又飛觥麥正雙歧熟帆懸一片  
輕東郊波隱隱南浦草菁菁那復駒維谷何時鹿食苹離情  
環碧水驪唱雜倉鷗治績碑千口行囊詩一簞春風何草草  
飛鳥亦嚶嚶枉作攀轅想徒將別酒盛惟吟八百字相送一  
千程

候選  
訓導 陳葆恩

天遣台垣下且甌廢興隆舉政優優噓枯廣庇千間厦衣德

羣叨十丈裘芟舍肯忘公奭去攀轅難爲寇恂留津亭父老  
爭羅拜敬把香薦列道周

使君原是出山霖清獻行滕只鶴琴治郡重修循吏傳恤孤  
不失大人心間閭慶協維魚夢暮夜廉垂卻鮪箴匪止文章  
能活國等身著作播儒林

億萬蒼生望若神口碑嘖嘖惻然仁福星曾蒞騶搖宇甘雨  
隨澆兵燹塵撫字心勞寬猛濟部民視比子孫親三年兩袖  
清風拂祿俸分霑獨耐貧

陽春有腳徧臚歡俗易風移挽倒瀾比戶絃歌懷雅化傾城

下

額手頌清官  
敝車羸馬仍儒素  
厚地高天鑒寸丹  
何幸睦州人  
厚福花驄移駐  
慰瞻韓

候選  
訓導 潘鏡墀

一輪皎日照甌東  
五邑人如在鏡中  
教本以寬兼濟  
猛政先立德  
次言功勤求民隱  
頑苗格感召  
時和滯穗豐  
從此海邦鄒魯地  
瓣香爭欲祝明公

才名江左擅清華  
經濟文章自一家  
郊外旌旗春視稼  
門前桃李手栽花  
籌儲民有耕三慶  
分俸人皆拔十誇  
計取頻年新德澤  
心歌腹詠徧桑麻

帝廷報最首廉明三載勤勞有政聲白傅大裘叨庇蔭杜陵  
廣廈費經營棠階晝永鳴琴地郇屋春深課織情更喜江山  
留勝蹟大觀亭下拜長生

飄然琴鶴大江潯生佛家家欲鑄金一路循聲碑在口三年  
治譜水盟心如春德澤留餘慕似水離情付別吟寄語睦州  
諸父老舊時王謝又重臨

歲貢  
生陳鏘

持節甌東報最良樗材仰荷立門牆三年膏雨歌郇黍

蒞任公

溫郡已

五邑醇風譜召棠

屬溫五邑皆仰公德

經學名家宏著作

初鏘下

謁時蒙示文賦兩稿俱集尚書因緣文字藝心香郡有中山東山書院公

復改設四賢祠義學皆延師課讀及陽春有腳來何暮得慰成都叔度望

玉壺冰澈證心盟琴鶴相隨適性情自古循良能本色從無

勤儉不清名鴻噉有託蒼生慰荒歉民皆感仰魚夢頻占

綠野耕公下車以來皆豐年百廢具修分鶴俸郡文武廟郡廟及雙忠祠存濟祠等處皆

廉公捐重修宦游兩浙遞仁聲

愧抱鳩安守舊林文章知遇感恩深無才枉藉春風力乙卯

科鄉試蒙公有志敢忘立雪心具大經綸皆學問願將師

訓作官箴何時得遂鵬搏望衣鉢相傳報好音

三錫

恩綸

丹詔宣重來觀察待經年萬家子女留

餘蔭

郡有嬰堂經費不足公捐廉籌欸補助

一覽江山話舊緣

華蓋山大觀亭一名江山一覽

亭爲名勝所傾圯已久公重建之

帝鑒臣心盟白水人懷治績對青天留侯

借寇慚無術甌海嚴陵方寸懸

貢生

戴汝榮

違

公何速見何遲

公去偏殷召杜思事不因循防坐廢

心維耿介絕無私風流王謝芳型繼廉靜龔黃政績追借寇  
未能添別恨驪歌欲唱早神馳

退衙一卷興徐徐循吏由來愛讀書與物不爭廉叔度活人

下

無算路溫舒珠還合浦心無愧鶴載行舟節自殊江左才名  
東浙政禮經家學裕居諸

劇是當時白樂天循聲卓卓共稱賢養民惠著蒲鞭政課士  
清分鶴俸錢四境瞻依民似子三年小住宦如仙知 公此  
去應留戀多少甘棠樹道邊

一麾遙指馬悠悠鹿郡桐江路正修彼地定興來暮頌此都  
同繫去思謳蒲帆叩送袁生佛竹馬重迎郭細侯願慰蒼生  
霖雨望旬宣指日到吾甌

副貢生候選  
直隸州判

張應燦

僻海民情幻蘭堂撫字

難頌聲三載遠

公蒞溫郡將近三載

風化五

封端

溫屬五邑近尙侈靡公下車以來盡革其習

振墜分清俸

郡城諸名勝暨書院嬰堂等處頽廢

已久皆捐廉倡修

懲貪免素餐

公屬員中有懷貪者皆叅免其官

居官無長物惟

有寸心丹

宣猷先教養治績邁龔黃實惠沾郇黍休風洽召棠清勤朝  
運璧心跡夜焚香從此嚴陵去升恒未可量

廩生江城

三年廉太守萬事慰斯民禮學家風紹絃歌化雨新

公增葺中山

書院及諸義塾多士厚蒙栽植

青焚香裊裊紅積粟陳陳

荒歉百姓感仰公建義倉以防

二

下



莫遂攀轅願仁車又富春

甘棠行處樹高蔭庇甌東萬口仁碑綠千門別淚紅裝輕船  
載石宦久袖藏風他日循良傳龔黃事與同

附貢  
生張應階

留不得是驪歌擁不住是花騶望公不行公竟趨公  
行何速民嘻吁攀轅截鐙踵相扶誠哉愚民何其愚有政在  
耳碑在口感公頌公心區區

公之來自渡口公之去向嚴阜送公行兮徧童叟童叟  
嬉嬉無諛詞萬口惟稱賢太守太守政惜未久匆匆駐節甫

三年忽被他邦奪而走此地無福彼何厚

君命難違空

搔首

憶公初下車奸豪斂跡民情舒有利必興弊必除公餘仍  
自愛讀書愛讀書樂于于二禮家傳富居諸循吏名儒兩擅  
譽守儒素甘淡泊食無兼味商熊魚儉以養廉言豈虛

憫公勞勤鞅掌仰公政在教養視民如子關痛癢求才  
若渴世無兩謂予不信請看今之書院與嬰堂有費之增力  
誰仗蒸蒸髦士嬉嬉童化雨慈雲人共仰其餘善舉不勝書  
義學義倉次第敝幸今繼守有賢侯推之廣之利永享

下

利永享亦

公恩

公無他好惟

治安

公心如白水

公政如幽蘭水潔愈可味蘭香久更存謂

公太嚴內則

寬謂

公之寬私孰干寬與嚴兮各相濟信爲古之循良官

公今行兮萬姓忙祖餞紛紛徧道旁道旁有柳折不得留

作太守之甘棠甘棠樹何葱葱恩蔭長垂東甌東 公今去

向桐江郡桐江甌海水相通願

公惠政遠相及朝夕傾耳

拜下風

生員

王任忠

我思潤州

戴太守來去清風盈兩袖下車取土採輶軒便

識文翁足教授治甌二載尙清廉冰雪自持一介嚴風節無  
慚二千石經術治術兩相兼汲黯臥閣常不出廉范五袴樂  
安逸民物豐盛民俗恬坐筵一禁知擢節爰修院宇課諸生  
繼建義倉待呼庚四賢雙忠祠並葺百廢具舉聿觀成當此  
三月春將暮無計留得東皇住忽讀太守留別詩離恨交縈  
海天樹蔀屋皆忘太守賢但聞公去思人聲囂馬聲驕太  
守旌旗出北郊太守之轅不可攀太守之德滿民間聃我忠  
貞祠修我城鄉廟除我華麗風明我詩書教積穀備民飢育  
嬰惠羣少餘澤及黃泉黃泉鬼亦笑噫吁嘻太守來山林花

木笑顏開太守去父老牽衣留不住離歌一曲過雲起從今  
化作嚴灘水聞道嚴灘花已妍東甌士民誰見憐薰風只送  
蒲帆去何日吹還下水船

生員 吳作瑩

一陣風吹祥雲開東甌忽然生佛來生佛來時治握要經緯  
天地具雋才清分鶴俸底多士多士濟濟沐栽培發政施仁  
先孤獨解民愠兮阜民財仰之如日瞻如雲來何遲兮去何  
速駕行不俟可奈何只有心香一瓣祝願爲 公僕夫爲  
公回馬首願爲 公從人爲 公進壽酒所恨未能侍講筵

終日惟聞循循誘幸何如之彼都人從此又覩慈父母歎息  
八千子弟在江東撫養誰復繼 公後依依不舍攀轅情未  
知 公亦曲諒否

生員  
胡保承

太守家風禮學崇笏林重疊羅璧琮使君壯歲綰青銅五馬  
來駐東海東浙水諸侯奉宗工甌江髦士欽仁風政治第一  
超黃龔教養直與王謝同西榭堂前啟繡櫳芙蓉村口朝勸  
農籽粒堅好熟長種其比如櫛崇如墉春風草暖馳花驄秋  
雨更深聞野舂捐廉建學恩惠隆神倉積粟誇盈豐中山一

麓當要衝開學養正作聖功子弟佩環藉磨礱大夫蘭芷香  
童蒙講堂樓閣樹橫縱董帷周榻紛相從蓮城處士聞鼓鐘  
攜囊負笈來鄰封潁川渤海稱協恭召父杜母追芳蹤邇來

天子達明聰翠輿頻出上陽宮 詔訪循良 錫賚洪

薦章交推上 九重課功報最錫彤弓良二千石人中龍

治績遠過北海邕榮遷指日羨飛翀握篆命主嚴陵中黔黎  
遐邇荷帡幪茆檐蔀屋獻研縱天和人慶歡無窮甌山矗矗  
水淙淙風輪大地歸陶鎔黃堂紫閣春意濃太平日月長矇  
矓海濱父老咸肅雝拜手稽首齊鞠躬頌聲載道美上公化

育生養出深衷長歌用祝東郡翁青珉百代銘勳庸

生員  
方興

麥風拂拂嫩晴天一曲驪歌奏管絃別有琴書供畫舫幾多  
膏雨沛連阡倉箱粟積陳陳久桃李花開處處妍知否嚴灘  
何日到候潮人立滿江煙

尺幅蒲帆挂曉風匆匆人在別離中招來舊伴舟棲鶴獻罷  
新詞技笑蟲一路福星懷子駿萬家生佛頌溫公重來此地  
知何日竹馬歡迎待小童

生員  
吳廷藻



熊車忽別鹿城東三載空攜兩袖風刪禮家聲留赤牒秉公

心跡格蒼穹文章大半根經籍

公著作多集尚書

民物頻年慶阜豐

公蒞任以來三載民豐物阜

尤幸中山開廣廈

郡城有中山書院賴公捐廉重葺

收將多

士答

宸聰

東甌萬口沐甘霖政績清勤世所欽宦轍幾經周兩浙

宦浙公

已近二十年循聲恰合卻千金亭修一覽游觀壯堂育羣嬰保艾

深郡有一覽亭育嬰堂皆已傾圯公倡捐重葺

此日攀轅諸士女願留芾舍憇棠

陰

生員 陳體芳

東甌自古稱名區淵源理學紹程朱而今幸有賢太守重新

祠宇重名儒

公重修四賢祠附祀諸賢三十人並捐廉置田以備春秋祭祀

况復育士宏

講舍中山東山院落修

公重修中東兩書院

人文從此欣蔚起大海

珊瑚鐵網收其餘善政難細數不獨積穀防民飢

公建府倉儲備穀

石惠普嬰孩廣厦庇澤及枯骨野無遺

公重修嬰堂添置屋宇並增置義塚山

地以備掩埋

公庭判事明如神日夕不遑無留牘

公於三八告期坐大堂收呈

原被告同時到堂即行判斷

寬以濟猛猛濟寬剔弊除奸紀綱肅大澤如

春春有腳軫民艱今恤民瘼杖鳩父老慶豐穰騎馬兒童相

雀躍唱到驪歌一曲傳攀轅遮道實悽然好官那得長留此

慰爾民情報九天掛帆欲別甌江去甌民去思嚴民喜古來  
仁風當奉揚袁韶人稱爲佛子潮未生兮波欲皺纜未解兮  
江之濱德政之歌歌未已海天長樂一犁春

生員 金兆嘉

一水滌洄繞錦城祥祿德政頌廉明篆分丹鳳家聲舊學辨

癡龍絕藝成

如漢之戴次仲宋之戴岷隱俱以經學名

安國重來文滄古少陵老

去律彌精

易經卦名試帖詩律亦極謹嚴

鬱林遺跡今猶

在兩袖清風一葉輕

昔曾幕府相機宜今又華堂悵別離白傅洛陽留惠澤

治郡公

諸善政次  
第興行  
鷹江上趣歸期燕臺駿骨千金市冀野龍枚一

顧遲  
丁卯決科予亦曾蒙賞拔  
政紀西華家有乘新詩合譜竹枝詞

童生  
潘福輝

東甌古稱人文藪理學淵源承師友更兼山水雄一方名勝

由來傳已久於今風俗漸澆漓競逐紛華失忠厚况復年來

構甲兵勝地凋殘難回首憶公蒞此未三年百廢俱修惟

恐後  
公甫下車卽首倡捐廉重建大觀亭修葺文武廟  
瘡

瘼至是復又安教養兼施良不苟  
孩賴公爲嬰堂籌加經費嬰

書院廣增膏伙優獎生童又續捐文成會以保全者甚多復爲  
悅增立義倉勸捐穀石更市義塚收埋羈櫬惠澤所敷民皆

向還爲末俗挽頽風百年口實重代割甌俗婚禮坐筵一節原係仍古舅姑以一

獻之禮享婦遺制並無男女混雜以及傳杯敬爵之事惟因

袁簡齋太史偶以豔語點綴資一時騷壇韻事遂遺百年口

實梁中丞浪迹續談辯之詳矣今公東甌記畧善政班班

復爲力白其誣並蒙嚴禁此舉廣免貽譏當世皆可傳循聲在耳碑在口君不見公之兩袖但清風暮夜

饋金知不受公心如水政如膏雨露濃分到處有公今

去此樹甘棠攀轅臥轍徧童叟驪歌初唱咽江流折盡青青

道旁柳挽公無計送公行望斷斜陽空袖手

十一齡  
童生 陳聯甲

榮膺五馬駐甌東叔度初來德政洪令甲隨時皆化雨由庚

無處不春風清分鶴俸成工易

郡有文武廟郡廟雙忠祠存濟祠及書院嬰堂義學皆

公捐廉重修

廉表魚庭勵節同父母臨州方是福頌聲已徧鹿城

中

三年報最煥宏模

公下車來已近三載

頌德歌功徧九衢懸鑑何殊

窺水鏡

公善政一秉至公苞苴悉絕

盟心只合住冰壺僻隅其被青莪化

公蒞溫郡振起文風

樂歲猶憐庚癸呼

公蒞任三年歲皆大熟復建義倉以防荒歉健吏

才華廉吏品恩銘口版衆情輸

此去嚴陵話夙因

公前守嚴州

舊車新政證傳薪棠陰仍復甘留

召黍雨重吟膏憶郇名下羣推生佛籍

歐民感公盛德皆供奉長生祿位天

狂徧是宦游人樗材曾荷栽培力

公課中山書院屢蒙拔取

度有金鉞

乞問津

手盥薔薇滴露幽佳章頌徧吟謳側身琴鶴供清賞舉目

江山勝舊游

華蓋山大觀亭一名江山一覽亭傾圯已久公重建之

童子何知能借寇

小民到處說留侯潮生孤嶼風帆速一樣廬江載土舟

童生

潘瑞壽

溫溫恭人淑慎其身民之多辟其命維新柔遠能邇靖其明神莫敢不服率土之濱

樂只君子令聞不已遐不作人濟濟多士夙夜在公之綱之

紀立我烝民猶來無止

集葩經句

廩生

鄭慶祥

惆悵長亭問何事催人逐逐况又是春風歸去悽涼滿目竹  
馬纔迎飛旆至蒲帆不管人心蹙向之江載出一船書去何  
速修廣厦儒林沐輸清俸倉箱足又赤嬰長養黃泉蒙福  
佛國重新梵宇色忠魂到處香煙復歎而今只把宦游編焚  
香讀

右調滿江紅

十三齡  
生員 陳壽寬

海國春融文翁化醇五袴歌纔奈兩歧麥秀瓜期已逮乍吟



來暮去思又催報道竹符新移建德眞箇陽春有腳哉甌江  
上潮聲聽緩去暫攔帆開 幼齡便炙丰裁記竹馬丁年一  
騎陪迺風清滿袖便噓小草水澄一鑑不染纖埃百廢具興  
兆民永賴此日攀轅意自哀況當此恰留春無計那不徘徊  
右調沁園春

江南財賦甲天下而蘇松嘉湖之漕尤重始於宋季之官田極乎明中葉之均官田於民田相沿至於今不少變蓋吾民之困於漕者六七百年矣同治二年江蘇大吏始請減蘇松太浮糧

上俞之並以杭嘉湖之漕不輕於蘇松太令浙撫一律議減會三郡次第收復全浙肅清乃設清賦局於省垣而檄候補知府戴君澗鄰主其事君嫻心壹志博考通籌而後得其要領於是定議減原額三十分之八爲米二十六萬六千七百餘石民困爲之大蘇猶沉疴之去其體而出之乎水深火熱

之中也豈非數百年來未有之盛事哉雖然漕額減矣而海  
運之津貼自若也每兌米一石須津貼銀四錢至七錢不等  
此其出諸官乎抑仍取諸民乎漕糧減其三之一而津貼又  
加其十之三則所謂減者安在乎君乃力排衆議慨然獨請  
於大府革除津貼而以漕項補之運費仍不至無著可謂規  
畫盡善其自記有云酌減漕糧我

朝之殊恩裁減津貼實余之創議蓋紀實也維時蘇省亦裁  
減津貼非浙爲之倡不及此顧江蘇州縣未建漕倉概收折  
色定價四千五百有奇夫米者農民所自有若必糶米易錢

而後完漕已不勝其煩擾況值穀賤傷農之歲幾以兩石而完一石民何以堪安得有心人如吾澗鄰者爲民請命而或本或折聽其自便乎此余讀澗鄰文而尤不能無慨於中者也君嘗宰桐鄉守嚴州皆有惠政及民民感之不忘先刻有兩浙宦遊記畧其先後政績悉具而減漕顛末實首列焉今別爲一卷名之曰杭嘉湖三府減漕記畧而乞序於余余謂減漕祛累朝之積弊成一代之大政江浙宜有專書

國史宜有記載固非君一家之私言也然始終其事而言之親切著明者宜莫如君他日史臣載筆其必以是編爲藍本

戶  
與而君亦因之不朽已

同治六年夏四月無錫秦紉業拜序

道光癸卯予與戴君澗鄰同舉於鄉君專習壁經哀然成集予始識君爲經生已而同官浙中得其晨夕乙卯鄉闈同司分校鎖院稍暇予以結習好爲韻語澗鄰辱和焉今秋闈倡和詩冊猶存予乃知君爲詩人庚申辛酉浙難再作肅清以來予與澗鄰各奉簡書回浙予守杭君守嚴人以君政績來告者盈於耳予又信君以經術節吏治前年予以疾去官往來江南北寄孥杭州君恒過從存問拳拳今年予主崇文講席澗鄰乃合秦觀察澹如王觀察芾南王觀察未彝宗太守湘文楊太守豫庭及予爲文酒之會選韻賦詩月一再舉予

與君交誼益摯君之詩文日益進聚首未幾而芾南權金衢  
嚴監司君權溫州守奉檄言別予與君交二十載方尋鷗問  
鷺於六橋三竺間今君旌麾東發予爲地方慶得良有司而  
轉惜予失良友也君瀕行出浙省減賦記畧以示並丐予序  
秦觀察先序之矣宣

上德通下情原君之用心樂君之成效讀者想見古良吏焉  
予既不文又挂冠而後前塵如夢方減賦之日正予攝糧儲  
印綬簿書雜沓過而輒忘宜乎頽廢不堪世用若澗鄰者以  
經生而報

國以詩人而蒞民經濟文章本無二理豐功既往茂績方來  
豈非浙人之幸哉是書之作得秦序而源流已悉予惟道兩  
人之交誼與人事之變遷以復於君君亦當有舊遊之感矣  
同治六年夏五月年愚弟薛時雨拜序



月

匹

杭嘉湖三府減漕記畧

潤州戴槃澗鄰氏著

杭嘉湖減漕總記

杭嘉湖漕糧分成量減記

裁海運津貼記

籌海運經費記

裁漕糧浮收記

裁南糧浮收記

徵收漕糧改定耗餘記

徵收漕糧改完本色記

嘉善嵌地空糧全行裁革記

海鹽田地完糧均爲一則記

附刻

杭嘉湖三府田地山蕩塘每畝原完米數及現減米數

杭嘉湖三府各州縣原徵漕南額數及現減定米數

杭嘉湖三府徵收漕米分畝細數並南糧未減原數

杭嘉湖三府提用漕項米欸並浙東八府行月折銀兩

細數

續刻

杭嘉湖徵收錢糧改定新章記

杭州各善舉籌辦經費記

--	--	--	--	--	--	--	--	--

杭嘉湖減漕總記

戴 槃

皇上御極之二年軫念民生特頒

恩詔因浙省疊遭兵燹小民流離失所勅浙江巡撫左將漕糧量予減免以示公溥之仁仰見我

聖朝殊恩特沛子惠元元至意維時杭嘉湖三府皆爲賊藪無從查辦自三年春以至八月郡城相繼收復浙省一律肅清余在籍方奉李中丞咨留鎮郡辦理團練善後各事宜是年常鎮各屬以至金陵省城亦均克復適左制軍檄調來浙委辦清賦減漕事務余到省後地方之賊氛雖靖而小民均

未復業各郡戶口流亡徵冊亦全行燬失特博採舊聞稽核遺卷並就平日之所見所知者一一爲大府陳之嘗考浙省賦重之由始於宋季賈似道之官田元代因而增之明初張士誠據姑蘇兼有嘉湖各郡明祖平張士誠遂因租籍收糧已而又括官田之糧均之民田層遞加增此浙西賦額獨重民困所以獨甚也又查杭嘉湖三府漕糧嘉湖爲重杭州次之重者每畝完糧由一斗以上至一斗九升以上不等其完數適掎於蘇松若杭屬則均不及一斗或有謂嘉湖之漕宜減而杭郡之漕旣輕似可不必議減大府許以爲可余曰不

然嘉湖之賦重於蘇松杭州之賦不輕於常鎮現蘇省之蘇松常鎮太四府一州均准議減杭嘉湖三府自應一律請減以溥

皇仁其中重者多減輕者少減惟有各就地方情形以區別之且三府漕額之重旣與蘇松太相等蘇松太議減三分之一杭嘉湖自應查照辦理大府俯允所請其時適制軍有閩省之行設局甫經兼旬余委充提調倉卒議詳一切要公隨時稟陳司道並與諸同官悉心籌畫期於周妥余查浙省應徵正耗漕米一百萬四百石零又南糧正耗及白糧春辦米



一十四萬六千九百二石零並請漕南兩項一併裁減以蘇民困大府疏上部議以江蘇所減漕糧蘇松常鎮大通盤核計係於三十分中減去八分請將杭嘉湖三府漕糧仿照江蘇辦法總以減三十分之八爲率惟南匠等米仍照舊不減以原徵額數計之應減米二十六萬六千七百六十五石零不可謂不多矣夫浙省漕賦之重與蘇省之漕賦甲於天下順治年間曾奉

諭旨凡故明仇怨地方或一處錢糧加重我朝並無仇怨何可踵行飭令各省詳察具奏於是江西袁瑞等府明初有陳

友諒抗師加糧倍重奏復舊額而浙省並未上請是以照額徵收以至於今待我

皇上宸衷獨斷以行之者也今起宋明浙西數百年之沉痾一旦窮極而變通之俾三郡人民霍然如釋重負豈非曠古未有之隆施哉余躬逢其盛並身親其事上以體

朝廷寬大之仁下以慰草野思蘇之望是爲記



杭嘉湖漕糧分成量減記

戴槃

減漕之法統減易而分減難人情畏難就易此普減之說所由來也余自江蘇來浙正蘇省辦理減漕之時或議統減或議分減執事者意見不合以至相持日久而不能定余到浙後卽主分成量減之說考前明宣德年間江蘇巡撫周忱奏減浮糧聲明額重者各減十分之三額輕者各減十分之二卽康熙年間江蘇藩司慕天顏奏減浮糧亦有一斗五升以下可不議減之語是按則議減厯有成規况浙省已明降諭旨查明漕糧稅則各按重輕分成量減與蘇省折衷議減

又復不同更何疑焉查杭嘉湖三府田畝上中下三則不等卽一州一縣之中上中下則亦甚懸殊欸目繁多欲其銖兩悉稱一律均平誠非易易聞此言者均有難色余謂治病當治其原去弊務去其甚浙省浮糧官田乃其原也額重者減數宜多以蘇其積困額輕者減數遞少以示其均平余乃先將杭嘉湖三郡每畝完數分二十等按等彙總以稽其數列爲田畝分則一冊又將杭嘉湖二十二州縣各按各縣科則之多寡分等酌定以考其成列爲各縣分則一冊悉心稽覈不厭繁瑣閱五月而事成白諸同官同官以爲可呈於大吏

大吏以爲然前奏每畝徵米一斗一升以上至一斗八九升者爲上則自六升以上至不及一斗一升者爲中則不及六升者爲下則余又恐科則之重輕懸殊減數多寡仍復不均又於上中下三則之中酌分五等上則之一斗六升至一斗九升酌減十分中之三分上則之一斗一升至一斗五升酌減十分中之二分五釐中則之一斗一升至一斗酌減十分中之二分中則之六升至八升酌減十分中之一分五釐六升以下之下則酌減十分中之一分上中兩則至升而止下則至合而止畸零細數不再瑣扣通籌合算適符三十成之八扣

減米二十六萬六千七百六十五石零輕重有別多寡咸霑  
雖不敢謂法良意美而條分縷晰綱舉目張余之心盡余之  
力亦云瘁矣大府疏上奉

特旨允行各按科則重輕分別上中下則一律永遠減免以  
紓民力自減之後杭州府額徵米十七萬八千一百八十九  
石零實減米二萬五千七百三十五石零嘉興府額徵米五  
十八萬七千四百七十五石零實減米十四萬五千四百十  
六石零湖州府額徵米三十八萬十四石零實減米九萬五  
千六百十三石零三郡之漕糧參差不一三郡之減數分別

不齊而三郡之生靈惠澤同霑

皇仁普遍輿情悅服司其事者與有榮焉聞之蘇省減漕除  
常鎮統減外蘇松太亦照浙省分成量減天下事折衷衆論  
惟求一是余知用法之貴得其當所謂先難而後獲也是爲

記





裁海運津貼記

戴槃

津貼之名何以始始於海運之年也從來河運之時旗丁向州縣索費各州縣勢不能不向糧戶浮收各省兌漕除給幫漕截外州縣津貼多寡不同乃有所謂幫費者自改海運以來幫費除而津貼之名起查浙省各幫從前貼費尙輕道光年間旗丁積累愈重需索愈繁長途挽運凡有用項皆欲取給於州縣是以幫費年增一年每兌米一石自數百文起至千餘文不等咸豐三年改歸海運較之河運節費不少然浙省辦理漕務仍按各州縣幫費之輕重酌提解省名曰津貼

自七錢有餘至四錢不等州縣雖無需索之苦而徵之於民者未嘗稍減蓋積弊猶未除也余到浙後大吏詢問漕務積弊余曰非裁津貼不可今奉

恩旨杭嘉湖三府準減漕糧如減漕而不減津貼則雖有減漕之名仍無減漕之實何則漕糧覈減卽仿照蘇省辦理亦不得過三分之一而浙省津貼之最重者時值錢米價平每石約須加耗米四五斗方敷津貼之用減漕必減津貼其理甚明而其言可以上達也考之浙省各州縣津貼多少不同漕糧其一百餘萬石多者十之七八少者十之三四統計擗

算每石約需銀六錢有奇以現在錢米俱貴時計之尙須加耗米三斗有餘以一百萬漕糧計之需銀六十萬兩合米三十數萬石價平之時更不止於此以外倉費猶欲取之於民民仍不堪其累若非大加裁減無以宣

朝廷之德澤而蘇草野之困苦也或曰津貼宜裁浙省已行之日久難保不格於部議而止或又曰津貼可減而不能不酌留以爲運費之資若盡行裁革萬一運費不足其又何法以籌之余謂有漕運卽有漕用其改海運之年卽應提用各州縣漕項之編入地丁項下者幾忘其所自有若此時再不

將津貼革除提用漕項久而行之必至將津貼作爲民間應完漕項勢欲革除而不可得不如趁此減漕之時並減津貼以爲久遠之謀且我

皇上深仁厚澤有加無已正供旣減斷不以額外之浮收重累吾民大府疏上部議竟如所請諸同官方信余言之不謬也其時議者有謂減漕宜並減錢糧者不知杭嘉湖三府錢糧共一百三十餘萬兩卽減去一成亦不過十餘萬兩又有謂減漕宜並減漕欸者不知徵漕一石總計止有漕欸七錢有奇卽照減額計數亦不過減銀十數萬兩皆不若津貼之

多也津貼減而其餘皆可不議減矣以現存漕額七十餘萬石仍需津貼銀四十餘萬兩今津貼全行裁汰綜計銀數查照例定米價每石作銀一兩五錢合計米數卽有二十六七萬石是照正額覈減之數又不啻加減一倍也夫酌減漕糧我

朝之殊恩裁減津貼實余之創議蘇省辦理減漕殷宗伯條陳其事亦欲仿照浙省裁減津貼部議允行江蘇漕糧多於浙省其津貼亦大於浙省今能照減非特杭嘉湖三郡之民人其受此惠卽蘇松常鎮太倉四府一州之民人亦羣霑實

惠矣余係江蘇部民同沐

皇恩願與熙熙攘攘之衆共頌我

國家億萬載有道之

鴻仁也是爲記

余在清賦局辦理減漕事宜適 殷譜經少宗伯出差由

閩回京路過武林住局數日 槃述及浙省辦理減漕請裁

津貼一事奉部議准江蘇可以仿照辦理後 殷宗伯入

告疏上允行蘇省海運津貼之裁實由於此又記

籌海運經費記

戴槃

從來有土此有財有財此有用財不患其不聚而患不能理  
用不患其不足而患不能籌漕用定而漕弊清是在持籌者  
之得其法也考之浙省漕米一百餘萬石漕項銀共七十三  
萬兩有奇其中如灰石永福淺貢等款係爲永倉之用永倉  
廢而此款已爲報部之款不能挪動然此不過銀數萬兩耳  
至於解通則有輕賚之款給軍則有漕截之款各衛幫丁行  
有行糧坐有月糧有行月糧之米有行月折之銀款日繁多  
厥數甚鉅今減去額米二十六萬六千七百六十餘石漕款



仍存其舊輕賚有餘漕截有餘行月糧銀米有餘下逮竹木  
席片等項亦靡不有餘前改海運之年行月糧之銀解庫而  
行月糧之米仍舊給幫所有漕用止提漕截一欸以外概不  
提用咸豐年間適各省軍興浙省辦理防務漕項作爲軍需  
仍由外用十數年來津貼取之於下而漕項並未供之於上  
也今幫丁旣裁而銀米兩欸均無所用况又有漕項之盈餘  
可以補運費之短絀乎現減存之行月等米旣不給幫自應  
變價除減額仍收米三萬四千二百五十四石查照經費食  
米定價每石作銀一兩五錢計銀五萬一千三百八十一兩

又查有南月米一項亦不給幫共收正米七千一百石每石照例作銀二兩計銀一萬四千二百兩此米欸之可籌者一也若銀欸則杭嘉湖三府行月並經費食米折徵項下共正耗銀一萬六千五百八十九兩零此米折之銀可籌者二也他如甯紹等入府本色月糧共正耗銀六萬三千三百七十三兩零又折色月糧共正耗銀七萬二千六百六十九兩零此銀欸之可籌者三也以上均屬漕糧項下可提之欸合之漕截一欸全數動用共正耗銀二十七萬九千四百八十兩零併計已得銀四十九萬七千六百九十餘兩以現存漕額

計之除給商船耗米無須運費照六十五萬石成數需銀五十二萬兩覈計運費所絀無幾此外仍有杭嘉湖三府未提用之行月折銀五萬四千二百兩零輕賚各項所餘之款約存銀五六萬兩併計共有十數萬兩可以備用書云有備無患其斯之謂與夫津貼永除可蘇億萬姓輸將之重困運費既定可爲數十年遵守之成規今提各款皆係河運年間給幫之款現河運易爲海運酌量籌抵仍係以漕辦漕於正款分毫未動萬一將來改行河運不獨漕項可以復舊且米數少而運費較輕米款減而漕款未動卽河運亦辦之裕如以

現減米數逐款細扣約可餘銀十七八萬兩若改河運一切漕項照舊支給以所餘之款添給幫費每石約計可加銀三錢此不待籌而用可足者也若夫幫弁養廉屯田津租兩項部議已準提用余思幫弁之裁而未盡歸營也不可無廉銀以養之幫丁之窮而無所至也不可無津租以濟之特請於大府仍留此兩項以待不時之需此余之所以體恤弁丁而爲之兼權熟計焉蓋運費定而用費不得不示以限制每漕一石酌定八錢之數內有漕截三錢四分六絲其餘則皆以所籌之款補之其中可減者減不可減者悉仍其舊至於運

三  
船水腳及滬津兩局用項考之海運全書可知大畧不復詳敘是爲記

按原奏內行月等米除減額外共應收米三萬四千二百五十四石零內有經費食米一欸現歸入漕糧項下註扣仍照額徵收不減籌抵海運經費欸內應加米價二千一百一十一石五斗零合銀三千一百六十七兩零記內仍列原奏銀米數目又記

裁漕糧浮收記

戴槃

漕糧之有浮收非一朝一夕之故也其所由來者漸矣始則河運之貼幫繼則海運之貼費津貼之多寡卽視幫費之輕重爲定嘉郡徵漕一石有津貼至七錢以上者其時錢價賤而銀價貴每石合錢一千四五百文之數其餘雖多寡不均較之給幫之費不甚懸殊是以耗米仍照舊徵收而浮收之米並未稍減也查津貼一項嘉郡之漕最多而嘉興之津貼最重杭湖兩郡其漕少於嘉興之一郡津貼較輕合之嘉郡統計擡算仍須銀六錢無一非取之於民此浮收之過甚所

自來也而所謂浮收者又不僅在津貼也州縣辦漕各用款林立添一事卽增一費興一利更多一弊又其甚者徵收漕糧例有漕餘缺分之肥瘠以漕糧之大小爲衡應酬之豐殺又以缺分之肥瘠爲準漕餘較豐應酬較厚積習相沿幾若朝廷之正供可緩餽遺之定數必不可裁此皆浮收之本原也今津貼旣減浮收已少而節費用革陋規正本清源之道於是乎在余在清賦局搜訪各州縣徵收舊款及各用項從嚴釐剔覈實撙節下除民累仍期上無官累除留其有餘以爲辦公之用各按各州縣分別裁減杭州府屬其減浮收米

六萬四千六百五十三石嘉興府屬共減浮收米二十八萬五千三百八十七石湖州府屬共減浮收米一十三萬六千八百六十六石漕之少者減數較少漕之多者減數較多其中裁減津貼實可減米三十餘萬石以外又減去各縣浮收米一十八萬六千餘石共計減去浮收米四十八萬六千九百餘石較之正額之減幾及兩倍余忝膺清賦局提調皆職分中所應爲之事敢不悉心籌畫與查浙省各縣浮收之弊民間完耗米自一二斗至八九斗不等最多者連正米不及兩石至於完折之戶初收每石已在五六千文遲則加多愈



遲則愈多當米價平時以錢計之有完至二三石者收米浮收折更浮前此未有津貼名目各縣收折猶未敢明示自有津貼而折色若爲正用幾忘民間所以供之於上者乃漕糧也歷來本折並收其中貴者賤者強者弱者本折不同完納不一或以米加耗或以錢合米約計其數統杭嘉湖三府而均之每正漕一石約收耗米七斗有餘今去其二而存其一其所以勤恤民隱者可不謂至乎夫官田均之民田此浙省之所以有浮糧也貼費加以用費此州縣之所以多浮收也正額旣減而浮糧之名可革費用旣裁而浮收之弊永除一

減於正額再減於津貼三減於倉用合計正賦及浮收之米  
減數共計已有七十五萬餘石較之現存漕南徵數將及一  
倍是減其半而留其半也我

皇上恩施叠沛掃數百年之積弊於崇朝拯億萬戶之民命  
於一舉有不歡欣鼓舞而輸將之恐後哉是爲記

--	--	--	--	--	--	--	--	--	--

117

減南糧浮收記

戴 槃

南米一欸科則內係與漕糧統徵在上雖有徵漕徵南之分在下並無完漕完南之別自漕糧中有徵不足數之米卽歸入南糧於夏間啟徵概完折色民之受困也完南更甚於完漕查杭嘉湖三府額徵南糧正耗米十三萬二千六百二十七石零杭府共徵米一萬二千二百一十石零嘉府共徵米八萬七千四百九十九石零湖府共徵米三萬二千九百十八石零內有兵米有匠米有給幫之月米匠米幫米解給均無定期惟兵米計口授食按月解給不容稍緩且解數較大

費用較多勢不能不取之於民此南糧浮收所由來也又查杭嘉湖三府南米與甯紹等府不同各府完米完折並無成例惟杭嘉湖各屬獨完折而不完米價之少者每石六七千價之多者每石八九千南糧之徵數愈大小民之受累愈甚小民之受累愈甚南糧之徵數愈短此各州縣所以有佃南之說也今欲我民樂於完納非減浮收不可漕糧之浮收旣減而南糧之浮收又烏容以不減余在清賦局稽查各縣舊收數目斟酌適中定解價以期持久留平餘以資辦公示以限制每石價錢不得過五千四百文之數杭湖兩府南糧居

三分中之一分其減浮收錢四萬八千六百四串嘉興一府南糧居三分中之二分其減浮收錢十九萬九千二百三十串杭湖二府完數本少而又有仁和錢塘於潛臨安昌化及武康安吉等縣向歸漕糧項下一併統徵是以減數獨少統其減浮收錢二十四萬七千八百餘串請與漕糧之浮收一併奏減務其大不遺其細節其流以清其源誰謂積重之難返哉則或者曰南糧之浮收旣減何不減之又減以期與完漕米價相埒小民之完南等於完漕豈不稱便不知漕米之貴賤無定南米價值不得不較重倘或漕米遇價貴之時得

與南米相平則糧戶必樂於完南而不樂於完漕勢必至於貽誤漕務人情避重就輕大抵如斯愚民亦何樂而不爲况完納漕南本無一定各戶可以完南卽可以完漕今稍昂其價值正所以使之避重而就輕也如於漕糧下一齊完納各州縣可無佃南之累雖取之於民者恐用之不足而以徵南之所餘者補之亦不患其不足矣同治四年冬間開漕聞百姓踴躍輸將其中卽有州縣於收漕之時並能收南完數不少此明證也夫如是而完南於漕之利可以興夫如是而透漕佃南之弊可以革至於南米中有零戶折徵米七千一百

十三石零每石例定價銀一兩六錢今照徵糧錢價核計合  
錢二千四百文各州縣統定一律不準稍有浮收此又因零  
戶困苦而不得不爲之格外體恤者也是爲記



--	--	--	--	--	--	--	--	--	--

71

徵收漕糧改定耗餘記

戴 槃

從來漕有定額有一定之漕卽有一定之用用之無名者不能不革用之有名者不能不留是在明定章程示以限制舊章之可率由者變而通之舊章之不可率由者改而更之章程定而漕政新焉查州縣辦漕有修倉搭篷紙張油燭之費有倉夫斗級漕記差役飯食之費有內河運米水腳交兌夫船耗米之費有交米書役在滬守候之費嘉湖兩府除改漕外其徵白糧米四萬三千四百六十三石零費用尤多採辦白糯米又有價值不敷之費春辦白粳又有耗折不敷之費一

切欸目繁瑣難以枚舉至於收漕交兌相隔一二月風暄搬轉虧折必甚不能不於正漕之外酌留經費然必先裁其所可裁革其所當革而後用項可定加耗亦因之而定一曰裁各衙門陋規州縣收漕之用向有陋規上至道府中則同寅幕友下及佐貳生監無一不取給於漕糧積習相仍年復一年若以爲自然之利今不論規禮之多寡概行裁減並請查照湖北江西舊案列欸載禁以垂久遠其餘各衙門應須辦公之費分別酌留庶浮費裁而上下因之而利也一曰革大小戶名目漕務積弊其不公者莫如大小戶之分自縉紳之

家以至刁生劣監好訟包攬之輩往往與州縣相持非特不能多收甚則升合不足於是攤之民戶惟所誅求漫無定限不惟紳與民不一律卽紳與紳亦不一律民與民亦不一律大率以小戶之浮收抵大戶之短價小戶不勝其苦其黠者又詭寄於大戶而大戶日多小戶日少其勢遂偏重焉而莫能挽回今不論大小戶一律均收不準稍有軒輊並請紳矜恃勢把持不遵定章一律執法相繩大戶之名能革小戶之累悉除庶穀祿平而公利因之而溥也夫收漕之弊旣革除淨盡而清漕之說又窒礙難行於是乎不能無酌加之議余

查兩江總督蔣奏明江蘇收漕章程酌定斛面不得過八折之數其法良其意美也余乃以此事上陳於大府請遵而行之定以正漕一石收耗米二斗五升下不至於病民上亦不至於病官斯爲適中之道歷來加尖剔斛諸弊一概禁絕同治四年開收冬漕各州縣照章辦理知所遵守悉臻妥善小民靡不樂於輸將余尤願司其事者行之日久而無弊也是爲記

徵收漕糧改完本色記

戴槃

漕糧爲

天庾正供由來久矣或爲祿糈之用或爲兵糧之資設官分職計口授食無不給以米欸是以各省歷來完漕定以米數非定以錢數其有改爲折價者則列入銀欸而以外皆米誠以

國家之儲於倉者米也小民之產於田者亦米也米之爲用大矣哉夫農民完米歲有常供而州縣勒折例所必禁近數十年來有漕州縣因費用日增米欸不能多加遂勒民間完

折其在米價昂貴之時以錢計米浮收固多於米至值穀賤傷農之歲有以一倍而完至數倍者民更不堪其累況米者農民所自有欲令糶米易錢其煩擾又何如乎浙省之收漕糧其本折並收也歷有年所河運之年因折色有干例禁猶未敢顯然明示自咸豐三年改海運以來漕項之外又加津貼開漕後運費急須解省勢不得不多收折色以爲津貼之費官欲收折民畏完折小戶因受累太甚而遁入於大戶仍舊完米此包漕之風所以甚開漕之案所由出也而其中最不平者完米之戶不肯完折完折之戶永不准完米戶名

分而本折亦分若有一定之例余聞各屬完折之糧戶竟有數十年來欲求完米一次而不可得者豈非不平之事哉夫州縣因有津貼尙欲多收折色不願以米易錢獨使小民以所有之米易所無之錢民亦何樂乎爲此天下事已所不欲勿施於人津貼旣裁州縣無解省之款除正供米款外所得耗餘以爲倉費無論民間尙有完折之戶足以供用即使全收本色而變價應用又何難焉余服官浙省知嘉郡收漕惟桐鄉完米完折悉聽民便前在任辦漕時深知其益今請於大府杭嘉湖三郡統定一律概完本色其有情願完折者按



照米價隨時收納折價之貴賤視米價之貴賤以爲定願完米者不得勒折願完折者亦不限以完米惟按照正耗米數酌收不準加價今年完折之戶至明年仍可完米今年完米之戶至明年亦可完折或本或折聽其自便本折旣同完納由此而均各州縣再欲如前次之勒折不可得已蓋小民雖愚未有不知避多就少者如折價與正耗米價不甚懸殊可以完折者不復完米倘米價賤而折價太貴小民則又無難以錢易米是在地方官好自爲之今章程業經奏定民知遵守官已奉行勿再蹈從前之積習而使小民完漕有倚重倚

輕之弊也至於杭屬之新城於潛昌化三縣漕糧歷來徵收折色官爲辦運悉仍其舊因新城等縣向無水路難以陸運是以民折官辦漕運全書久經載明小民諒亦無不周知惟照市價折徵不准增價則又與各州縣情形不同而仍遵照舊章辦理者也是爲記

--	--	--	--	--	--	--	--	--

四

嘉善嵌地空糧全行裁革記

戴槃

古者分疆列土各府州縣均各有其疆界釐然劃定不容紊亂無所謂嵌地也至於有土斯有財各縣田地山塘賦有一定有一畝之田始有一畝之糧更無所謂空糧也查前明嘉善與嘉興秀水合爲一縣至宣德年間以一縣之地析而爲三其中有地歸嘉秀而賦仍完於嘉善者有地歸嘉善而賦仍完於嘉秀者賦歸嘉秀而地又爲嘉秀之地賦歸嘉善而地又爲嘉善之地是以有嵌地之名余在桐鄉因石柁兩縣內有嵌地知之甚詳而辨之甚晰也夫石柁之兩縣嵌地猶

少而嘉秀善三縣之嵌地尤多地有嵌地因而田亦有嵌田  
嘉善之賦重於秀水並重於嘉興人情避重就輕比比皆然  
於是日久弊生而賦之重者漸遁入於賦輕之地奸民取巧  
隱匿有司隔縣推收田畝錯縱區圖別而冊籍無稽此糧之  
所由空也自嘉善有空糧而嘉善之紳民遂與嘉秀之紳民  
爲難康熙年間大訟頻興一而再再而三疊奉大憲飭查丈  
缺田二百三十九頃在嘉善紳民方以爲查丈清楚空糧可  
免乃厯十餘載而查丈缺額之數如故疆界卒未能清賦額  
各仍其舊所空之糧攤入各戶賠補以至於今是以嘉善完

漕原額每畝科則一斗九升以上因空糧又復加攤七合九勺九秒一撮獨完至二斗以上也余在清賦局辦理杭嘉湖三府減漕事宜並清理各州縣田畝而嘉善之紳民又與嘉秀之紳民聚訟欲翻前案余弔查各卷悉心察覈一時遽難更章且歷來相沿日久不如仍舊之爲愈惟空糧不可不革今嘉善紳士錢中允請於蔣方伯王觀察將嘉善空糧除減額外實徵米三千二百五十餘石糧銀三千九百六十餘兩一併裁革遂爲之力請於大府奏裁各完戶所攤空糧疏上允行從此百數十年之積累可除而億萬姓之重賦可免矣

是爲記

三

海鹽田地完糧均爲一則記

戴槃

國家之賦稅輕重不等各州縣田地山塘各有一則田之則與地不同地之則與山不同山之則又與塘不同不能使不一者而一之又焉能使不均者而均之哉且一州一縣之中田地山塘大端有四而其中欸目之繁有數等至十數等者田與地有別田與田又有別地與山有別地與地又有別山與塘有別山與山又有別科則不一是以完納不均今欲均平齊一似非所以體

國家按畝定則之至意也而海鹽之田地則不然查海鹽縣



田五千二百四十八頃一十六畝零每畝原額完米一斗七  
合五勺零地七百五十九頃四十七畝零每畝原額完米一  
斗五合五勺零爲數本不懸殊查閱舊志自乾隆年間卽照  
數攤勻劃一徵收迄今百餘年來民間因而仍之相安無事  
若欲遽行更正是啟小民之疑也余乃請於大府卽將海鹽  
田地均爲一則咨部定案以垂久遠誠以立法之可變者不  
妨於變通之也夫田地之完糧懸殊太遠斷不能均而一之  
賦之定也因田地之利而定焉利多者完數較重利少者完  
數較輕余前任桐鄉檢閱志書知桐鄉田地之均爲一則由

前明御史某某奏定蓋因地之出產肥於田田之出產並不  
如地田糧反多於地糧完納甚屬不均是以均而一之今均  
海鹽之田地亦猶是取法前人之意也夫嘉興府屬之田地  
皆係平壤無甚區別昔日之田今日有變爲地者昔日之地  
今日有變爲田者變遷不一而田地之數則一完納之糧亦  
一析而分仍可合而計海鹽一縣繼桐鄉而行之嘉郡各屬  
後之有欲均田地者亦未始不可遵照辦理也是爲記

[illegible]

杭嘉湖三府田地山蕩塘每畝原完米數及現減米數  
浙省杭嘉湖三府田地山蕩塘完米細數原奏分上中下三  
則一斗一升至一斗九升者爲上則六升以上至一斗一升  
者爲中則六升以下至不及一升者爲下則繼又於三則之  
中分爲五等一斗六升以上至一斗九升者減十分中之三  
分一斗一升以上至一斗五升者減十分中之二分五釐九  
升以上至一斗者減十分中之二分六升以上至八升者減  
十分中之一分五釐六升以下至不及一升者減十分中之  
一分上中兩則減至升而止下則減至合而止奇零細數不

再瑣扣今將杭嘉湖三府田地山蕩塘每畝原完米數現減米數開列於後奇零細數未曾扣減故未縷列以歸簡易俾閱者一覽周知焉

杭州府

仁和縣

田中則每畝原完米九升以上今減米一升八合

患田中則每畝原完米九升以上今減米一升八合

徵地中則每畝原完米六升以上今減米九合

患地中則每畝原完米六升以上今減米九合

徵蕩中則每畝原完米六升以上今減米九合

患蕩中則每畝原完米五升九合零今減米五合九勺

徵山下則每畝原完米九合零今減米九勺

患山下則每畝原完米八合零今減米八勺

錢塘縣

田中則每畝原完米六升以上今減米九合

學田中則每畝原完米六升以上今減米九合

基地中則每畝原完米六升以上今減米九合

地下則每畝原完米三升八合今減米三合八勺

竈田下則每畝原完米三升五合今減米三合五勺  
蕩下則每畝原完米三升二合今減米三合二勺  
山下則每畝原完米四合今減米四勺

海甯州

田中則每畝原完米七升以上今減米一升五勺  
地中則每畝原完米七升以上今減米一升五勺  
魚蕩中則每畝原完米七升以上今減米一升五勺  
南塘地下則每畝原完米四升九合零今減米四合九

勺

草蕩下則每畝原完米二升一合零今減米二合一勺  
忠臣地下則每畝原完米四合零今減米四勺  
山水淩例不科米

富陽縣

田下則每畝原完米二升九合零今減米二合九勺  
地下則每畝原完米一升一合零今減米一合一勺  
塘下則每畝原完米九合零今減米九勺  
山下則每畝原完米七勺不及一合者未減

餘杭縣



三  
七鄉田下則每畝原完米五升五合零今減米五合五  
勺

止戈田下則每畝原完米四升零今減米四合

地下則每畝原完米五合零今減米五勺

陞地下則每畝原完米五合零今減米五勺

蕩下則每畝原完米一合零今減米一勺

臨安縣

田中則每畝原完米七升以上今減米一升五勺

地山蕩例不科米

新城縣

田中則每畝原完米七升以上今減米一升五合

地山塘例不科米

於潛縣

田下則每畝原完米四升九合零今減米四合九勺

地下則每畝原完米一升六合零今減米一合六勺

塘下則每畝原完米一升零今減米一合

山下則每畝原完米一勺零不及一合者未減

昌化縣

田下則每畝原完米一升五合零今減米一合五勺

僧田下則每畝原完米一升五合零今減米一合五勺

僧地下則每畝原完米四合零今減米四勺

地下則每畝原完米二合零今減米二勺

山下則每畝原完米七勺不及一合者未減

塘例不科米

嘉興府

嘉興縣

田上則每畝原完米一斗三升以上今減米三升二合

五勺

地上則每畝原完米一斗三升以上今減米三升二合五勺

蕩地上則每畝原完米一斗一升以上今減米二升七合五勺

山下則每畝原完米四升八合零今減米四合八勺  
蕩下則每畝原完米四升八合零今減米四合八勺

秀水縣

草租田上則每畝原完米一斗八升以上今減米五升

四合

全田上則每畝原完米一斗六升以上今減米四升八合

零東田上則每畝原完米一斗五升以上今減米三升七合五勺

全地上則每畝原完米一斗五升以上今減米三升七合五勺

零西田上則每畝原完米一斗三升以上今減米三升二合五勺

伏三十都蕩田中則每畝原完米一斗以上今減米二

升

蕩田下則每畝原完米五升七合零今減米五合七勺

蕩灘下則每畝原完米四升六合零今減米四合六勺

蕩地下則每畝原完米三升八合今減米三合八勺

嘉善縣

田上則每畝原完米一斗九升以上今減米五升七合

地上則每畝原完米一斗九升以上今減米五升七合

蕩下則每畝原完米五升一合零今減米五合一勺

官灘例不科米

海鹽縣

田中則每畝原完米一斗以上今減米二升

地中則每畝原完米一斗以上今減米二升

山下則每畝原完米五升一合零今減米五合一勺

蕩下則每畝原完米五升一合零今減米五合一勺

平湖縣

田上則每畝原完米一斗四升以上今減米三升五合

清出田上則每畝原完米一斗四升以上今減米三升

五合

陸景賢田中則每畝原完米九升以上今減米一升八

合

西地中則每畝原完米九升以上今減米一升八合

東地中則每畝原完米七升以上今減米一升五勺

熟蕩下則每畝原完米四升二合零今減米四合二勺

清出山蕩下則每畝原完米三升九合零今減米三合

九勺

山蕩下則每畝原完米二升八合零今減米二合八勺



石門縣

田上則每畝原完米一斗二升以上今減米三升  
地上則每畝原完米一斗二升以上今減米三升

蕩地下則每畝原完米三升三合零今減米三合三勺  
蕩灘下則每畝原完米五升二合零今減米五合二勺

桐鄉縣

田中則每畝原完米一斗以上今減米二升

地中則每畝原完米一斗以上今減米二升

蕩地中則每畝原完米六升以上今減米九合

湖州府

山下則每畝原完米五升三合零今減米五合三勺  
蕩下則每畝原完米五升三合零今減米五合三勺

烏程縣

田上則每畝原完米一斗八升以上今減米五升四合  
地下則每畝原完米一升八合零今減米一合八勺  
山下則每畝原完米四合零今減米四勺  
蕩下則每畝原完米四合零今減米四勺

歸安縣

區田上則每畝原完米一斗七升以上今減米五升一

合

沙磧田中則每畝原完米六升以上今減米九合

圩田下則每畝原完米二升二合零今減米二合二勺

區地下則每畝原完米一升七合零今減米一合七勺

沙瘦區地下則每畝原完米七合零今減米七勺

山下則每畝原完米五合零今減米五勺

蕩下則每畝原完米八合零今減米八勺

長興縣

低澇田中則每畝原完米八升以上今減米一升二合  
功臣田中則每畝原完米八升以上今減米一升二合  
高阜田下則每畝原完米一升八合今減米一合八勺  
地下則每畝原完米四勺零今不減  
蕩下則每畝原完米五勺零今不減

山例不科米

德清縣

田上則每畝原完米一斗五升以上今減米三升七合

五勺

地中則每畝原完米七升以上今減米一升五合

蕩成田中則每畝原完米七升以上今減米一升五勺

山成田下則每畝原完米五升零今減米五合

稅地下則每畝原完米七合零今減米七勺

山改地下則每畝原完米四合零今減米四勺

山下則每畝原完米五合零今減米五勺

蕩下則每畝原完米四合零今減米四勺

基地例不科米

武康縣

田中則每畝原完米六升以上今減米九合

地下則每畝原完米三升三合零今減米三合三勺

蕩下則每畝原完米一升六合零今減米一合六勺

山下則每畝原完米五合零今減米五勺

安吉縣

長三區田下則每畝原完米四升四合零今減米四合

四勺

長三區地下則每畝原完米四升四合零今減米四合

四勺

長三區蕩下則每畝原完米四升二合零今減米四合

二勺

新陞田下則每畝原完米二升九合零今減米二合九

勺

新陞地下則每畝原完米二升二合零今減米二合二

勺

新陞蕩下則每畝原完米二升八合零今減米二合八

勺

安三區田下則每畝原完米一升九合零今減米一合

九勺

安三區地下則每畝原完米一升九合零今減米一合

九勺

安三區蕩下則每畝原完米一升九合零今減米一合

九勺





杭嘉湖三府各州縣原徵漕南額數及現減定米數

浙省杭嘉湖三府原完漕白正耗並南糧正耗米併計共一百一十三萬二千七百餘石又白糧加三春耗米一萬三千餘石併計一百一十四萬五千七百餘石今減除二十六萬六千七百餘石仍應完漕南米八十七萬九千餘石內漕糧分別核減實存正耗米七十三萬五千餘石外南糧正耗及白糧春耗米共一十四萬四千餘石照舊不減歸入漕糧內一齊扣減南糧本係統徵是以統扣漕糧項下遇有閏之年行月糧一欸應行加徵灰石一欸無閏之年又應減徵米數

因此有參差不齊之處今將舊徵漕糧原額及現減米數總額分各州縣開明計數至石而止奇零細數一概不列南米徵數卽附於漕糧徵數之後零戶折徵米亦在其中各縣至多者一萬七千餘石至少者不過二石多寡懸殊俾閱者一覽周知焉

杭州府

仁和縣

原徵漕米五萬三千四百一十七石零內扣減米九千四百七十石零現徵漕米四萬三千九百四十六石零

又徵南米一百八石零

錢塘縣

原徵漕米二萬二千六百八十二石零內扣減米二千八百九十四石零現徵漕米一萬九千七百八十七石零

又徵南米九十四石零

海甯州

原徵漕米五萬三千五百五十五石零內扣減米九千二百四十七石零現徵漕米四萬四千三百七十七石零

又徵南米一萬九百六十一石零

富陽縣

原徵漕米七千一百七十七石零內扣減米六百七十七石零現徵漕米六千四百九十九石零

又徵南米七百一十石零

餘杭縣

原徵漕米一萬一千七百二十四石零內扣減米一千二百八十一石零現徵漕米一萬四百四十二石零  
又徵南米一千四百二十一石零

臨安縣

原徵漕米六千九百七十二石零內扣減米一千三十一石零現徵漕米五千九百四十一石零

又徵南米八十二石零

新城縣

原徵漕米四千二百七十四石零內扣減米五百七十七石零現徵漕米三千六百九十六石零

南米向不編徵

於潛縣

原徵漕米三千九十七石零內扣減米三百二十七石  
零現徵漕米二千七百六十九石零

又徵南米二石零

昌化縣

原徵漕米二千一百三十二石零內扣減米二百二十  
六石零現徵漕米一千九百六石零

又徵南米二十四石零

嘉興府

嘉興縣

原徵漕米一十萬一千四百八十四石零內扣減米二萬八千三百五十一石零現徵漕米七萬三千一百三十三石零

又徵南米一萬六千一百二十四石零

秀水縣

原徵漕米八萬五千八百九十一石零內扣減米二萬八千五百九十三石零現徵漕米五萬七千二百九十八石零

又徵南米一萬四千二百十八石零



嘉善縣

原徵漕米九萬七千七百三十九石零內扣減米三萬  
四千四百五石零現徵漕米六萬三千三百三十三石  
零

又徵南米一萬七千九百九十六石零

海鹽縣

原徵漕米五萬四千六百三十八石零內扣減米一萬  
二千一百八十七石零現徵漕米四萬二千四百五十  
石零

又徵南米一萬三十六石零

平湖縣

原徵漕米五萬六千九百二石零內扣減米一萬六千五百四十二石零現徵漕米四萬三百五十九石零  
又徵南米一萬八百七十六石零

石門縣

原徵漕米五萬一千七百二十四石零內扣減米一萬四千九百四十一石零現徵漕米三萬六千七百八十二石零

又徵南米八千八百四十三石零

桐鄉縣

原徵漕米四萬三千九百六十八石零內扣減米一萬  
三百九十三石零現徵漕米三萬三千五百七十四石  
零

又徵南米七千九百五十七石零

湖州府

烏程縣

原徵漕米一十一萬四千四百七十五石零內扣減米

三萬八千九百六十石零現徵漕米七萬五千五百一十四石零

又徵南米一萬六千二百九十一石零

歸安縣

原徵漕米九萬八千八十五石零內扣減米三萬一千三百六十九石零現徵漕米六萬六千七百一十五石零

又徵南米九千六百四十八石零

長興縣

原徵漕米五萬四千九百四十石零內扣減米七千八百三十三石零現徵漕米四萬七千一百七石零  
又徵南米五千七十二石零

德清縣

原徵漕米五萬六千一百一十二石零內扣減米一萬五千四十二石零現徵漕米四萬一千六十九石零  
又徵南米一千一百一石零

武康縣

原徵漕米一萬二千三百九十石零內扣減米一千五百

九十二石零現徵漕米一萬七百一十七石零

又徵南米二百四十九石零

安吉縣

原徵漕米八千五百六十六石零內扣減米八百四十

五石零現徵漕米七千七百二十一石零

又徵南米五十三石零

[illegible]

杭嘉湖三府徵收漕米分款細數並南米未減原數

浙省原徵漕米一百萬四百六石零除減米二十六萬六千七百六十五石零應徵米七十三萬三千六百四十石零嗣奉部覆查開應扣昌化縣原豁米四十九石零無閏之年實徵米七十三萬三千五百九十石零卽逢有閏亦止多米一千五百十餘石零其中有正兌改兌改漕正米之外又有耗米其餘有白糧有行糧有月糧有經費食米各項名目不一嘉湖有白糧卽有經費食米而行月糧少於杭郡杭州無白糧而行月糧多於嘉湖所有白糧及經費食米照額不減應



減米數統於漕糧項下註扣至於漕米之外額徵南糧正耗米十三萬二千六百二十七石零內正米一石加耗米一斗一升一合一勺在民間則漕南統徵無所區別在州縣則漕南分解各有不同其中有兵米匠米給帮月米現仍舊未減今特將杭嘉湖三府漕米細數分別有閏無閏逐款開列並將徵收南米正耗額數附列於後俾閱者一覽周知焉

杭州府

額徵漕糧正兌有閏正米九萬七千五十七石零無閏  
正米九萬七千九十八石零內減米一萬五千九百

二十四石零

減數有閏無閏同

實徵有閏米八萬一千一百三十三石零無閏米

八萬一千一百七十四石零

有閏耗米三萬八千八百二十二石零無閏耗米三萬

八千八百三十九石零內減米六千三百六十九石

零

實徵有閏米三萬二千四百五十三石零無閏米

三萬二千四百七十石零

改兌有閏正米四千八百九十二石零無閏正米四千

八百九十四石零

有閏耗米一千九百五十六石零無閏耗米一千九百五十七石零

行糧本色米二千六百六十四石內減米四百三十九石零

實徵米二千二百二十五石零

月糧本色有閏米一萬九千六百四十石零無閏米一萬八千一百九石零內減米三千一石零

實徵有閏米一萬六千六百三十九石零無閏米

一萬五千一百八石零

內應扣昌化縣原豁米四十九石

以上有閏之年共米一十六萬五千三十一石零無閏  
之年共米一十六萬三千五百六十一石零內減米  
二萬五千七百三十三石零有閏應徵米一十三萬  
九千二百九十八石零無閏應徵米一十三萬七千  
八百二十八石零嗣奉部覆查開應扣昌化縣原豁  
米四十九石零

實徵有閏米一十三萬九千二百九十八石零無

閏米一十三萬七千七百七十九石零

外實徵南米一萬二千二百十一石零

正耗併計在內

嘉興府

額徵漕糧正兌有閏正米二十八萬三千七百二十四

石零無閏正米二十八萬三千八百四十三石零內

減米九萬三千七百三十六石零

減數有閏無閏同

實徵有閏米一十八萬九千九百八十八石零無

閏米一十九萬一百七石零

有閏耗米一十一萬三千四百八十九石零無閏耗米

一十一萬三千五百三十七石零內減米三萬七千

四百九十四石零

實徵有閏米七萬五千九百九十五石零無閏米

七萬六千四十三石零

改兌有閏正米一萬四千六百七十六石零無閏正米

一萬四千六百八十二石零

有閏耗米五千八百七十石零無閏耗米五千八百七

十三石零

改漕正米二萬二千五百六十六石零內減米七千四

百五十八石零

實徵米一萬五千一百八石零

耗米九千二十六石零內減米二千九百八十三石零

實徵米六千四十三石零

白糧正米一萬八千五百八十七石零

照數不減

耗米八千三百六十四石零

照數不減

行糧本色米八千七石內減米二千六百四十九石零

實徵米五千三百五十八石零

月糧本色有閏米三千二百四十九石零無閏米二千

九百九十九石零內減米一千九十四石零

實徵有閏米二千一百五十五石零無閏米一千

九百五十五石零

經費本色食米四千七百八十八石

係白糧項下用款照數不減

以上有閏之年共米四十九萬二千三百四十六石零

無閏之年共米四十九萬二千二百七十二石零內

減米一十四萬五千四百一十四石零

實徵有閏米三十四萬六千九百三十二石零無

閏米三十四萬六千八百五十八石零

外實徵南米八萬七千四百四十九石零

正耗併計在內



湖州府

額徵漕糧正兌有閏正米二十萬三千九百六十七石  
零無閏正米二十萬四千五十四石零內減米六萬  
二千五百七十八石零

減數有閏無閏同

實徵有閏米一十四萬一千三百八十九石零無  
閏米一十四萬一千四百七十六石零

有閏耗米八萬一千五百八十七石零無閏耗米八萬  
一千六百二十一石零內減米二萬五千三十一石  
零

實徵有閏米五萬六千五百五十六石零無閏米

五萬六千五百九十石零

改兌有閏正米九千七百八十四石零無閏正米九千七百八十八石零

有閏耗米三千九百一十三石零無閏耗米三千九百一十五石零

改漕正米一萬三千七百二十四石零內減米四千四百三十三石零

實徵米九千三百二十一石零

耗米五千四百八十九石零內減米一千七百六十一石零

實徵米三千七百二十八石零

白糧正米一萬一千三百八十七石零

照數不減

耗米五千一百二十四石零

照數不減

行糧本色米五千七百六石內減米一千七百四十四

石零

實徵米三千九百六十二石零

月糧本色米有閏米六百五十四石零無閏米六百四

石零內減米九十四石零

實徵有閏米五百六十石零無閏米五百十石零

經費本色食米三千一百五十石

係白糧項下用款照數不減

以上有閏之年其米三十四萬四千四百八十五石零

無閏之年其米三十四萬四千五百六十二石零內

減米九萬五千六百一十一石零

實徵有閏米二十四萬八千八百七十四石零無

閏米二十四萬八千九百五十一石零

外實徵南米三萬二千九百十八石零

正耗併計在內

[illegible]

杭嘉湖三府提用漕項米款並浙東八府行月折銀兩  
細數

浙省自裁津貼後以河運經費提作海運經費漕截一項以  
及行月折銀併計逢有閏之年計銀四十四萬二千七百五  
兩零逢無閏之年計銀四十三萬四千二百十五兩零又漕  
米變價銀五萬五千五百三兩零遇閏加增米石應變價銀  
二千七百四十五兩零以外給幫南米一款共七千一百石  
計變價銀一萬四千二百兩所有耗米併入正米並未另提  
統計合算已有銀五十餘萬兩現徵漕米除行月糧米款變

價外實計漕米止有六十八萬八千五百餘石內仍有給商船耗米無須運費現定運費每石作爲八錢以銀數核計米數有盈無絀今將杭嘉湖三府漕截行月折銀以及漕南米款變價銀數並浙東之甯紹八府行月折銀數分別有閏無閏開列俾閱者一覽周知焉

漕款項下

杭州府

額徵月本有閏正耗銀五百二十兩零無閏正耗銀四百七十八兩零

行糧不計閏正耗銀二千四十二兩零

漕截有閏正耗銀四萬四千二百二十兩零無閏正耗銀四萬四千二百三十九兩零

改兌漕截在內

嘉興府

額徵月本有閏正耗銀八十五兩無閏正耗銀七十八兩零

行糧不計閏正耗銀五千七百三十三兩零

漕截有閏正耗銀十三萬九千九百四十五兩零無閏

正耗銀十四萬兩零



內有改兌漕截並食米折銀車夫項下抵解白糧  
漕截

湖州府

額徵月本有閏正耗銀二千三百六兩零無閏正耗銀  
二千一百二十九兩零

行糧不計閏正耗銀四千二百十五兩零

漕截有閏正耗銀九萬九千二百二十六兩零無閏正  
耗銀九萬九千二百六十五兩零

內有改兌漕截並食米折銀車夫項下抵解白糧

漕截

寧波府

額徵月本有閏正耗銀八千一百八十七兩零無閏正  
耗銀七千十九兩零

月折有閏正耗銀六千六百八十七兩零無閏正耗銀  
六千五兩零

紹興府

額徵月本有閏正耗銀二萬一千六百十七兩零無閏  
正耗銀二萬五百六十五兩零

月折有閏正耗銀三萬一千九百五兩零無閏正耗銀  
三萬一千二百九十兩零

台州府

額徵月本有閏正耗銀一萬一千七百四十五兩零無  
閏正耗銀一萬八百九十八兩零

月折有閏正耗銀一萬四百四十八兩零無閏正耗銀  
九千九百七十一兩零

金華府

額徵月本有閏正耗銀一千七百九十三兩零無閏正

耗銀一千六百五十七兩零

月折有閏正耗銀二千七百六十六兩零無閏正耗銀  
二千七百二兩零

衢州府

額徵月本有閏正耗銀二千六百一兩零無閏正耗銀  
二千四百兩零

月折有閏正耗銀四千七百五十二兩零無閏正耗銀  
四千六百八十四兩零

嚴州府

額徵月本有閏正耗銀三千三百八十四兩零無閏正  
耗銀三千二十二兩零

月折有閏正耗銀一千八百八十八兩零無閏正耗銀  
一千六百七十六兩零

溫州府

額徵月本有閏正耗銀一萬五百六十一兩零無閏正  
耗銀九千七百四十六兩零

月折有閏正耗銀七千五百十七兩零無閏正耗銀七  
千四十二兩零

屯折有閏正耗銀一千四十五兩零無閏同

處州府

額徵月本有閏正耗銀八千八百二十五兩零無閏正  
耗銀八千六十四兩零

月折有閏正耗銀八千六百九十兩零無閏正耗銀八  
千二百五十兩零

米款變價項下

杭州府

漕米作銀一兩五錢南米作銀二兩

額徵行糧米二千二百二十四石零計銀三千三百三

十六兩零

月糧米一萬五千一百八石零計銀二萬二千六百六十二兩零又遇閏加徵米一千五百三十石零計銀二千二百九十五兩零

嘉興府

米價同前

額徵行糧米五千三百五十七石零計銀八千三十六兩零

月糧米一千九百五石零計銀二千八百五十八兩零又遇閏加徵米二百四十九石零計銀三百七十四

兩零

經費食米四千七百八十八石零計銀七千一百八十

二兩

又南月米四千九百七十石計銀九千九百四十兩

湖州府

米價同前

額徵行糧米三千九百六十一石零計銀五千九百四

十一兩零

月糧米五百九石零計銀七百六十三兩零又遇閏加

徵米五十石零計銀七十五兩零



經費食米三千一百五十石計銀四千七百二十五兩  
又南月米二千一百三十石計銀四千二百六十兩

徵收錢糧改定新章記

戴 槃

竊惟浙省各屬徵收錢糧按戶啟徵數多瑣屑小民折錢完納向歸各州縣買銀解庫由來已久清查以後攤捐各款爲數甚鉅兼之各州縣用費較繁勢不得不取之於民自道光年間銀價日貴錢價日賤而以錢易銀收數更不能不多每銀一兩有完至二千六七百文者迨至咸豐六年後錢價漸平各州縣因仍展轉日久相沿小民甚形苦累是不可不改而更之今當兵燹之餘民氣彫瘵若非明定章程無以釐宿弊而甦窮黎也查杭嘉湖三府錢糧共徵銀一百三十七萬

九百餘兩零余各按各屬情形悉心酌覈於愛民之中兼寓恤吏之道留其有餘以敷公用杭屬共徵銀三十八萬二千五百餘兩實減浮收錢六萬九千二百一十五串嘉屬共徵銀五十六萬七千餘兩實減浮收錢二十五萬五千六百三十八串湖屬共徵銀四十二萬一千三百餘兩實減浮收錢二十萬五千五百一十串統共減浮收錢五十三萬三千五百一十串於平日濫收濫取之數有所減無所增浮收刪而徵收之章程亦定夫如是而民困可以頓蘇州縣亦無所藉口從前攤捐陋規概行裁汰以後日用公費力求撙節查照各州縣

舊徵多寡每銀一兩徵耗一錢所有向來之傾鎔火工等費均在其內完銀完錢悉聽民使其有小民不願完銀者現照市價酌定仍準隨時長落各縣錢糧完至三萬兩以上者每兩酌定平餘錢三百數十文不等其錢糧止有一二萬兩者亦分別酌加祇期地方官勉敷辦公而止不致重爲民累此余通盤籌畫而爲之兼權熟計者也或謂大小戶之名立完漕如此完糧亦然又不可以不革余查杭嘉湖三府各州縣徵收糧銀有銀價劃一之處並無大小戶名目者卽有之亦與完漕時不同完納漕糧大戶多而小戶少完納錢糧小戶

多而大戶少卽如桐鄉徵銀五萬六千餘兩短戶止有五千餘兩不過十分中之一分今漕糧中之大小戶旣已禁革而各戶完糧則更無難於禁止蓋漕米定而漕政爲之一肅條銀定而條欵爲之縷分嗣後紳民固不得稍違定章州縣亦不準多取分文則數十年之銅弊一旦掃除於

國課民生兩有裨益豈非萬全之策哉道光年間曾奉諭旨直省官員養廉州縣祇此定數而差務捐攤日益加增有全行坐扣而祿入毫無者不得不取給於陋規於是箕歛溢取之風日甚民生困弊職此之由與其私以取之何如明

以與之著督撫逐一清查今浙省查辦此事應存者存應革者革期於久遠可行正明與之意也是爲記



籌辦杭省各善舉經費記

戴 槃

同治三年杭城收復後首先撫恤難民次及各善舉陸續籌辦井井有條濬湖而外如普濟堂同善堂育嬰堂皆次第興復又於錢江添設義渡以濟南北行人民皆稱便此乃從來未有之善舉籌款興辦用項繁多然皆取之於善後局而實則出自於釐捐局所提善舉經費項下之一款也余自丁卯春提調善後局務查閱各善舉用項除撫恤難民外每月實用錢三四千串余思捐局之未必久設而捐款之不可久恃也不得不爲之計長久適大府命王廉訪籌議此事囑余悉



心經理通盤籌畫余乃將省城各善舉定爲四大善舉所有  
普濟堂則收養殘廢散放月米清節堂棲流所皆在其中而  
義學附焉同善堂則給與醫藥施散棺木掩埋局牛痘局皆  
在其中而義學又附焉至於育嬰堂則專司其事外有宗文  
義塾爲世家子弟無力讀書而設遂一併興復以成斯舉分  
籌合計約需用錢二萬數千串乃爲之請於馬中丞將公項  
代民間所建房屋錢萬串歸入各堂收租按年可得租息錢  
千串又請於楊方伯將善舉經費項下存典生息錢四萬串  
分撥各堂按年可得利息錢四千串復請於高都轉將同治

四年稟定在運庫內每月提銀千兩作爲善舉用項至六年夏未付銀欸核計以銀易錢有三萬串再行提出分存各典生息按年可得利息錢三千串一年併計已積錢八千串各憲皆俯允所請又諭紳士勸令各商照舊抽釐米木箔三行每年共認提釐錢四千串實計錢一萬二千串合之運庫每月籌出銀千兩按年卽有銀一萬二千兩錢一萬二千串余乃酌定四大善舉按年約其用錢二萬四千串以銀合錢所餘之欸留爲各堂防用項之不足雖不敢謂籌畫周詳而有財有用入能敷出其所以爲善舉計者可不謂至與若夫錢

江之南北義渡每月需用錢千餘串按年計之用項浩大特請於王廉訪將南北船捐各項撥入義渡應用刪除捐款名目作爲善舉經費以垂久遠每年可得錢一萬數千串濬湖一項自省城收復後提錢二萬串備用至六年春止用贖錢四千餘串余又請於高都轉將運庫內所收海甯州田畝租息湊足錢六千串存息並將公項所造湖船二隻價值千串交於舟人一併收息每年可得錢七百串以爲濬湖之費遂由善後局詳請立案永遠遵行此皆各憲之恩施而余區區籌畫之深心諸紳士相與有成者也從此經費可期久遠而

善舉不至廢弛矣至堂內舊有出產查明歸公則尤望於各  
堂司事之認真清理以期經費日多一日也是爲記



傳稱不朽有三言最居後其實功德非言不傳古人著書立說非徒爭工字句之間將以維道立教垂詔將來故其言如布帛菽粟有裨實用而不爲無益之撰述居今日而言撰述非蹈襲古人之陳言卽不免弔詭其詞以取寵譁俗文雖瑰麗歸於無用若是乎今之撰述竟可廢乎非也吳江陸朗甫先生有言以今人之文言古人之所已言與其所不必言不若以今人之所欲言與其所必當言者著之爲文夫能爲今人之所欲言與其所必當言斯真今日有用之文上焉者爲闡明理道之學次則記載之辭言政之書是也記載之辭所

以志時事得失人類賢否使當時知所鑒戒後人有所誦稽  
故有用言政之書則必取見諸行事深切著明小之可治安  
州郡大之關國計民生者然後規畫條陳因時立議焉故尤  
有用 觀察戴澗鄰先生湛深經術前刊大著久播藝林今  
出示所撰宦遊記畧 言受而讀之則以記載之體寓言政之  
文於以知先生之殷懷利物而不爲無用之空言也方蒞浙  
時平樂清宰桐鄉循猷碩畫輿論翕然逮擢守嚴州則又興  
廢舉墜一切墾荒浚河興學建祠繕城修署諸政次第圖成  
則信乎本經飾治有古循吏風故先生之爲文亦有如古循

吏之爲治者勤勤懇懇惻惻無華其利物之懷發乎中滂沛乎毫牘不屑屑爭工字句間而曉暢剴切可使當時取法後世有稽焉其視蹈襲以爲工弔詭以求勝者固判然矣雖然由前之說固以見治安州郡之效而未盡先生利物之懷也及觀減漕諸記始知其規畫條陳因時立議固有關乎國計民生之大者在當先生之總理清賦局也因奉

恩詔有量予減免之旨以杭嘉湖三郡賦額獨重建議照江蘇準減分數力請於大府疏上報可以舊額計歲減二十六萬六千七百餘石之多此固出自



聖上殊恩亦足見大府暨先生爲民請命造福無涯之盛心  
矣夫浙西古爲揚州域厥土塗泥田本下下自吳越竊據南  
宋偏安民聚地闢遂爲財賦之藪然據明杜實桓上周忱書  
則知宋時田賦畝止一斗自景定中賈似道倡公田之法而  
嘉湖蘇松諸處於是多官田而民始困自明祖籍張氏私租  
簿以定賦於是畝至八斗而民重困自嘉靖中趙瀛均官田  
於民田於是并民田之畝稅五升者一切以三斗起徵而民  
愈困此邱文莊所以有古人言賦出天下江南居九以今觀  
之浙西又居兩浙十九之說也夫嘉湖蘇松同患賦重江蘇

經湯文正諸公奏減浮糧業經普釐舊額今又三分減一重  
沐恩施而浙西自南宋迄今八百年來始獲仰邀曠典而一  
切章程皆自先生改定非所稱仁人之言其利溥者歟昔程  
明道謂一命之士苟存心於愛物於人必有所濟然則今之  
牧民者安得盡如先生之殷懷利物出其明體達用之學以  
上希德功言三不朽之盛業尙何亂原之不可弭而吏治之  
不能登也乎

同治五年十月朔日仁和董慎言書後



杭嘉湖三府減漕奏稿

潤州戴槃澗鄰氏刊

左制軍奏杭嘉湖三府減漕稿

戶部議奏浙省減漕稿

左制軍會奏杭嘉湖三府酌減漕糧分數稿

馬中丞

杭嘉湖三府分則分等擬減米數清單

附

馬中丞奏籌抵海運經費稿

戶部議奏浙省籌運費稿

馬中丞奏減漕南浮收並禁革陋規稿

馬中丞奏豁免嘉善縣攤賠銀米稿

戶部奏覆嘉善縣丈缺田畝攤賠銀米豁免稿

左制軍奏杭嘉湖三府減漕稿

奏爲覆查杭嘉湖三屬徵收漕糧積弊並現籌覈減大概情形恭摺具

奏仰祈

聖鑒事竊臣欽奉同治二年六月初三日奉

上諭浙省疊遭兵燹小民流離失所殊堪軫念自應將該省漕糧量予減免以示公溥之仁著左宗棠通飭杭嘉湖三屬將實在應徵漕糧稅則詳細確查各按重輕分成量減奏明辦理欽此當因杭嘉湖三屬均未克復戶口流亡徵冊燬失

應俟地方肅清各就各地情形分別裁減於上年十二月覆奏在案本年八月湖州克復浙西一律肅清卽與布政司蔣益澧糧儲道楊昌濬商議於省城設立清賦總局悉心規畫期於周妥查杭嘉湖三府漕額之重與江蘇蘇松太等蘇松太旣議減三分之一則杭嘉湖亦宜仿照辦理就杭嘉湖三屬徵糧科則言之又以嘉湖爲重杭州次之就嘉湖兩府言之又以歸安烏程嘉善嘉興秀水爲最重平湖海鹽桐鄉石門德清次之長興武康各屬又次之杭屬臨安於潛昌化新城等縣山多田少故較之嘉湖糧賦固輕出產亦遠遜也嘗

攷杭嘉湖三屬賦重之由始於宋季賈似道之官田元代因而增之明初張士誠據姑蘇兼有嘉湖各郡明祖平張士誠遂用其租籍收糧已而又括官田之糧均之民田層遞加增民困獨甚我

朝定鼎以來康熙中免三分之一者一年全免者一年雍正六年又減嘉湖二府額賦十分之一計銀八萬一千餘兩中間偶逢水旱偏災無不隨時蠲緩

厚澤深仁有加無已故民力得以稍紓至乾隆嘉慶年間家給人足曾厯辦全漕道光癸未辛卯以後兩次大水民間元



氣大傷賦重之處未能全漕起運逐歲報災歉蠲緩頻仍然  
朝廷雖屢沛殊恩而小民未盡沾實惠蓋一縣之中花戶繁  
多災歉蠲免悉聽經書冊報世家大族豐收者亦能蠲緩編  
氓小戶被歉者尙或全徵且大戶僅完繳正額小戶更任意  
誅求遲至滿厰停收卽須改徵折色每石價至五六千文不  
等以小戶之浮收抵大戶之不足官吏徵收不善小民咨怨  
有詞故開漕之案往往因之而起然州縣浮收亦非能盡飽  
私橐也從前河運之時旗丁需索幫費如咸豐初年每兌漕  
一石除給報部漕截銀三錢四分六絲外尙須由州縣貼給

費錢千文幫費一日不清幫船一日不開州縣惟恐有誤運期不得不浮收以填谿壑而小民苦於苛斂弱者日受追呼桀者或從中持之因而竄入大戶以致小戶日少大戶日多旗丁之索費日重州縣之虧項日積民以完漕爲苛政官以辦漕爲畏途積弊相因官民交困咸豐二年改行海運每石連商船水腳及南北用款統計約需銀八錢有零曾奏准以給幫漕截抵支水腳其不敷之項按各州縣幫費重輕酌提解省津貼自七錢至四錢不等較河運之時已爲節省茲奉恩旨飭議覈減漕糧將舉數百年積困而紓之崇朝固三郡

羣黎所呼籲祈禱而不得者

臣

等躬逢

盛世若不能博訪利弊之所在而悉心參酌衷諸至當以規永久不獨無以副

朝廷曠古未有之

隆施亦何以慰草野久困思蘇之至意謹就現在漕務應行籌辦大概情形列爲四條敬爲我

皇上陳之一曰減正額浙省杭嘉湖三屬額漕白改漕南匠行月等米共一百一十餘萬石徵糧之則大小不同卽浮額之糧亦多寡不一現須分別量減自應先去浮額之甚以除

輕重不均之弊擬各按上中下賦則分別定數如每畝徵米一斗一升以上至一斗八九升者爲上則自六升以上至不及一斗一升者爲中則不及六升者爲下則按科則之重輕分別覈減總期於額徵數目酌減三分之一庶科則定而減數因之而均也一曰減浮收向來收漕加耗每石自一二斗至七八斗不等各視花戶貴賤強弱以定收數多寡今漕額旣經減定則浮收之歛豈可任其因仍惟州縣辦漕有修倉搭篷紙張油燭之費有倉夫斗級漕記差役飯食之費有內河運米交兌夫船耗米之費有交米書役守候之費一切用

款甚鉅且收漕交兌相隔一二月風晾搬轉虧折必多不能  
不於正漕之外酌留運費以資津貼應俟查明各州縣用項  
由外覈實辦理其向來加尖加價勒折諸弊自覈定之後概  
行裁革紳民一律均收不得再有大戶小戶之分庶穀祿平  
而公利因之而溥也一日籌運費浙省向辦海運每石需費  
約銀八錢除向給幫丁漕截銀三錢四分六絲抵支外尙不  
敷銀四錢五分零現正額浮收概行分別覈減自未便再由  
州縣議提津貼擬請將海運經費每石定以八錢爲額除支  
漕截外不敷之款另行籌足查浙漕如照統減三分之一每

年起運之米不過六十萬石上下漕截不另覈減計可餘銀  
十餘萬兩又節省給幫本折行月經費食米可得銀十二三  
萬兩又屯田租息及節省幫弁廉俸可得銀數萬兩統計將  
及三十萬兩足抵海運經費至所動正欸八錢按年將動用  
欸目據實奏結應請毋庸造冊報銷以歸簡便並不得逾八  
錢之數以示限制庶浮費裁而上下因之而利也一曰裁陋  
規向來州縣收漕一切陋規極爲繁雜此次覈定新章應令  
各州縣據實查明開摺呈送分別裁減庶弊竇清而漕政因  
之而肅也嗣後非實在旱潦不得再報災歉卽實在民欠亦

五  
不得再報墊完而近數十年相沿陋習亦可除矣至應減米數須查明科則方能覈定現地方新復冊籍無存已飭令各屬勒限趕造除白糧粳糯爲

天庾正供擬仍照額辦運擬減之數應統於漕糧項下註扣此外南糧行月匠糧等仍各歸各欸按成扣減至杭嘉湖三屬漕糧稅則輕重不同自應查照各縣科則量減再併計總數共減若干伏查各處被擾情形如杭屬之臨安新城於潛昌化湖屬之長興武康孝豐安吉皆路通徽甯受害尤烈室廬盡成灰燼田地久已荒蕪卽招集遺黎亦寥寥可數從前

道光年間及咸豐初年辦理漕運每屆皆不過七八十萬石及五六十萬石不等現擬照杭嘉湖全額統減三分之一如能辦理全漕與歷屆尚不相上下惟刻下三屬情形卽照減三分之一明歲新漕亦斷難如數徵納而欲爲經久之計又不能不通計

國賦盈虛以爲定則可否仰懇

皇太后

皇上天恩俯准將杭嘉湖漕糧統減三分之一明歲新漕酌量辦理之處出自



聖裁至海運經費每石向祇支銷漕截銀三錢四分六絲此次請以八錢作爲定額與部案不符惟查商船水腳及南北用費每石實需銀八錢其餘不敷之項皆係各縣津貼此時不將津貼一項裁革則雖有覈減之名仍未能得覈減之實故不得不據實瀝陳籲懇

聖恩准予漕截並行月屯租各項下照數動支庶漕弊可以盡革又通省地漕銀兩及浙東各屬南米或關係餉需或抵支兵食除正額毋庸查減其浮收之欸亦應分別裁革現甯波紹興溫州三府業已定章處州亦經減定其餘各屬應卽

一律覈減以昭公溥除俟查明各州縣酌減額數另行具奏外理合將議減杭嘉湖三屬漕糧大概情形恭摺具奏伏乞

皇太后

皇上聖鑒訓示施行再<sub>臣</sub>於十月二十四日交卸撫篆此摺

係由<sub>臣</sub>先行定稿是以護撫<sub>臣</sub>未經列銜合併聲明謹

奏

同治三年十月二十六日具

奏奉

旨戸部議奏欽此

戶部議奏浙省減漕稿

奏爲遵

旨議奏仰祈

聖鑒事閩浙總督左宗棠奏議減杭嘉湖三屬徵收漕糧大概情形一摺同治三年十二月初二日議政王軍機大臣奉旨戶部議奏欽此欽遵由內閣鈔出到部據原奏內稱杭嘉湖三府屬漕額之重與江蘇蘇松太等蘇松太旣議減三分之一則杭嘉湖亦宜仿照辦理就杭嘉湖三屬徵糧科則言之又以嘉湖爲重杭州次之就嘉湖兩府言之又以歸安烏

程嘉善嘉興秀水爲最重平湖海鹽桐鄉石門德清次之長興武康各屬又次之杭屬臨安於潛昌化新城等縣山多田少故較之嘉湖糧賦固輕出產亦遠遜也從前河運之時旗丁每兌漕米一石除給報部漕截銀三錢四分六絲外尙須由州縣貼給費錢積弊相因官民交困咸豐二年改行海運每石連商船水腳及南北用款統計約需銀八錢有零曾奏准以給幫漕截抵支水腳其不敷之項按各州縣幫費重輕酌報解省津貼自七錢至四錢不等較河運之時已爲節省茲奉

恩旨飭議覈減漕糧謹將現在漕務應行籌辦大概情形列  
爲四條等語臣等伏查同治二年六月間臣部議覆潘祖蔭  
丁壽昌等請減漕額摺內議令閩浙總督署浙江巡撫左宗  
棠通飭所屬將各府州縣實在應徵漕糧科則詳細確查各  
按重輕分成量減又於上年十一月間議覆沈秉成奏請分  
別覈減湖州府漕糧摺內議以科則之重輕當以每畝徵收  
若干爲斷請  
飭令浙江巡撫體察情形按畝議減其杭嘉二府應減銀米  
亦卽照此分別辦理均經奉

旨允准遵行在案茲據左宗棠奏陳浙省漕務積弊並現籌  
覈減大概情形

臣

等督飭司道悉心查覈如議減正額一條

據稱杭嘉湖三屬額徵漕白改漕南匠行月等米共一百一  
十餘萬石擬各按上中下賦則分別覈實如每畝徵米一斗  
一升以上至一斗八九升者爲上則自六升以上至不及一  
斗一升者爲中則不及六升者爲下則按科則之重輕分別  
覈減總期於額徵數目酌減三分之一等語

臣

等查各省漕

額以江蘇浙江爲最重而浙省漕額又不若蘇省之多

臣部

前議覈減蘇省漕糧請將蘇松太三屬統按原額酌減三分

之一常鎮兩屬照原額酌減十分之二統計蘇松常鎮太四府一州原額徵米一百六十六萬餘石除酌減外尙可得米一百二十餘萬石是江蘇一省統減米數係於三十分中減去八分浙省杭嘉湖三屬額徵漕白改漕正耗米九十五萬餘石通盤覈計原比蘇省較少該督請將該三屬漕額統減三分之一未免過多臣等公同商酌擬請將杭嘉湖三屬漕糧仿照江蘇辦法統按原額於三十分中減去八分至白糧粳糯爲

天庾正供應如該督所奏仍照原額辦運應減之數准其統



於漕糧項下註扣惟各屬賦則多寡不同應令該督撫確切查明如每畝徵米一斗一升以上至一斗八九升者爲上則自六升以上至不及一斗一升者爲中則不及六升者爲下則各按重輕分別多寡量爲覈減總以統計杭嘉湖三屬額漕量減三十分之八爲率仍將各該州縣上中下等田各若干畝舊額若干酌減若干迅速分晰開列奏報至行月二糧原係隨漕徵收自應隨漕遞減惟南匠米石額徵之數與支放之數不甚相懸並無贏餘應毋庸議減俾資辦公又該督議籌運費一條據稱浙省向辦海運每石需費約銀八錢除

向給幫丁漕截銀三錢四分六絲抵支外尙不敷銀四錢五分零現正額浮收概行分別覈減自未便再由州縣議提津貼擬請將海運經費每石定以八錢爲額除支漕截外不敷之欸另行籌足查浙漕如照統減三分之一每年起運之米不過六十萬石上下漕截一欸不另覈減計可餘銀十餘萬兩又節省給幫本折行月經費食米變價可得銀十二三萬兩又屯田租息及節省幫弁廉俸可得銀數萬兩統計將及三十餘萬兩足抵海運經費至所動正欸八錢按年將動用數目據實奏結應請毋庸造冊報銷並不得逾八錢之數以

示限制等語查浙省海運向只支銷漕截銀兩其不敷之數皆由州縣酌提津貼並不動用庫款是以准免報銷今該督以正額浮收概行覈減請將津貼一項裁革自係爲釐剔漕弊起見但所需運費總宜於漕務項下寬爲籌備俾敷應用不得於漕項之外再動別項正款至一切支銷如有應裁應減者亦宜分別裁減力求撙節不得卽以入錢作爲定額應仍令該督撫從長計議量入爲出將籌備款項及應用數目再行據實覆奏由臣部覈定後方准照數動支如有盈餘報部候撥准免造冊報銷以歸簡便至該督所議減浮收裁陋

規兩條據稱向來收漕加耗每石白一二斗至七八斗不等  
各視花戶貴賤強弱以定收數多寡今額漕旣經減定則浮  
收之款豈可任其因循惟州縣辦漕用款甚鉅虧折亦多不  
能不於正漕之外酌留運費以資津貼應俟查明各州縣用  
項由外覈實辦理其向來加尖加價勒折諸弊自覈定之後  
概行裁革紳民一律均收不得再有大小戶之分又稱向來  
州縣收漕一切陋規極爲繁雜此次覈定新章應令各州縣  
據實查明開摺呈送分別覈減各等語所奏實爲理漕要務  
應令該督撫督飭藩司糧道等將浮收陋規兩項覈實裁減

明定章程嗣後收漕州縣再有陽奉陰違復蹈從前惡習卽行嚴叅懲辦毋稍徇隱又原奏內稱從前道光年間及咸豐初年辦理漕運每屆皆不過七八十萬石及五六十萬石不等現擬照杭嘉湖全額統減三分之一如能辦理全漕與厯屆尙不相上下惟刻下三屬情形卽照減三分之一明歲新漕亦斷難如數徵納可否仰懇

天恩俯准將杭嘉湖漕糧統減三分之一明歲新漕再酌量辦理之處等語查杭嘉湖三屬漕糧臣部現議仿照江蘇辦法統按原額於三十分中酌減八分原爲經久之計通盤覈

算著爲定則惟各處被兵年久民力彫殘本屆新漕仍難責以按照減定之額如數全完應請

旨准令該督撫將本屆新漕體察情形酌量辦理嗣後非實在旱潦不得再報災歉卽實在民欠亦不得再報墊完總期有弊必除有犯必懲庶於

國計民生兩有裨益至所稱通省地漕銀兩及浙東各屬南米或關係餉需或抵支兵食除正額毋庸查減其浮收之欸亦應分別裁革現甯波紹興溫州三府業已定章處州亦經減定其餘各屬應卽一律覈減等語應如所奏辦理所有

臣

等遵議緣由理合恭摺覆奏伏乞

皇上聖鑒訓示遵行謹

奏

同治四年正月二十五日具

奏奉

旨依議欽此

左制軍馬中丞會奏杭嘉湖三府酌減漕糧分數稿

奏爲遵

旨查明杭嘉湖三府額徵漕糧酌定應減分數籲懇  
天恩准予減免以紓民力恭摺會

奏仰祈

聖鑒事案於同治二年六月初三日奉

上諭浙省疊遭兵燹小民流離失所殊堪軫念自應將該省  
漕糧量予減免以示公溥之仁著左宗棠通飭杭嘉湖三屬  
將實在應徵漕糧科則詳細確查各按重輕分成量減奏明



辦理欽此經

臣宗棠

於克復湖州之後飭令司道設立清賦

局悉心規畫妥爲籌辦並於上年十月間將該三屬漕糧積弊及籌辦大概情形據實詳細具

奏奉

旨戶部議奏欽此嗣准戶部議覆請將杭嘉湖三府漕糧仿照江蘇辦法統按原額於三十分中減去八分白糧粳糯准於漕糧項下註扣確查賦則各按重輕量爲覈減開列奏報其南匠米石收支相將並無贏餘毋庸議減所需運費宜於漕務項下寬爲籌備俾敷應用不得於漕項之外再動別項

正欸所有浮收陋規兩項覈實裁減明定章程嗣後收漕州縣再有陽奉陰違卽行嚴叅懲辦本屆新漕體察情形酌量辦理嗣後非實在旱潦不得再報災歉卽實在民欠亦不得再報墊完總期有弊必除有犯必懲庶於

國計民生兩有裨益等因具奏奉

旨依議欽此欽遵行文到浙

臣宗棠

先已統兵入閩

臣新貽

接奉後細繹部議爲

國恤民兼籌並顧而於公私用項亦均計及實係斟酌至當遵卽督飭司道確覈妥辦去後茲據總辦清賦局布政司蔣

益漕護糧道薛時雨詳稱查浙省額徵漕白改漕南匠行月等米共一百十四萬七千三百餘石內除南匠正耗米十三萬三千八百六十三石零白糧春辦米一萬三千三十九石零均不議減又白糧粳糯爲

天庾正供應照額辦運所減之數統於漕糧項下註扣外今按額徵漕白改漕正耗行月等米一百萬四百石零照部議三十分之八爲率覈計其應減米二十六萬六千七百六十五石零恪遵

諭旨分成量減各按各州縣田地山蕩科則重輕以分多寡

額重者減數宜多以蘇其積困額輕者減數遞少以示其均  
平仍於上中下三則之中再分五等如上則之一斗六升至  
一斗九升酌減十分中之三分上則之一斗一升至一斗五  
升酌減十分中之二分五釐中則之九升至一斗酌減十分  
中之二分中則之六升至八升酌減十分中之一分五釐六  
升以下之下則統減十分中之一分均按整數覈減畸零細  
數不再瑣扣通籌合算適符前數科則殊而重輕有別分數  
定而多寡同霑等情造冊詳請具

奏前來臣等伏查杭嘉湖三府屬糧額之重起於前代我

朝二百年來業已

殊恩疊沛減之又減而較之他郡糧數尙屬懸絕民以賦重爲苦官以費繁爲累在平時已有積重難返之勢當此大劫之餘戶口減少物力彫殘正窮極變通之會仰蒙

特旨飭令按則覈減以昭公溥凡在臣民莫名欽感現經臣

等督同司道確切覈計除正南匠等米外計三府原額漕白行月等米一百萬四百石零按三十分之八分其應酌減米二十六萬六千七百六十五石有奇本應遵照部議分縣照冊開報奈因兵燹之後各處冊籍蕩然無存現據各州縣開

送頃畝漕南等冊皆仿照殘佚志乘及遠年賦役全書所造雖大數不致舛錯而畸零尙難準確須俟各案查鈔齊全另行覈對分造細冊送部覈覆定案今就各州縣開送田地山蕩頃畝額數及分別擬減米數按照府總繕具清單恭呈御覽合無仰懇

天恩俯准如數減免以示溥仁抒數代相沿之民困實曠古未有之

鴻慈行見率土騰歡定必輸將恐後雖目前瘡痍未復尙難照減全徵而他日元氣漸充卽可概行起運嗣後非實遇凶

荒不准輕議蠲緩以實倉儲而重

國用至臣宗棠前議減浮收籌運費裁陋規均爲理漕要領

容臣等督飭司道將兌運經費徵收章程通盤籌畫悉心覈議另行

奏報總期上下交益歷久奉行以仰副

聖主惠愛黎元之至意所有查明杭嘉湖三府額徵漕糧應

減米數緣由謹會同漕運總督臣吳棠恭摺由驛具

奏伏乞

皇太后

皇上聖鑒訓示施行再此摺係  
臣新貽主稿合併陳明謹  
奏

謹將杭嘉湖三府屬田地山蕩塘灘原額暨分則分等擬減  
米數繕具府總清單恭呈

御覽

計開

杭州府仁錢等九州縣

額田二萬一百一十五頃三十四畝零

額地六千六百五十一頃三畝零



額山一萬二百二十六頃四十八畝零

額蕩塘一千五百八頃七十八畝零

以上共原徵米一十七萬八千一百八十九石五斗零今擬  
減米二萬五千七百三十五石四斗八升八合零除減實徵  
米一十五萬二千四百五十四石一升八合按則捧算合減  
十分中之一分四釐四毫四絲

嘉興府嘉秀等七縣

額田三萬六千八百四十二頃八十四畝零

額地一萬一千五十七頃

額山一百八十頃六十畝零

額蕩灘七百七十四頃一十九畝零

以上共原徵米五十八萬七千四百七十五石一斗零擬減  
米一十四萬五千四百一十六石三斗一合除減實徵米四  
十四萬二千五十八石七斗九升九合按則捧算合減十分  
中之二分四釐七毫五絲

湖州府程安等六縣 孝豐一縣向不科米請免覈減外

額田二萬九千二百二十一頃三十六畝零

額地五千四百二十九頃七十一畝零

額山七千三百九十四頃七十三畝零

額蕩二千五百三十七頃一畝零

以上共原徵米三十八萬一十四石八斗零擬減米九萬五千六百一十三石八斗四升三合零除減實徵米二十八萬四千四百石九斗五升七合按則揀算合減十分中之二分五釐一毫六絲

以上杭嘉湖三屬田地山蕩塘灘共一十三萬一千九百三十九頃一十三畝零原徵米一百一十四萬五千六百七十九石四斗零擬共減米二十六萬六千七百六十五石六斗

三升二合零統盤捧算合減十分中之二分三釐二毫八絲  
計實徵漕南等米八十七萬八千九百一十三石七斗六升  
八合除南糧及白糧舂耗兩欸不計外實計原額漕白行月  
食正耗米一百萬四百石五斗五升一合四勺擬減前數以  
符部議三十分之八分理合登明

杭嘉湖三府屬田地山蕩塘灘

上則科徵一斗六升至一斗九升以上

田地共三萬五十八頃七畝零原徵米四十三萬五千  
七百四十九石一斗四升零擬減米一十二萬九千一

百九十七石一斗二升四合

上則科徵一斗一升至一斗五升以上

田地共二萬二千八百三十頃七十三畝零原徵米三十一萬六千八百五十四石二斗一升九勺零擬減米七萬六千九百一石二斗九升

中則科徵九升至一斗以上

田地共一萬六千四百三十七頃九畝八分零原徵米一十六萬八百一十四石三斗零擬減米三萬五百九十石四斗七升八合

中則科徵六升至八升以上

田地共二萬三千一十九頃一十七畝原徵米一十七萬二千九百一十三石八斗二升三合八勺零擬減米二萬四千二百九十七石四斗八升三合

下則科徵不及一升至五升以上

田地山蕩塘灘共三萬九千五百九十四頃七畝零原徵米五萬九千三百四十七石九斗六升三合零擬減米五千七百七十九石二斗五升七合六勺

同治四年閏五月初一日具

奏奉

旨另有旨欽此閏五月十一日內閣奉

上諭前因浙江疊遭兵燹小民流離失所諭令左宗棠將杭嘉湖三屬應徵漕糧稅則查明各按重輕分成奏請減免嗣據奏請將杭嘉湖三屬漕糧酌量覈減經戶部議覆統按原額於三十分中減去八分業經降

旨允准茲據左宗棠馬新貽奏稱查明杭嘉湖三屬漕糧除南糧並白糧春耗兩款毋庸議減外杭州府九州縣額徵米十七萬八千一百八十九石零擬減米二萬五千七百三十

五石零嘉興府屬七縣額徵米五十八萬七千四百七十五石零擬減米十四萬五千四百十六石零湖州府屬除孝豐一縣向不科米應免覈減外其餘六縣額徵米三十八萬十四石零擬減米九萬五千六百十三石零通計杭嘉湖三屬共減米二十六萬六千七百六十五石零等語加恩著照所請各按科則重輕分別上中下則一律永遠減免以紓民力自此次減免之後該督撫務當督飭各該州縣按照奏定新章覈實徵收斷不准有浮收抑勒等弊至大戶包攬及一切陋規概行禁革以除積弊該督撫卽刊刻謄黃徧行曉諭務



使實惠及民用副朝廷軫念民艱之至意餘著照所議辦理  
該部知道單併發欽此清單同日奉

旨覽欽此

馬中丞奏籌抵海運經費稿

奏爲籌議海運經費請

旨飭部覈覆以便遵辦恭摺仰祈

聖鑒事竊照浙省杭嘉湖三府漕糧米石前奉

恩旨減免額徵經<sub>臣</sub>等查明應減成數奏奉

諭旨各按科則重輕分別上中下則一律永遠減免以紓民  
力等因欽此欽遵刊刻謄黃徧行曉諭在案所有議籌運費  
一欸先經督<sub>臣</sub>左宗棠具

奏接准部覆內開查浙省海運向只支銷漕截銀兩其不敷

三  
之數皆由州縣酌提津貼並不動用庫款是以准免報銷今  
該督以正額浮收概行覈減請將津貼一項裁革自係爲釐  
剔漕弊起見但所需運費總宜於漕務項下寬爲籌備俾敷  
應用不得於漕項之外再動別項正款至一切支銷如有應  
裁應減者亦宜分別裁減力求撙節不得卽以八錢作爲定  
額應令該督撫從長計議量入爲出將籌備款項及應用數  
目再行據實覆奏由臣部覈定後方准照數動支如有盈餘  
報部候撥准免造冊報銷以歸簡便等因當經轉飭藩司糧  
道通籌妥議詳辦去後茲據該司道等詳稱查浙西漕米除

照額覈減外其存正耗米七十萬三千餘石內海運新章每石給商船耗米八升以全漕起運而論應扣去米五萬餘石無須運費所有起運需費之米祇六十五萬餘石每石以八錢覈計約需銀五十二萬兩按漕截一欸例應給幫改行海運以後業經

奏准提解每石三錢四分六絲今擬全數動用計正銀二十六萬一千一百四十九兩零隨耗五千三百二十九兩零又白糧經費項下劃出漕截銀一萬三千一兩零此外自應遵照部議

奏准之案於漕糧項下酌提不敢動用別項正欸如減存之行月等米既不給幫自應變價擬照經費食米定價每石作銀一兩五錢現除減免外仍應其收米二萬四千二百五十四石零計銀五萬一千三百八十一兩零又查南月米一項此時亦不給幫其收正米七千一百石每石作銀二兩計銀一萬四千二百兩杭嘉湖三府行糧折徵項下共銀一萬一千四百五十二兩零隨耗五百三十八兩零月糧折徵項下共銀五百四十八兩零隨耗二十七兩零經費食米折徵項下共銀三千八百四十一兩零隨耗一百八十一兩零以及

甯紹等府本色月糧項下共銀五萬九千七百三十一兩零  
又耗三千六百四十二兩零折色月糧項下共銀六萬八千  
七百二十四兩零又耗三千九百四十五兩零合之漕截銀  
兩已共銀四十九萬七千六百八十九兩零以全漕起運之  
年約需銀五十二萬兩計之所絀無幾如有不敷之處再於  
漕務項下設法撥補所提各款皆係河運年間給幫之款今  
河運易爲海運酌量籌抵仍係以漕辦漕未動正款等情詳  
請具

奏前來

臣

等伏查從前海運經費不敷皆由各州縣酌提津

貼每石自七錢至四錢不等此項津貼銀兩該州縣豈能自捐廉俸無非取自民間雖欲不浮收而不可得矣今正額旣蒙

恩減浮收更應禁絕所有海運經費一項除動支漕截而外斷不可再令州縣津貼以致重累吾民惟有遵照部議於漕務項下寬爲籌備今據該司道等議請以減存行月南月各米分別變價以及杭嘉湖三府行月食米折徵之欸甯紹等府本折月糧等欸抵備海運經費以昔年給丁之項爲今日運米之用以公辦公不動別項正欸尙屬妥協此外漕務項

下尙有一二未提之欸萬一經費不敷亦可隨時撥補固不必另提正欸亦毋庸再議津貼也其部議每石運費不准拘定八錢之數查原奏所爲八錢者不過約計之詞以示限制之意原難作爲定額惟海運自滬及津僱船設局用費浩繁不得不寬爲籌備以免臨時掣肘

臣

等仍當督飭該司道等

力求撙節覈實支銷如有盈餘存於道庫聽候撥用並將動用數目按年

奏結免其造冊報銷以歸簡易至從前辦理河運用欸尤多將來如果復行以此八錢之欸作爲給幫之用是否相當尙



難懸揣今但就海運而言辦理似可裕如矣除覈減浮收裁革陋規等事現在確切訪查總期官民兩便以垂久遠俟覈定章程另行

奏報外謹將籌議海運經費緣由會同閩浙總督臣左宗棠

漕運總督臣吳棠合詞恭摺具

奏伏乞

皇太后

皇上聖鑒敕部覈覆施行謹

奏

同治四年八月初四日具

奏奉

旨戶部速議具奏欽此

[illegible]

戶部議奏浙省籌運費稿

奏爲遵

旨速議具奏事浙江巡撫馬新貽奏籌議海運經費一摺同治四年八月十五日軍機大臣奉

旨戶部速議具奏欽此欽遵於十六日交出到部據原奏內稱浙省杭嘉湖三府漕糧米石前奉

恩旨減免額徵經<sub>臣</sub>等查明應減成數奏奉

諭旨一律永遠減免欽遵刊刻謄黃徧行曉諭在案所有議

籌運費一欸先經督<sub>臣</sub>左宗棠具

奏接准部覆等因當經轉飭藩司糧道通籌妥議詳辦去後  
茲據該司道等詳稱查浙西漕米除照額覈減外共存正耗  
米七十萬三千餘石內海運新章每石給商船八升以全漕  
起運而論應扣去米五萬餘石無須運費所有起運需費之  
米祇六十五萬餘石每石以八錢覈計約需銀五十二萬兩  
按漕截一欸例應給幫改行海運以後業經奏准提解每石  
三錢四分六絲今擬全數動用計正銀二十六萬一千一百  
四十九兩零隨耗五千三百二十九兩零又白糧經費項下  
劃出漕截銀一萬三千一兩零此外自應遵照部議奏准之

案於漕糧項下酌提不敢動用別項正欸如減存之行月等米既不給幫自應變價擬照經費食米定價每石作銀一兩五錢現除減免外仍應共收米三萬四千二百五十四石零計銀五萬一千三百八十一兩零又查南月米一項此時亦不給幫共收正米七千一百石每石作銀二兩計銀一萬四千二百兩杭嘉湖三府行糧折徵項下共銀一萬一千四百五十二兩零隨耗五百三十八兩零月糧折徵項下共銀五百四十八兩零隨耗二十七兩零經費食米折徵項下共銀三千八百四十一兩零隨耗一百八十一兩零以及甯紹等

府本色月糧項下共銀五萬九千七百三十一兩零又耗三千六百四十二兩零折色月糧項下共銀六萬八千七百二十四兩零又耗三千九百四十五兩零合之漕截銀兩已共銀四十九萬七千六百八十九兩零以全漕起運之年約需銀五十二萬兩計之所絀無幾如有不敷之處再於漕務項下設法撥補等情伏查從前海運經費不敷之處皆由各州縣酌提津貼每石自七錢至四錢不等此項津貼銀兩該州縣豈能自捐廉俸無非取自民間今正額旣蒙恩減淨收更應禁絕所有海運經費一項除動支漕截而外

斷不可再令州縣津貼以致重累吾民今據該司道等擬請以昔年給丁之項爲今日運米之用以公濟公不動別項正欸此外漕務項下尙有一二未提之欸萬一經費不敷亦可隨時撥補固不必另提正欸亦毋庸再議津貼也其部議每石運費不准拘定八錢之數查原奏所謂八錢者不過約計之詞以示限制之意原難作爲定額惟海運自滬及津僱船設局用欸浩繁不得不寬爲籌備以免臨時掣肘臣等仍督飭該司道等力求撙節覈實支銷如有盈餘存於道庫聽候撥用並將動用數目按年奏結免其造冊報銷以歸簡易除



覈減浮收裁革陋規等事俟覈定章程另行奏報外謹將籌  
議海運經費緣由具奏等語臣等伏查浙江漕糧自行海運  
以來除將漕截銀兩抵作運費外不敷之數另由州縣酌提  
津貼上年督臣左宗棠奏杭嘉湖三屬收漕積弊摺內請革  
除津貼另籌運費實爲漕務正本清源之論經臣部議令量  
入爲出從長計議去後茲據撫臣馬新貽奏稱據藩司糧道  
詳稱浙西漕米減存正耗米七十餘萬石除支海運商船耗  
米外所有起運須費之米每石以八錢覈計約需運費銀五  
十餘萬兩以額徵漕截正耗銀兩合之減存行月南月各米

分別變價銀兩及杭嘉湖等府行月食米折徵三欸甯紹等府本折月糧等欸共銀四十九萬七千餘兩全漕起運如有不敷再於漕務項下撥補等語查津貼旣永遠革除運費必寬爲籌備該撫等請將昔年給丁之項爲今日運米之資以漕辦漕並不動用別項辦法尙爲妥洽其漕截一欸已據該撫另片奏准毋庸覈減應卽准其照舊徵收抵充運費此外議提各項均請准如所奏辦理惟向來該省辦漕祇准動用漕截現在議增之欸幾至一倍有餘原恐各州縣藉口津貼重累閭閻爲此破格之舉自此次明定章程後辦運旣無虞

掣肘紳矜更無可挾持該督撫大吏務宜嚴飭所屬照例徵收永禁津貼名目倘有仍前積習浮勒絲毫者卽行嚴叅究辦至漕項各欸不在此次議提之列者尙多應令該撫照例冊報仍於每年奏報起運米數摺內應徵漕項欸目若干已動銀米若干實存銀米若干逐一隨摺聲明不得籠統開報致滋弊混其一切運費亦應力求撙節不得以每石八錢卽爲開銷定額所有動支之欸仍照案免其報銷以歸簡易如有盈餘報部候撥再左宗棠前奏減浮收裁陋規兩條尤爲理漕要務現在旣增加運費倘中飽仍未盡除殊負

朝廷破格恤民之至意應由該督撫訪查確實妥議章程趕緊奏明辦理以清積弊而垂久遠所有覈覆籌議海運經費緣由理合恭摺具

奏伏乞

皇上聖鑒謹

奏

同治四年八月二十三日具

奉本日奉

旨依議欽此

[illegible]

馬中丞奏減漕南浮收並禁革陋規稿

奏爲覈減漕南浮收禁革陋規以肅漕政而蘇民困恭摺仰祈

聖鑒事竊照浙省正漕分成覈減業奉

恩准嗣遵部議以漕項籌抵運費復經

臣具

奏覆准在案漕額旣減運費亦籌軫恤民艱有加無已而額外浮收若不痛加裁汰覈實酌留仍無以蘇民困查從前浮收之由始則河運之貼幫繼則海運之貼費浙省自改辦海運以來津貼之多寡卽視幫費之輕重爲定每運漕米一石

自三錢至七錢不等統算約計五錢有奇以銀合米每石須  
加米三斗以上以全漕九十五萬石計之約計收米三十餘  
萬石方敷海運津貼之費加以州縣辦漕用欸名目紛繁內  
有紳矜大戶正賦之外顆粒不加甚至有把持包攬等事勢  
不能不取盈於鄉曲之小戶以爲挹茲注彼之謀其中本折  
並收或以米加耗或以錢合米大小戶長短不等最重之戶  
正漕一石竟有完米至一石七斗以上者此完漕之不均浮  
收之所自來也臣與藩司糧道訪查各州縣徵收漕南舊規  
從嚴釐剔除酌留耗餘以爲辦公之用照現改新章徵收計

杭州府屬共可減浮收米六萬四千六百五十三石嘉興府屬共可減浮收米二十八萬五千三百八十七石湖州府屬共可減浮收米一十三萬六千八百六十六石三府共減去浮收米四十八萬六千餘石又漕南統徵分解米欸向以徵贖漕米歸南多係疲玩小戶歷來折錢完納亦有浮收今一併覈減杭嘉湖三府南米共可減浮收錢二十四萬七千餘串此從前漕南收數過多現擬覈減之大概情形也所有原奏內州縣辦漕如修整倉厰書役辛工剝兌守候等費皆屬萬不可省之用並有漕倉剝船各處折耗爲數亦多現在酌



留耗餘僅令勉數辦公從前一切陋規浮費概行裁汰將留  
裁各欸目造冊存案並明白曉示勒石永禁漕糧概完本色  
紳民一律徵收不得再有大小戶名目其有情願完折者按  
照市上米價隨時收納悉聽民便至杭屬之新城於潛昌化  
等縣完納漕糧向收折色官爲辦運應仍照舊辦理按照市  
價徵收如敢仍蹈從前勒折浮收一經發覺嚴叅治罪惟大  
戶向完漕米並不加耗此次改定新章酌留漕用旣云紳民  
一律自不得再分軒輊恐各大戶仍以從前完數藉口不肯  
加耗起而與地方官爲難一縣之中大戶居其半若小戶有

耗大戶無耗必致復事浮收否則不敷漕用於漕務新章大有妨礙嗣後倘有紳矜恃勢把持仍前包攬短交自應一併從嚴叅辦嗣據該司道具詳前來臣覆覈無異應俟收漕時嚴督州縣正己爲先除酌留耗餘外不准顆粒浮收仍沿積習庶民心悅服照章樂輸至大小衙門一應陋規等項概行禁革如敢違犯官叅吏處以杜弊源而肅漕政臣謹會同閩浙督臣左宗棠恭摺具

奏伏乞

皇太后

皇上聖鑒謹

奏

同治四年九月二十八日具

奏奉

旨另有旨欽此十月初九日內閣奉

上諭馬新貽奏覈減南漕浮收禁革陋規以肅漕政一摺浙省正漕前經降旨分成覈減並准部議以漕項籌抵運費皆所以軫恤民艱茲據馬新貽奏稱請將額外浮收痛加裁汰覈實酌留耗餘辦公以蘇民困計杭州府屬共可減浮收米

六萬四千六百餘石嘉興府屬共可減浮收米二十八萬五千餘石湖州府屬共可減浮收米十三萬六千八百餘石杭嘉湖三府南米共可減浮收折色錢二十四萬七千餘串從前一切陋規概行裁汰各等語卽著照所請將留裁各款目造冊存案並著該撫等明白曉示勒石永禁漕糧概完本色其有情願完折者按照市價收納悉聽民便至杭屬之新城於潛昌化等縣漕糧向收折色官爲辦運仍著照舊辦理按照市價徵收倘有不肖州縣仍敢蹈從前勒折浮收陋習卽著該督撫嚴叅治罪至所稱浙省大戶完漕並不加耗甚至

把持包攬等弊經此次改定新章之後紳民一律徵收不准  
有大小戶名目再分軒輊倘有紳矜等恃勢把持仍前包攬  
短交著一併從嚴叅辦餘著照所議辦理欽此

馬中丞奏豁免嘉善縣攤賠銀米稿

奏爲查明嘉善縣從前丈缺田地攤賠銀米籲懇

鴻慈准予豁免以甦民困恭摺具

奏仰祈

聖鑒事據嘉興府屬之嘉善縣傅斯懌轉據閭邑紳民呈稱  
於前明宣德五年分嘉興縣之思賢等六鄉爲嘉善計區二  
十計額田六十萬一千三百一十六畝有奇因與嘉興秀水  
二縣壤地相接故善境嵌有興秀田畝區圖雖別冊籍無稽  
萬厯十年善令於是延創互推之法康熙十年善令莫大勳

有查丈之舉而查丈卒未能清賦額各仍其舊至康熙二十八年紹興府通判吳家瑜按畝清丈計虧缺田二百三十九頃所有丈缺田畝應徵銀米經前任巡撫張

題請於丈實數內按畝加增均攤補額四十一年奉部飭查四十二年又委杭州府同知陳忱旦復行丈量四十三年前任巡撫張

題明該縣地屬水鄉波濤衝激河港日漸廣闊田地日漸坍削以致缺額再奉部駁四十七年飭令嘉興秀水二縣隨同丈量復經前任巡撫王

題明按冊合算丈實坐嵌並丈缺各數均與從前兩次丈量之數相符並無欺佔隱漏等弊經部定議均攤賠補以符原額乾隆五年前任巡撫盧以賠補艱難

題請豁免未蒙覈準迄今一百數十年歷久攤賠萬分苦累查全書額載善邑田六十萬一千三百一十六畝有奇每畝額徵米一斗九升三合五抄銀一錢六分三釐九毫七絲復因查虧衝缺按田每畝加徵米七合九勺九抄一撮每畝加增銀六釐八毫六絲七忽是以實田而計已暗增米至二斗一合一勺增銀至一錢七分二釐七毫

不特較同府各屬爲



數獨多較之通省各州縣亦所僅見當承平之日小民安居樂業雖輸將竭蹶敢不勉力支持自髮賊據擾三載於茲顛連困苦不能罄述克復以來商賈稍稍復業而農民無以爲生所恃者惟此田畝虛村絕戶敗壘荒墳田之廢棄者無論已卽有可耕之田苦無能耕之人兼之農具既不皆備耕牛盡被宰傷往往數家之中置器一分而彼此通用一村之內蓄牛一頭而先後遞更播種既不同時收成必多偏歉加以傭工有費貸牛賃具又有費竭終歲之勞所得不償所費身家不暇計而先籌夫惟正之供衣食且不資而更困以公攤

之歟民力幾何焉能不盡幸蒙

殊恩特沛漕糧統減三十分中之八分合郡士民同深感戴但減賦原所以恤民而恤民莫要於除累以嘉善而言賦雖減而缺田未除將來按畝起科仍須於減定新賦之外每畝加攤銀米方符減額查原文缺田二百三十九頃應賠米四千六百一十三石八斗七升賠銀三千九百六十六兩七錢五分再以減額遞覈仍應賠米三千二百五十一石五斗七升無論兵燹之餘民力實有不逮卽以衝消而論康熙三十八年以前缺額已如此之多距今百有餘年坍削又不知凡

幾而逆匪之掘港開濠通河決壩而毀缺者更不知凡幾若  
舉行丈量則勞民傷財曠時失業流弊不可勝言若仍前賠  
補則虧外尙有續虧累中復多暗累遺患更不堪設想民至  
於萬不得已則弱者逃而强者抗於官有礙於民不免追呼  
官至於無如何則輕報歉而重報災在上仍須蠲緩在下未  
沾實惠是徒有補虧之名究無補虧之實既無補虧之實則  
雖強符乎原額而要無濟於倉儲於

國計民生兩無所益際此

皇仁渥沛豈宜再三瀆請惟念荒田墾種可待來年缺額攤

賠迄無了日以重賦之區當大亂之後益以二萬餘畝之虛糧困以百數十年之積累此時救死不贍治生綦難實田猶是拋荒虛畝何堪科派減賦尙難羅掘加攤何以補苴籲懇將善邑從前丈缺額田二百三十九頃攤賠銀米並請豁免等情具詳到臣當經批司覈議去後茲據升任藩司蔣會同清賦局司道具詳請

奏前來臣查嘉興府屬之嘉善一縣本係嘉興縣之東北六鄉前於有明宣德年間畫分爲縣其間田地曾就畫分之界按畝釐別因奸民取巧隱匿有司隔縣推收遂致彼此互攤

竟成嵌田弊政嗣因賦多缺額輾轉難清又復以攤徵補課  
勻額賠糧迨後議請清丈其丈缺田地二百三十九頃有奇  
復將缺田應徵銀米按畝勻加改明科則以免有虧

國課至乾隆年間屢請豁免攤賠無著銀米未經議准第查  
嘉善境內官田最多賦額本重加以攤賠之糧更屬累上加  
累在承平時民力尙紓或可竭力輸將今則亂離之後元氣  
過傷縱無水旱偏災額賦已形竭蹶賠糧實有難支况小民  
終歲勤動得不敷用抗欠疲玩勢所必至轉使每年錢漕不  
能全完徒有攤賠之名仍無輸納之實我

皇上軫念民依所有杭嘉湖三府屬應徵永定之漕額尙蒙  
恩施逾格普予量減此項勻攤缺糧尤爲嘉善縣獨有之積  
累何忍置之膜視且統計歲入之數銀米兩項均不足四千  
卽使毫無蒂欠所補於國用者無幾而小民之苦累無所底  
止合無仰懇

天恩疊沛准將嘉善縣丈缺田二百三十九頃有零應攤徵  
銀三千九百六十餘兩米三千二百五十餘石一併豁免以  
紓積困如蒙

俞允並乞明降

諭旨俾得恭刊謄黃徧行曉諭以廣

皇仁而杜流弊至前項丈缺田地頃畝因代遠年湮文案燬  
失無憑分晰稽核並懇

飭部檢查原案發浙核准應豁錢米確數另行咨報作為該  
縣徵解定額

奉減定以前仍暫照原額徵解除咨部科  
外謹會同督

臣漕臣

合詞恭摺具奏伏乞

皇太后

皇上訓示謹

奏

同治五年四月十八日具

奏奉

旨戶部議奏欽此



[illegible]

戶部奏覆嘉善縣丈缺田畝攤賠銀米豁免稿

奏爲遵

旨議奏事竊據浙江巡撫馬新貽奏嘉善縣從前丈缺田地攤賠銀米籲懇豁免以甦民困一摺同治五年四月二十八日奉

旨戶部議奏欽此欽遵在於三十日由內閣抄出到部據原奏內稱嘉興府屬之嘉善縣知縣傅斯懌轉據闔邑紳民呈稱竊嘉善縣額田六十萬一千三百一十六畝有奇康熙三十八年紹興府通判吳家瑜按畝清丈計虧缺田二百三十

頃所有丈缺田畝應徵糧銀經前任巡撫張志棟

題銷於丈實數內按畝加徵勻攤補額乾隆五年前任巡撫  
盧焯以賠補艱難

題請豁免末蒙覈准迄今百數十年歷久攤賠萬分苦累查  
全書額載邑田六十萬一千三百十六畝有奇每畝額徵米  
一斗九升三合五勺銀一錢六分五釐九毫七絲復因查虧  
衝缺按田每畝加徵米七合九抄一撮每畝加徵銀六釐八  
毫七絲七忽是以實田而計已暗徵米至二斗一合一勺增  
銀至一錢七分二釐七毫七絲不特較同府各屬爲數獨多卽較

通省各州縣亦所僅見查原丈缺田二百三十九頃應賠米  
四千六百一十三石八斗七升應賠銀三千九百六十六兩  
七錢五分無論兵燹之餘民力實有不逮卽以衝消而論康  
熙三十八年以前缺額已如此之多距今百有餘年坍削又  
不知凡幾而逆匪之掘港開濠通河挖壩而毀缺者更不知  
凡幾若舉行丈量則勞民傷財曠時失業流弊不可勝言若  
仍前賠補則虧外尙有續虧累中復多賠累遺患更不堪設  
想我

皇上軫念民依所有杭嘉湖三府屬應徵永定之漕額尙蒙

恩施逾格普予量減而此項勻攤缺糧尤爲嘉善縣獨有之  
積累何忍置之膜視且統計歲入之數銀米兩項均不足四  
千卽使毫無蒂欠所補於

國用者無幾而小民之苦累無所底止合無仰懇

天恩疊沛准將嘉善縣丈缺田二百三十九頃零應攤徵銀  
三千九百六十餘兩米三千二百五十餘石一併豁免以紓  
積困至前項丈缺田地頃畝因代遠年湮文案燬失無憑分  
晰稽覈並懇

飭部檢查原案發浙覈准應豁銀米原數另行咨報作爲該

縣徵解定額其未奉減定以前仍暫照原額徵解等語臣部查原奏內稱康熙年間嘉善縣清丈地畝虧缺田二百三十餘頃經前撫臣張志棟題請按畝加徵均攤補額乾隆年間前撫臣盧焯以賠補艱難題請豁免未蒙覈准等語查康熙乾隆年間各原案已經百數十年於咸豐九年臣部失火均被燬無存無從檢查其該省應造賦役全書內向有地畝及銀米細數例應十年造送一次迄今三十餘年之久總未據該撫造送以致地畝及銀米數目無從查覈且該撫奏稱丈缺田二百三十九頃應賠米四千六百一十三石八斗七升

又稱統計歲入之數銀米兩項均不足四千又稱懇將攤徵銀三千九百六十餘兩米三千二百五十餘石一併豁免臣等督飭司員案照原奏內額徵及加徵數目細加覈算計銀數尙屬相符而米數前後則大相懸殊應令該撫將原額田畝及應徵攤徵銀米確數詳細造具清冊送部備案其該省應造送賦役全書一併令其趕緊造送至稱嘉善境內官田最多賦額本重加以攤賠之糧更屬累上加累在承平時民力尙紓或可極力輸將今則亂離之後元氣過傷縱無水旱偏災額徵已形竭蹶賠糧實有難支懇將嘉善縣丈缺地畝

應攤徵銀米一併豁免等語查丈缺地畝攤徵銀米乾隆年間題請豁免未經議准者良以承平之時年穀順成卽有攤徵之款小民俱有天良無不樂於輸將率行議蠲未便照准今浙省新遭淪陷元氣未復百姓困苦力誠未逮若以丈缺之地仍加攤徵銀米勢必至積欠疲玩徒有攤賠之名終無徵收之實且據稱此項勻攤缺糧爲嘉善縣獨有之積累更未便令其向隅應如所請將嘉善縣丈缺田二百三十九頃有零應攤徵銀三千九百六十餘兩米三千二百五十餘石一併豁免如蒙



俞允並乞明降

諭旨由臣部行文該撫刊刻謄黃徧行曉諭務使實惠均沾以副我

皇上軫念民瘼之至意所有臣等遵議豁免嘉善縣攤缺銀米緣由恭摺具

奏伏乞

皇上聖鑒謹

奏

同治五年五月二十五日內閣奉

上諭戶部奏遵議豁免嘉善縣攤賠銀米一摺浙江嘉善縣  
丈缺地畝銀米向在丈實田地內按畝均攤補額百姓歷年  
攤賠久形苦累現值兵燹之後閭閻元氣至今未復若將丈  
缺田畝攤賠銀米概行徵收民力恐益形拮据加恩着照所  
請所有嘉善縣丈缺田畝應攤徵銀三千九百六十餘兩米  
三千二百五十餘石著一併永遠豁免並著浙江巡撫卽行  
刊刻謄黃徧行曉諭務使實惠永霑用副朝廷軫念民瘼至  
意餘依議欽此

--	--	--	--	--	--	--	--	--

古之學者政事文章道出於一故曰有德者必有言兩漢循吏類皆深明經術內外合一書以道政事讀典謨之詞藹然忠厚可以見聖人之於民焉後世歧學於治而刑名商韓之說進其始非不小有徵驗而朘刻剝削元氣暗傷霸術治民不旋踵而終敗昌黎致歎於施仁與暴之異效誠有見於天地之心焉魏晉以降言政之書在唐爲棠陰比事宋爲名臣言行錄元爲三事忠告明爲溫民母訓盛氏拙政編皇明經世文呻吟語編我

朝諸臣有于氏政書黃氏福惠全書陸氏蒞政記陳氏五種

遺規汪氏學治臆說陸氏切問齋文鈔而近日我郡錢給諫  
撰良吏述補無錫鄒中丞編道齊正軌皆真本愛民之誠而  
著其張弛補救之法蓋天之愛民甚矣天生之而不思所以  
養之教之則民無適從而死於飢寒死於刑僇是不死於天  
而死於人是天心之所不忍也故天旣生民又生賢君師以  
生我民其設施條教卽天地之心之所寄焉戴澗鄰觀察以  
名孝廉宰浙游涉今職出典大郡我鄉士民能言其政一日  
讀其所著嚴陵記畧事皆徵實惻然有不菲其民之心又惜  
公生稍後不及與中丞給諫訂交然他日志吾郡官師賢父

母者非公而誰觀察籍潤州與我家兩松中丞同郡中丞撫  
閩多惠政林文忠之封公重之至取中丞少時所冒徐姓以  
名文忠觀察生同郡邑試取其遺書覽之以所心得著之於  
篇當更有進則是編猶爲嚆矢也同治五年秋日治下楊象

濟謹書



嚴陵記畧

潤州戴槃澗鄰氏著

定嚴屬墾荒章程並招棚民開墾記

重築東西湖壩並開濬城內河道記

儲備倉穀記

製造水龍記

請發公帑重修嚴郡城垣記

請嚴郡採訪局展緩停止記

重修嚴郡文廟記



重修嚴郡武廟記

重修嚴郡城隍廟記

重修嚴州試館仍作書院月課士子記

重修嚴郡文昌祠兼興義學記

重修嚴子陵先生祠堂記

建嚴陵范公合祠記

重修嚴郡王公祠記

重修嚴郡忠義祠記

重修嚴郡節孝祠記

重修嚴郡養濟院記

重修嚴郡育嬰堂記

重修嚴郡清節堂記

重建嚴州府署記

金

一

定嚴屬墾荒章程並招棚民開墾記

戴 槃

浙省自兵燹後田畝久荒各市鎮悉成焦土遠近鄉村亦復人烟寥落連阡累陌一片荆榛辦理善後事宜墾荒其第一要務也余蒞任後查嚴郡各屬田地荒蕪人民稀少較之他郡情形蹂躪更甚怒焉憂之今欲招墾必須外來之戶樂於耕種墾戶日多一日則荒田日少一日庶糧賦不至久懸無如外來墾戶由江西來者則有衢屬之荒田可耕由甯紹來者則有杭屬之荒田可耕惟嚴郡居中止有徽州一路徽嚴交界地方皆係荒產斷不肯舍此適彼惟查有棚民一項向

來以種山爲業地方農民不與爲伍自咸豐十年後粵匪滋擾棚民僻處深山未受大害現較農民尙勝一籌昔日無田可種而不能不種山今日有田可種而能改種山爲種田田之出息究厚於山各棚民非不願種實不敢種須設法招之使種此余所以有棚民開墾之議也嚴郡收復以來迄今數載田旣久荒墾本較大種山之民聚族於斯其招墾也尙易他郡之民遷徙於斯其招墾也更難若非明定章程格外優恤難期踴躍從事非特他郡之民裹足不前卽棚民亦多疑畏竊恐荒田日久不墾皆成廢地何以使糧不虛懸哉今查

各屬田畝或業戶畏完錢糧不肯遽報或佃戶私自墾種不卽呈報其中更有因田畝墾熟假冒誣認甚則書差舞弊藉端勒索以至日久爭執種種弊端不一而足且支河叉港種田者必資水利聞開墾各戶本地農民不准取水所有築堰等費又欲外來之墾戶承認不肯按已種田畝均攤是必嚴行禁止以廣招徠蓋弊旣除而後利可興也余閱善後局頒發章程聲明各屬有不能強同之處應由地方官隨時隨地酌量稟辦以期盡美盡善余不敢謂所擬章程咸臻美善而因時利導因地制宜因人成事悉心斟酌謹列膚見四條如

左

一宜令隨墾隨報也本地荒田外來墾種各戶無論本籍寄籍須先報明認墾不准隱匿遲延近年來田畝荒蕪已久墾本較大三年內如有原業主來認應分租息作爲墾本不准分租亦不准遽行收回俟承種之人稍得利息三年後再行退還其有情願來人佃種者悉聽自便報墾到縣不准勒索墾戶分文並准免完錢糧一年須以原報畝數爲憑三年內業主承認旣不分租一年之後應完錢糧卽暫令墾戶照出倘非新墾之田佃戶照舊完租由業主

完糧不在此例其有私墾而不舉報者查出作私佔論庶  
隱匿不報之弊可除

一宜令墾戶三年後卽行執業也限定年分須照到縣報  
墾日期爲憑扣至三年方准呈辦三年後如無業主來認  
准墾種各戶作爲已業過戶完糧旣得利息復有恆產自  
必踴躍從事所有溝港取水本地農民不准阻止倘有築  
堰蓄水之事亦必按畝均攤毋令墾戶多出錢文庶墾戶  
樂從而日久爭執之風可息

一宜令原業主早爲呈報也荒田有人墾種如實係自外



三  
間回來者方准照數收回到籍三月內卽須稟報倘係在籍之戶不卽行報明延至日久俟田已墾熟再行呈報顯係有意取巧詢明地鄰卽將所種田畝罰半歸墾戶執業至於業主之親族不得混行爭執庶業主不敢久匿田畝可以逐次清釐

一宜嚴禁冒認也荒田墾熟後本籍奸民固有藉端假冒甚則衙門書差串出鄉民冒認藉端勒詐其實有印契糧串可憑者自當退還如無確據必須本庄地保紳董代爲出結方准執業如有非業主前來冒認並憑空匿造假契

訊明情節嚴行懲辦衙門書差勾串勒索尤爲地方之害  
倘有此弊更應從重治罪庶墾戶無所疑畏田畝可以漸  
次耕種

--	--	--	--	--	--	--	--	--

四

重築東西湖壩並開濬城內河道記

戴 槃

地之有水如身之血脈貫通百骸一有壅塞病情立至然則水利可不講歟嚴郡龍山之水直注大江無門戶鎖鑰惟東西兩湖掖城左右西湖水由江家塘至後輪橋太平橋舍人橋出宋家湖而至東湖謂之玉帶水卽城內河道是也今者兩湖壩圯西湖水涸力不能及東湖城內太平橋之東淤塞不通其有關於水利也正非淺鮮余守嚴郡百廢具修日不暇給復請公帑以疏水道兩湖築壩旱蓄水洩城河一濬西可以達呂公橋東可以通丁江如人身之經絡有血脈爲之

流通而後有益於民有益於官有益於

國也記云如得兩湖通一處卽時貴顯富民多其斯之謂歟  
夫人文不振由地脈不修此說未可盡非也余倡修壩通湖  
之議爲之動用帑項不以錙銖病民經始於丙寅孟夏告成  
於季秋三閱月而兩壩告竣數十年淤塞一旦遂通有志之  
士勉紹前徽將見人文蔚起咸曰兩湖毓秀之所致也是爲

記

儲備倉穀記

戴槃

天運靡常凶饑代有歷考史籍賑乏者亦多術矣大約不過發倉廩耳夫倉廩之發皆因有穀若或無之計將安出嚴郡介萬山之窟土堅而确上不受潤下不斥鹵雨則潦霽則稿下戶無餘粟中產不足伏臘仰給於鄰郡而日糴焉小歉則值倍他郡然商賈惟利是趨如能招而至焉則民猶免於莩不然招商曰無發廩曰無不幾束手待斃乎余自乙丑秋來守是土值洪水驟發之後舊存米穀散給一空前丁太守請發公帑爲地方積穀有志而未能舉辦余乃將捐局給發錢

千串委員採辦其得穀八百三十石有奇丙寅夏旱城中缺米居民乏食余爲之發倉穀以濟之賤其價值以待新穀之登場而止然後知穀之有關於民食也大矣而儲倉穀於郡城尤不可不多爲之備余又見郡城之穀堆貯民房非久遠計更請以壩工未用之錢一千餘串改建預備倉又查嚴郡有給發各屬牛種未繳銀二千餘兩卽以應收之欸買儲倉穀多一石卽有一石之用此乃當務之急至於地方年穀順成再由各戶捐積從此而增造義倉分立社倉余猶望於後之守是土者推而廣之是爲記

余於五年秋交卸嚴州府事後稟請建造府倉並將金衢  
嚴三府各縣所借牛種銀兩每銀一兩完穀一石以實倉  
儲上憲俯允所請復又條陳各郡建一府倉每府積穀萬  
石以備兵荒之用至七年秋奉飭舉辦迨八年夏余重守  
斯郡始將嚴郡倉穀收齊計足萬石又記



--	--	--	--	--	--	--	--	--	--

131

製造水龍記

戴槃

救火之器古惟水袋唧筒順治初上海縣唐氏得水龍之制於倭人久而他處漸傳其制用之最善此水龍之所以行於各省也嚴郡自兵燹之後百事俱廢余自乙丑秋來守是郡下車之始首思禦災捍患詢之紳耆舊備水龍無一存者余心憂焉急欲造之而苦無良匠冬十二月杪祝融告警火災叠見余親至其地督率郡之人撲滅而城中無救火之器終無以防患於未然也適五年春親詣武林特捐廉製造水龍一具以備不虞其餘應用各器靡不悉備書曰有備無患正

謂此也舊之習練此事者尙存二十餘人聚而演之乃擇於  
二月吉日就東湖左側馬賀橋祭畢迎設南周王廟安置以  
從郡人之請是爲記

請發公帑以修郡城記

戴 榮

乙丑夏霖雨兼旬洚流四發郡當其衝城廓鄉市滙爲巨浸城垣因之傾圯蔣方伯委員前來會同前丁太守查勘丈量統計四城周圍倒塌共五百七十三方興工修築費資甚鉅請於方伯由民間按畝集捐方伯以民情疾苦當此水災之後應徵錢糧

朝廷悉予蠲免不忍以城工之事下累吾民未允所請而此事遂息適余八月秋來守斯土周歷各城閱視工段坍塌甚多急思繕築力請於大府動給公帑大府准發錢五千串查

郡城周圍五里有餘門有六西南各二東北各一余乃構覓良匠分段估計共需工錢四千三百五十串有奇以外應用各料止需石灰錢六百餘串其餘磚不必取之於窑石不必採之於山度城內外之所有足敷修城之用是以所估錢數適符所准錢數上其事於各憲方擬擇日開工得觀厥成乃因去任而未竟其事余心歉甚然用項旣籌工段亦定後之守茲土者無難遵而行之余思城所以衛民衛民而不至於累民此則余之深心也是爲記

請嚴郡採訪局展緩停止記

戴 槃

浙省自咸豐庚申年來疊遭兵燹各郡幾無完善之區其時官紳士民兵勇及婦女幼童殉難者誠不可以數計至同治三年武林克復後省城設立採訪總局並飭各府分設一局示以限期卽將殉難紳民男女人等逐一採訪詳請旌卹昭忠節表貞烈也余於四年春權篆嚴郡知地當要衝粵匪擾害甚於他郡嚴之民人被害者亦多於他郡地方水患爲災人民未盡復業採訪一事若不寬其期而緩以查之恐忠義節孝湮沒者多無以頒鉅典而慰貞魂余心憫焉是年秋各

郡奉文停止均卽撤局惟嚴州一郡獨請於大府展限一年  
仍飭各屬廣加採訪彙請旌表大府俯允所請前設郡局其  
採訪殉難男女得一千六百餘人自甲子九月至乙丑八月  
竣事又採得千餘人其中忠臣義士節婦貞女不能盡無遺  
漏而多訪一人卽彰一人之堅操多訪一年卽成一年之實  
政謂非守土者之責歟迨劉君接篆嚴陵遂援成案復請展  
限一載適余在省提調善後局務總理其事爲之轉稟於大  
府仍舊允行從此搜採之時月愈久而表揚之忠烈愈多矣  
是爲記

重修嚴郡文廟記

戴槃

曩余出宰桐鄉逢丁祭躬親釋奠美富親見之星霜幾易而烽火遙來事平之後出守嚴州至則官廨民房胥成焦土惟聖宮巍然尙存然已十毀八九慨然曰事孰有大於是者乎孔子廟貌擬王者營建原不易予力請於大府動用公帑急召工匠數百人委員監督其自泮池內外圍牆傾圯者重修之自儀門而東廡西廡拆毀者重建之大成殿規模尙在而藻井與櫺星門向之有而廢者補之明倫堂增置後壁崇聖祠增設前門名宦鄉賢土地各祠新築墻垣餘如聖賢先儒



各牌位一切祭器獻壇等無不周備以昭慎重閏四月而功  
始告成守土者爲一方興文教爲萬世存道學爲一日之官  
卽盡一日之事後之賢守朔望行香春秋致祭升堂猶聞絲  
竹之聲入室無復邱墟之感則予之於斯舉固樂其觀其成  
也是爲記

重修嚴郡武廟記

戴 槃

嚴郡武廟有二一在東門內一在府學西今惟東門內廟貌  
猶存用急興修以昭誠敬竊惟帝之神靈浩氣亘古常存充  
塞無間歷代帝王古今士庶無不虔心崇奉婦人女子孩提  
之童一耳帝姓卽悚然改容如雷霆之震耳強梁桀驁之徒  
所至各廟殘燬靡遺獨帝廟存十之七以故棟宇墻垣規模  
尙在堪資修理則帝之正氣流行聲靈赫濯爲何如歟歲乙  
丑余來攝郡篆至卽躬拜帝像而廟模不壯懼無以肅觀瞻  
急爲之請於大府動用公帑整飭堂廡丹雘楹樑櫺斲殿庭

二  
黝堊墻宇體制胥遵定例猗歟盛矣蓋乘其未壞而補苴之  
易爲力及其旣敗而創豎之難爲功有心者苟念今茲致力  
之維艱護而惜之嗣而葺之則茲之壯麗而巍煥者永新不  
敝豈不幸甚余有望於後之守茲土者其勉之是爲記

重修嚴郡城隍廟記

戴槃

城隍掌生靈之命而司禍福之權其有水旱昆蟲妖異疫癘之災城隍亦不得辭其責予守是郡以撫綏之責自任兼以燮理之責任城隍而任廟貌之褻陋非所以敬土尊神也特勸民間捐輸爲之重修一有水旱災爲民請命見民多收一斛麥曰此維神之賜多獲一區豆曰此仗神之力所以敬神者無微不至而年來水旱頻仍民不至大歉者厥功有在夫朝廷祠郡邑厲壇均以城隍主之而殷祝之以福善禍淫古之聖人神道設教卽此類也余自乙丑綰綬茲土載考郡志

知縣城隍先附祀於郡廟至明崇禎年間始建邑廟而郡邑  
遂分兩廟迄今數百年來遭此浩劫郡廟之焚燬無存幸邑  
廟猶在堪資修葺今廟貌重新均復舊制郡邑之城隍仍合  
爲一廟而並祀焉至於郡廟之基址尙在重建棟宇則又望  
郡之人於休養生息後勉力共成之也是爲記

重修嚴州試館仍作書院月課士子記 戴槃

學校造就人才之地原不必歧試館書院而二之也嚴郡士風有明最盛商輅姚夔以勲德著洪堪何海以正直稱喬年子灼以忠節聞鄭侃孫瓊以經濟重至於

國朝廉明不阿如毛際可之爲推官方象璜之爲大理吏治通達如夏日昌之令海康詹惟聖之宰德平他如何士錦王雲鳳余廉徵等胥出身科甲膺民社之任而循聲卓著或曰是試館之所拔取或曰是書院之所栽培不知有書院卽有試館試館每歲學使舉行一次書院一月兩行考校考校之

法朔課則府縣輪流校其文藝品其次第有高下使士生廉恥心有獎賞使士生奮勉心扶輪大雅激勵風教莫重於是望課則聘文行兼優者主其事亦每月一課秉公閱藝定爲超特壹三等上之太守太守按次定賞仍下其事於山長使給諸生以宏獎勸法至良意至美也按嚴郡試館向在府前係明大司馬宋賢捐建制度宏敞士子頌德書院則在府學東乾隆年捐建嘉慶年重修亦分東西文場如試館例咸豐十一年間試館被燬無存而書院尙存門堂蔣方伯魏觀察及諸同官以及地方殷戶在庠諸生共集捐資得若干數前

太守丁經理其事添造屋宇草創已成未幾洪水驟發東西  
文場屋宇傾圯余自同治四年八月來守是土次年二月卽  
遇學使按臨四年歲考已經借書院爲試館余不敢不踵其  
事乃勸令在庠諸生捐貲修葺拓其規模有門有堂有樓有  
廡有厨庖寢漏之所學使按臨一月事畢仍作書院考課士  
子名仍其舊事不虛行不必以書院爲試館定爲永例而試  
館人才胥出之書院二者固並行不悖也復查書院經費向  
有田五六百畝租息作爲山長束修士子膏火之需自兵燹  
後荒廢者多成熟者少現查明一百五六十畝尙未能收租



應用余每課膏火胥捐廉泉山長束修取之辦公經費然一時權宜之計所賴該地紳董與後之守是土者力加整頓務使舊制可以復興而善政垂諸不朽有厚望焉是爲記

余前權篆嚴郡捐修試館作爲書院並捐廉以課士至八年夏重守是郡厯任因書院經費支絀膏伙無出課試寥寥余稟請於大憲在善舉經費項下每年提錢三百串以爲每月考課士子作正附課膏伙之用准如所請現在按月舉行並延掌教添設師課從此文風可以日上而士子得有膏伙亦不無小有裨益也至書院逐年所收田畝出

息三年歸併一科留作士子賓興之費又記

[illegible]

重建嚴郡文昌祠兼興義學記

戴 槃

嚴郡文昌祠舊在興仁門外兵燹後殿閣無存祀典遂廢身爲民牧不力興文教曷以暢

皇仁余自守郡以來墜者修之廢者舉之動公帑者十之八捐廉泉者十之二今力將告竭若重請於大府當經費支絀之時必不能再發公帑然不建祠奉祀亦無以揚珠璧之彩而助日月之光查東門街義學房屋一所余愛其地潔淨改爲祀神之祠將公帑內所餘錢文爲之增其門屋修其堂宇廟貌煥然一新從此文治昌明而六睦之英才卽聚於斯至

於義學仍設立祠內擇師訓蒙小子有造以冀成人有德異  
日由義學而入鄉學

國學未始非振興文教之一端也是爲記

重建嚴子陵先生祠堂記

戴 槃

自杭州東南溯江而上過富春渚至七里灘兩山之間有嚴子陵祠焉清風高節照耀江水曩常經其地瞻其道貌徘徊久之而不忍去宋范仲淹守嚴郡嘗爲子陵置義田立祠祀作歌以紀其德自是以後淳邑有方賊之亂富春有裘賊之亂是祠之或廢或興年日舛錯殆不可考

國朝嘗飭守土之官歲時修葺故祠得巋然長存自粵匪擾亂郡當其衝祠遂不保余以同治四年八月來守是土過七里灘心待禋者累月聞魏觀察有志捐造前丁太守經理其

事半途功廢予慨然首先捐廉二十萬錢次集捐貲鳩工庀材復祠宇之舊觀續造客星樓祠內神像碑石動用器具洪纖畢備閱四月而功告成迺入山而求子陵之後得兩人焉一名國祿一名寶華兩人爲從父子相與爲依懼將無後而又奇窮蓋義產之失久矣余爲之請於大府就嚴郡鹽課耗項內歲提錢八十千文爲目前開墾山田費用嗣後修葺祠宇奉祀香火俾得永遠有資仍勉國祿等砥節礪行無墜先人遺緒則余他日公車便訪重瞻道貌庶幾景仰之思與是江是山而俱永也所有先生道德事蹟前人言之詳矣余不

復贅是爲記

余前權篆嚴郡捐建嚴祠諭令嚴子陵先生後裔嚴國祿寶華叔姪二人看守祠堂奉祀香火又稟請在鹽耗項下每年提錢八十千文以爲祠中之用當諭嚴國祿等早爲完娶以繼絕祀乃至八年夏余重守是郡嚴國祿仍未聘娶復又助資以成其事至十里富春山道光年間嚴國祥曾賣三股之二與方文芹執業現據嚴國祿具稟到府又斷歸嚴國祿執業永作嚴祠之用不准再行買賣並札飭桐廬縣立案又記





建嚴陵范公合祠記

戴槃

子陵先生與范文正公時代不同出處不同而相同以道百世之下聞先生之風者頑夫廉薄夫敦聞文正之風者鄙夫寬懦夫有立志文正爲先生祠堂記曰微先生不能成光武之大微光武豈能遂先生之高余更續兩語曰微文正不能知先生之心微先生豈能動文正之慕余乃獨捐廉二十萬錢構屋宇三間大加修葺爲之立祠以祀焉因名之曰嚴陵范公合祠是爲記

余前權篆嚴郡據紳士柴望元等稟請有無主黃姓破屋

一所可以建祠如有原主回來另覓房屋歸伊居住余乃捐貲興工修造房屋計用大錢一百七十餘串通稟各憲在案繼有民人欲收此屋前任劉守置之不問房屋仍爲民所居此祠遂廢余於八年夏重守是郡諭飭原稟司事囑令住是屋者將修造之錢照數繳出另行建祠復又情願將此屋歸公仍爲嚴范合祠又記

重修嚴郡王公祠記

戴 槃

余守嚴之明年夏旱率屬祈禱芒鞋徒步自朝至於日中晁雖勞不倦非不自惜也重民命也聞郡之東門街舊有昭應伯廟爲郡人禱雨之所靈異叠著民曰嗟今之太守因旱而禱禱而雨前之太守因旱而禱禱而不雨以身殉旱民不忘恩爰立廟祀予聞而愴然悲急思所以修之獨捐廉十萬錢因其舊址爲之整葺曩時規模宛然在目時而風調雨順年穀豐登春秋致祭於斯脫有旱災就廟祈禱公之神靈必應之太守之幸闔郡之福胥在於是祠旣成都人士請記其大

署焉按公姓王諱光鼎

國朝康熙三十五年蒞任有異政次年郡旱步禱龍山遭疾而卒民爲罷市立祠祀焉後有旱澇禱之輒應嘉慶二十五年知縣周興嶧奉撫臣題請

敕封昭應伯云是爲記

重建嚴郡忠義祠記

戴槃

國朝自定鼎以來忠義一祠設位不多蓋二百餘年來之昇平久矣咸豐十一年間浙東疊次告警郡城不守被害甚烈官斯土者皆能舍生取義視死如歸其沐浴於聖教者深也郡紳士民人亦頗知大義或不屈死或以戰亡忠肝毅魄脫不立祠以重其祀曷貴有守土之臣予攝郡篆甫蒞任謀置俎豆之區得節孝祠旁俞姓廢地一區給之以價迺獨捐廉三十五萬錢大興土木祠宇落成安之以位六邑忠義芳名大書特書於版並額曰見危授命自宋至有明以來其有功

地方之官各設一位尊禮之如初忠義祠居左節孝祠居右  
其中建造穿屋俾兩祠通聯一處春秋祭祀得以並行至於  
祭費則以嚴陵思范兩祠併爲一祠之用餘銀八兩改作忠  
義等祠祭銀嗣後永定爲例遵而行之則有司者之責也是  
爲記

重修嚴郡節孝祠記

戴槃

孝以節名志苦也余謂平時節孝苦由天亂世節孝苦由人猝然賊至夫不能保其妻妻不能衛其夫倉皇自盡投井投繯種種苦狀不可殫述至於流離失所抗節不辱慘死溝塗事平之後布奠傾觴哭望天涯其爲苦又何如也夫有大節而不爲之彰是守土者之過也余守嚴郡以來詢之士人曰舊有節孝祠在小西門內兵燹後棟宇尙存然將傾壞矣又爲居民佔住其中並無節孝祀位余心憫焉夫事因其舊則易爲功迺獨捐廉一十五萬錢遂重整舊規其旁卽余所建



忠義祠每逢祭祀之時先忠義後節孝聚都人士觀之忠孝之心有不勃然興感乎祠旣成余心喜焉喜夫大節之丕沒人人可爲忠臣義士節婦孝女也郡城舊設有採訪總局同治四年秋卽奉文停止今獨請於大司展限年月仍飭各屬廣加採訪彙請旌表余又恐忠義節孝之湮沒不彰而不得不爲之寬其期也是爲記

重建嚴郡養濟院記

戴槃

國家有大制作不惜發帑金以宏創造自壇廟祭祀而外與學校餼糧垂爲永制者則有賑恤孤貧一事直隸一千三百餘州縣定有常額有司有敢隱匿者罪之臨發令教官監放典何鉅也夫孤貧何益於

國家而體恤之不遺餘力蓋懼一夫之不獲其深仁厚澤涵濡至二百餘年之久者以此有地方之責者宜何如仰體聖心也試思今日之孤貧非虎口餘生卽他鄉飄泊不及時收養之勢將填於溝壑余爲嚴郡守獨捐廉三十五萬錢興

造養濟院房屋若干間俾孤貧者居於是飲食於是所有口糧飭令給發始終無怠蓋

國家旣已恩賜頻頒有加無已臣子如不盡心爲之咎將安逃余因是院之落成而竊幸養濟之有其地卽有其人也舊志在北門城外今擇北門城內育嬰堂旁之基地而創建之是爲記

重造嚴郡育嬰堂記

戴槃

嚴郡亂後人民稀少遂安人存十之七桐廬壽昌人存十之五淳安建德人存十之四分水人存十之二爲今之計莫要於招集流亡收養孤兒爲他日生聚之謀郡內育嬰堂向在北門城內自兵燹後屋宇被燬止存小樓空架兩間予爲守土官休養生息責任難辭迺獨捐廉一十五萬錢添造平屋重整舊樓翼城廂內外孤苦兒女收養於斯乳哺於斯餽粥於斯并長成亦於斯爲

國家廣恤孤之惠而宏錫類之仁典至鉅恩至渥也是爲記

余前權篆嚴郡建造育嬰堂所有堂內田畝止清出一百數十畝嗣奉吳學憲發銀一千兩劉太守又買成田一百四十餘畝逐年收租歸公應用每年出息除用項外止能餘錢一百數十千文開堂育嬰不敷應用歷任均未能舉辦余於同治八年夏重守是郡特先改設保嬰局並倡寫願捐每願一日一文官商共寫一千願零每月共寫計捐錢三十餘千文按年即可收錢三百餘千文現在貼養嬰孩爲數無多並飭司事將所有之錢先行添建房屋以爲日後開堂育嬰之舉又記

重修嚴郡清節堂記

戴槃

婦人不忍死其夫矢志不嫁白首冰霜誠足嘉也然或衣食不繼任其凍餒恐非保全名節之道我江南有恤嫠堂有恤嫠會至浙江則有清節之名嚴郡設立於北門城內其房屋建自何年造自何人均無稽考惟與育嬰堂合爲一區分爲兩所育嬰堂廢而清節堂尙存房屋規模甚爲寬敞予仍其舊獨捐廉五萬錢稍加修飾俾斯堂不至於傾塌存其名可以復其實也或曰經費不籌良法不久此舉難以遽行然余願居斯堂者之人少而不願居斯堂者之人多如能查明地

方公產漸有收息得人經理亦不患善舉之不能復也是爲  
記

重建嚴州府署記

戴 槃

府治之建置由來舊矣明以前不可考自元改州爲府明洪武初始移今所坐龍山正脈以後增置堂廳亭館樓閣宏規鉅制甲於各郡按嚴州形勢據浙江之上遊當甌歙之孔道錦峯繡嶺山水之鄉故其建置府治也氣象雄濶控制六邑襟帶兩湖今雖烽火之餘其制度形勢猶可仿古爲之余於同治四年來守是土急欲營建以復舊觀惟念君子將營宮室宗廟爲先用是先修文武各廟暨文昌嚴范忠義節孝各祠凡茲工程已陸續告竣取前所請公帑商建府署而工程



浩繁從平地而起廳事建寢室置府庫造亭廨築大小週圍  
墻垣厥功甚鉅余乃鳩衆庀材量地測景擇於丙寅四月吉  
日開工自夏徂秋外而儀門內而重堂高樓規模悉備次第  
告成則余府治之重建正欲崇體制而壯觀瞻也至於堂以  
外科房未造堂以內旁屋未成則待後之守此土者經營以  
終其事焉是爲記

附刻嚴郡各楹聯

關帝廟

其爲氣也至大至剛充塞乎天地  
人皆仰之不賞不怒感格於神明

文昌祠

朗耀星輝魁斗戴匡分位次

主持風教馨香俎豆薦神明

郡邑城隍合廟

赫聲濯靈祀於一郡一邑

彰善癉惡降之百祥百殃

天后廟

生有異徵秉滄海澄清之氣  
歿而靈顯濟乘舟危險之時

烏龍廟

百六十里峯勢周迴遂此地隱居求志  
一千餘年神靈感應慰斯民望歲深心

巖子陵祠堂

惟巢由乃可與並駕

微光武不能成其高

嚴范合祠

得聖之清在流水高山士各有志

于今爲烈道盛德至善民不能忘

王公祠

爲禱雨而亡自昔神靈如在

幸烽烟已盡如今廟貌猶新

節義祠

各矢精忠一片忠忱昭日月

同明大義千秋義氣壯河山

節孝祠

節烈常昭其矢貞操如冰雪

孝思克永用崇祀典達馨香

府大堂

我到梅城正烽烟甫靖洪水初消因地制宜計十一月于

茲矣

民安葭屋當土木重興閭閻不擾愛人節用斯二千石之

職與

除五百年澆風惡習漁課裁而漁戶自新化賤爲良四民  
中憑他改業

爲億萬姓積穀防饑倉廩建則倉儲盡實有備無患十郡  
內樹厥先聲

余前署嚴郡請裁九姓漁課並准九姓改賤爲良奉  
大府允准咨部立案又請各郡建一府倉儲穀萬石  
以備水旱復蒙允行余復蒞斯任倉穀始行儲足特  
書此以記之



澗鄰觀察於同治乙丑歲八月出守嚴郡樹適於是年十月

奉選來治下司授親見公治嚴善政爲甚悉前甲子歲樹曾

奉委署嘉興府學故得聞公治桐之政亦最詳方公之宰桐

鄉也時值鄰省寇氛告警羽書旁午之時獨從容坐鎮不屑

以籌防爲能拳拳於學校井田諸大政取諸古法斷之自我

十餘年來諳練之老吏淹博之通儒無不嘆服公如神之治

其經術有如此者嘉興七縣漕務最稱難辦又該地鎗船奸

民易於滋事時當大旱各邑令束手無策公不動聲色隱捕

奸民置之於法冬間辦理漕務得宜首先全完爲諸邑創咸



得指臂之助其才畧有如此者昔諸葛稱龐士元非百里之材梁公稱張柬之可大用之器樹以爲經濟之士無適不可用之於一邑而一邑治展之於一郡而一郡亦治嚴郡古睦州之地風俗向稱樸厚而公受任於兵燹之餘舉闔郡瘡痍之衆不足當桐鄉一邑之民撫理孔艱莫此爲甚而公以爲政舉大綱其餘自從容就理故其爲政也招集流亡請蠲徵賦如黃霸之爲潁川令勞來不絕焉募民墾田籌儲倉穀如龔遂之爲渤海守勸農爲大焉以崇祀典建修各壇廟如韓公在潮州遣官祭瀆而雷雨效靈焉以振文教飭修各書院

義學如蘇公倅杭州登樓賦詩而湖山增色焉至若荆公築  
四明之隄湯守開三江之閘而公之濬東西兩湖並城內河  
道政相仿也河南題明道之碑峴山墮羊公之淚而公之建  
嚴陵祠與嚴范合祠德相類也他如鐵筆表五人之墓梅花  
題雙節之名而公之建忠義節孝各祠事甫定亂而表彰尤  
多也英皇流湘水之音杵臼存趙宗之後而公之修清節堂  
暨育嬰堂恩推孤寡而籌畫尤深也凡此治功文吏能爲之  
乎俗吏能爲之乎必如歐陽公蓄道德而能文章者爲之惜  
公車敦迫設施猶有未竟之勲父老莫慰攀留之願計守郡

以至去任時祇十一月耳嚴郡士民蒙再造之恩晉千秋之  
祝試館各祠爲之設長生祿位祝公壽考而樹以一介微員  
疊荷裁成用敢不辭僭越之咎舉共聞共見者謹述一二以  
傳其大畧至於闡揚盛德表著宏功非樹之淺見寡聞所敢  
贊一辭也同治五年歲次丙寅八月錢塘謝寶樹謹跋

文嘗讀史至宋范文正公傳知其以天下爲己任濟世安民之念隨地而存故歷任州郡無不展布經猷兼施教養卓然有政績可傳不特邠慶二州生祠畫像也卽其典領睦州興學校尊道德尤克育人材而維世教此後人所以建思范之亭也文爲諸生時聞今世有戴公者其人深明經術爲政如古良吏由縣令洊陟府道所至除害興利善政具舉皆務有益於民久已仰而企之惟恐不得一見己巳七月奉選來嚴司府學篆欣幸爲公屬吏晉謁之後蒙賜示所著宦游記畧受而讀之益信公本經學爲經濟以實心行實事而

其在嚴郡所修舉者一一可徵諸目見近復培植士子按月  
課試添給膏火士林鼓舞雖古賢牧何以加茲抑文重有感  
者 始祖子陵公祠堂構自有宋范公遭兵燹而盡燬賴  
公捐廉重建復祠宇舊觀併爲籌款求後裔以奉祀事爲久  
遠計使吾 祖高節依然照耀山水卽此尊道與興學二端  
激勵風教不誠與范公後先輝映哉文觀 公之政治服  
公之勲德而知 公之福祿正未可量也爰樂書於記畧後  
同治九年庚午孟春餘姚嚴蔚文

裁嚴郡九姓漁課錄

前權知嚴州府事丹徒戴槃手訂

九姓漁船攷

請裁建德縣漁課稟稿

各批附

藩臬憲會詳稿

批附

九姓漁課准令改賤爲良稟稿

各批附

藩臬憲會詳稿

批附

藩臬憲札稿

藩臬憲覆詳稿

批附

裁九姓漁課應詳請奏咨稟稿 批附

藩憲詳稿 批附

撫憲咨稿

禁止江山船隻窩娼請飭杭紹金衢一體遵辦稟稿 批附

附稟刊刻簡明告示移行各府一律頒給實貼稟稿

請出示嚴禁江山船隻窩娼飭各府勒石稟稿

移杭紹金衢各府文稿

鈔詳飭建德縣免徵漁課札

鈔詳飭建德縣准令九姓改賤爲良報官存案札

給示飭建德縣頒發九姓各漁船實貼札

府示

藩憲示

藩憲勒石永禁示

裁嚴郡九姓漁課並准改賤爲良碑記

詳九姓各漁戶報明身家清白造冊通送由





### 九姓漁船攷

嚴郡之建德縣有所謂九姓漁船者不知所自始相傳陳友諒明初抗師其子孫九族貶入舟居以漁爲生改而業船九姓則陳錢林李袁孫葉許何原編伏仁義禮智信捕七字號大小船隻二千三十一號男每丁徵銀五分婦每口徵銀四分一釐建德縣收其賦道光咸豐年間尙存船一千數百隻其船有頭亭菱白兩種其家屬隨船皆習絲絃大小曲以侑觴薦寢船有同年嫂同年妹之稱其實嫂妹皆僱覓桐廬嚴州人爲之世人誤桐嚴爲同年故有此稱船隻名爲江山而

實非真江山船也真江山船甚小並無女子或在淺灘撥貨或搭肩挑過客又有船名蘆鳥係義烏人所業形製寬敞同於菱白惟旁無窗櫺殆不欲自同於九姓船也由錢江而上至衢州號爲八省通衢而福建之茶紙江西之磁紙廣東之洋貨甯波之海貨來往必由富商大賈非頭亭菱白不坐豪宦亦然沉溺傾覆迷而不悟耗費資財誠不可以數計觀其婦女並無珠翠錦繡之飾花粉所資半耗於衙前之需索半耗於舟中之糜費水腳較尋常船隻已加一倍而登舟後無計可引絕不與婦女通一語者雜派各費又加一倍其擾害

行旅敗壞風俗未有甚於此者歷來地方長官以及往來貴客既耳習而以爲固然復目覩而無復過問余選授桐鄉於甲寅秋九月到浙卽委查看徽嚴交界防堵坐陳姓茭白船到嚴州陳姓有求裁九姓漁課之請余未悉其詳漫應之曰將來如有任嚴州府時再行請革迨事閱十年適余權篆斯郡遂爲之詳請裁革以踐前言今奉

各太憲俯如所請並出示嚴禁窩娼宿弊現各船皆知斂迹水腳之外無他費亦如蘆鳥船焉而或者謂積習相沿由來已久恐欲禁而終不能遏也余謂不然今之時非昔之時可

比也昔則九姓各船須徵課銀今則漁課全裁其可禁者一也昔則九姓止准舟居而不准陸居今則舟陸悉聽其便其可禁者二也昔則九姓以漁爲業而不能改習他業今則士農工商均准習業其可禁者三也況當此兵燹之後船隻止有數十號九姓亦止存三百餘戶茭白船隻稀少改業蘆鳥船之人甚多其中稍知向上者必能改賤爲良間有不肖之徒仍染舊習地方官如能隨時查禁無難力除淨盡舊染汚俗咸與維新其在此時與

稟請 奏裁建德縣漁課由

敬稟者竊 卑府 於地方應辦事宜無不悉心籌畫其中當興

者興當革者革隨時酌量稟辦查有嚴屬建德縣漁課一項

積習相沿已久爲害不可勝言浙省各縣有編徵漁課銀兩

因地多水鄉漁人以捕魚爲業是以照例完課嚴屬建德縣

九姓之漁課則與各縣漁人所完之稅大不相同 卑府 伏查

建德縣之漁課始於明洪武年間九姓則陳錢林李袁孫葉

許何相傳陳友諒明初抗師子孫九族家屬貶入舟居有明

之所謂校坊無以異也由明至今數百年來漁課照完舟中

所居之婦女名爲眷屬無異官妓迄今日久年深九姓之姓常存九姓之名已難遍考近數十年來船隻名爲江山各船戶大率在外構買婦女到船作爲眷屬以此營生而來往商民不能不坐此船耗費日甚淫侈者以至傾家蕩產而不顧船隻愈添愈多商民愈用愈困船以奉官爲名官吏旣徵錢糧卽有不能禁止之勢漁課雖徵銀無多胥役之在外浮收需索加增無數至咸豐十一年兵燹以來江山船隻焚燬者不下數百隻近只存數十隻現又漸次添造仍沿舊習牢不可破刻下建德漁課尙未開徵而九姓漁船若不趁此時革

除地方窮苦已甚商民仍競爲淫侈勢必更形困乏今欲禁  
百姓之淫侈則必禁江山船之婦女而欲禁江山船之婦女  
則必裁建德縣之漁課查建德縣船庄冊載原額徵丁銀二  
百一十八兩一錢八分五釐雍正五年已攤入田地山塘均  
勻帶徵毋庸議裁惟漁課一項仍照舊徵收內解藩司衙門  
馬械銀兩並卑府衙門給發馬快工食以及修倉刑具充餉  
等欸共計銀九十四兩五錢五分八釐卑府擬將此項銀兩  
全行裁減如有必不可少之欸另行籌補九姓漁戶課鈔永  
請裁革於



國課無損於人心有益漁課一裁不得以九姓爲名借口完課船中之婦女不准再作娼妓爲害商民庶數百年之惡習可除嚴屬漁課爲數甚多擬請

奏裁是否有當敬祈

憲示遵行肅具寸稟虔請

鈞安

同治五年二月

日稟奉

巡道憲和批既據通稟仰候

督撫憲暨

藩臬憲批示錄報繳又奉

臬憲楊批所稟係爲整飭地方風俗起見旣據通稟仰候

兩院憲暨

藩司巡道批示繳又奉

藩憲楊批現據該府稟奉

撫憲批示已會同 臬司議詳免徵並另札遵辦在案仰候

奉批另行飭遵仍候

督憲暨

臬司巡道批示繳又奉

督憲左批仰浙江布政司覈議詳辦仍候

撫部院批示繳又於四月二十四日奉

藩憲楊札開查接管卷內奉

撫憲馬批該府稟建德縣漁課擬請

奏裁由奉批查江山船名目自錢江起至金衢一帶所在皆有遺害行旅由來已久自應嚴行示禁惟該府因此請免漁課是否將該府漁課裁免之後即可全行禁絕仰布政司會同按察司覈議詳覆飭遵仍候

督部堂批示繳等因奉此並據該府具稟到司查該府稟敘建德縣九姓漁課始於明洪武年間相傳陳友諒明初抗師其九族貶入舟居承完各情代遠年湮本無考據況年徵銀九十四兩五錢五分八釐據稱提解藩司衙門馬械欸暨提

給府衙門馬快工食修倉刑具充餉等欸檢查司案該縣漁課銀內並無提解藩庫馬械欸日止有各府年解府地丁欸在各府以修倉刑具充餉等名目備具文批解司作完府地丁欸彙入通省地丁

題銷案內造報計考直同正項該府有閏之年解銀一十九兩六錢七分一釐無閏之年解銀一十七兩八錢一分所稟提解銀欸數目自係查敘之悞至提給府欸厯未造銷尤爲外辦可知竊以漁課錢糧顧名思義完自捕魚船戶原不准藉以窩娼惟年深日久以來易船名爲江山裝載客商窩留

娼妓屢禁終不能遏現當百度更新諸求整飭之際該守聞  
挽敝習維持風化請將九姓年完漁課九十四兩五錢五分  
入釐

奏明裁免其有提解必不可少者另行籌補似應如稟辦理  
第此項漁課銀內惟該府提解藩庫府地丁一欸係屬造報  
達部其徵解欸目銀數內外檔案又皆不符自應毋庸

奏咨免多窒礙卽准自同治五年爲始永免徵輸出示曉諭  
使各船戶周知所有年額應解府地丁銀兩永令於留給該  
府辦公經費項下按年提解以符造報此外可裁則裁如有

必不可裁者亦令自籌解給經此次免徵漁課以後並責該府將江山船窩娼爲害宿弊實力永禁務使驅除盡淨毋托空言徒裁額稅除會同

臬司議詳外合亟札飭札到該府卽飭遵照仍俟奉批另飭遵辦毋違

--	--	--	--	--	--	--	--	--	--

藩憲會詳稿

布政使司楊  
按察使司高  
爲遵批覈議詳請事竊奉

撫憲馬  
憲臺批嚴州府稟建德縣漁課擬請

奏裁由奉批查江山船名目自錢江起至金衢一帶所在皆有遺害行旅由來已久自應嚴行示禁惟該府因此請免漁課是否將該府漁課裁免之後即可全行禁絕仰布政司會同按察司覈議詳覆飭遵仍候

督部堂批示繳等因奉此並據該府具稟到司本司會查得該府稟敘建德縣九姓漁課始於明洪武年間相傳陳友諒



明初抗師其九族貶入舟居承完各情代遠年湮本無考據  
况年徵銀九十四兩五錢五分八釐據稱提解本藩司衙門  
馬械欸暨提給府衙門馬快工食修倉刑具充餉等欸查檢  
司案該縣漁課銀內並無提解藩庫馬械欸目止有各府年  
解府地丁欸在各府以修倉刑具充餉等名目備具文批解  
司作完府地丁欸彙入通省地丁

題銷案內造報計考直同正項嚴州府有閏之年解銀一十  
九兩六錢七分一釐無閏之年解銀一十七兩八錢一分所  
稟提解銀欸數目自係查敘之悞至提給府欸厯未造銷尤

爲外辦可知竊以漁課錢糧顧名思義完自捕魚船戶原不  
准藉以窩娼惟年深日久以來易船名爲江山裝載客商窩  
留娼妓屢禁終不能遏現當百度更新諸求整飭之際該署  
府戴守圖挽敝習維持風化請將九姓年完漁課銀九十四  
兩五錢五分八釐

奏明裁免其有提解必不可少者另行籌補似應如稟辦理  
第此項漁課銀內惟該府提解藩庫府地丁一欸係屬造報  
達

部其徵解銀數欸目內外檔案又皆不符應請毋庸

奏咨免多窒礙卽准自同治五年爲始永免徵輸出示曉諭  
使各船戶周知所有年額應解府地丁銀兩永令於留給該  
府辦公經費項下按年提解以符造報此外可裁則裁如有  
必不可裁者亦令自籌解給經此次免徵漁課以後並責該  
府將江山船窩娼爲害宿弊實力永禁務使驅除盡淨毋托  
空言徒裁額稅是否有當理合遵批會議詳請伏祈  
憲臺察覈批示飭遵除呈

督撫憲外爲此備由呈乞

照詳施行

同治五年四月

日詳奉

撫憲馬批如詳辦理此項漁課准自今年爲始永免徵輸仰  
卽由司出示曉諭一面責成各該府縣務將江山窩娼船隻  
實力查禁驅除盡淨其非娼船仍不得藉端勒索致干拏究  
切切仍候

督部堂批示繳又奉

督憲左批如詳飭遵辦理戴署府復稟請附

奏准漁戶除籍改業所見亦是前已批司隨案覈議詳奪在  
案仰卽查照前批覈議詳奪毋遲並候

撫部院批示繳

稟九姓漁戶准令改賤爲良由

敬稟者竊

卑府

前查明建德縣九姓漁課一項詳請裁革業

經詳細具稟在案

卑府

伏思漁課如能

奏裁則九姓漁戶之名即可革除應准各漁戶改賤爲良所有耕讀工賈悉從其便查學政全書載明乾隆三十五年始優隸卒專以本身嫡派爲斷本身既經充當賤役所生子孫例應永遠不准收考其子孫雖經出繼爲人後者終係下賤嫡裔未便混行收考致啟隱匿冒考等弊乾隆三十六年議准山西陝西之樂戶浙江之丐戶雖編籍由來無可確據而

其相仍托業定屬卑污雍正元年因御史年熙鳴爾泰先後條奏准令除籍改業得爲良民正所以杜其邪僻之路非卽許其廁身衣冠之林也嗣後因酌定限制以清冒濫如削籍之樂戶丐戶改業爲良報官存案被濯舊污閱時久遠爲里黨所共知者自不便阻其向上之路應以報官改業之人爲始下逮四世本族親支皆係清白自守方准報捐應試該管州縣取具親黨里鄰甘結聽其自便不許無賴之徒藉端攻訐若係本身脫籍或僅一二世及親伯叔姑姊尙習猥業者一概不許僥倖出身其廣東之蜑戶浙江之九姓漁戶凡有

似此者悉令該地方官照此辦理所有從前冒濫報捐各生  
均行斥革再此等甫經改業之戶惟不准據行報捐應試至  
於耕讀工賈業已爲良應悉從其便如有勢豪士棍藉端欺  
壓訛詐者該地方官仍嚴行查禁懲治以儆刁風等因

卑府

查浙江九姓之漁戶准地方官照此辦理惟甫經改業之始  
不准據行報捐應試如報官改業之人下逮四世皆係清白

自守亦准照辦

卑府

現請裁漁課擬革除九姓漁戶名目自

應准令除籍改業得爲良民以杜其邪僻之路應請一併附  
奏肅具寸稟虔請



鈞安

同治五年三月

日稟奉

巡道憲和批既據通稟仰候

督憲暨  
藩批  
示錄報繳又奉

臬憲高批既據通稟仰候

兩院憲暨  
藩司批  
示繳又奉

藩憲楊批查此案已據該府稟奉

督憲批  
示到司另札行知矣仰即查照仍候  
臬司批  
示繳

又奉

藩憲楊札開案奉

督憲左批該府稟九姓漁戶准令改業爲良緣由奉批前據稟請

奏裁九姓漁課業經批司覈議詳辦在案茲復具稟請附奏准漁戶除籍改業所見甚是仰浙江布政司隨案覈議詳奪仍候

撫部院批示繳又奉

撫憲馬批該府稟同前由奉批前據該府請裁漁課卽經批司議詳在案據稟前情仰布政司會同按察司一併覈議詳

復飭遵仍候

督部堂批示繳等因奉此除覈議會詳仍俟奉到

憲批另行飭遵外合行鈔詳札飭札到該府卽便查照毋違

藩憲會詳稿

布政使司楊為遵批議詳事竊奉

督憲左批嚴州府稟九姓漁戶准令改賤為良緣由奉批據稟請

奏裁九姓漁課業經批示覈議詳辦在案茲復據稟請附

奏准漁戶除籍改業所見甚是仰浙江布政司隨案覈議詳

奪仍候

撫部院批示繳又奉

撫憲馬批嚴州府稟同前由奉批前據該府請裁漁課卽經

批司議詳在案據稟前情仰布政司會同按察司一併覈議  
詳覆飭遵仍候

督部堂批示繳各等因奉此並據該府具稟到司除請裁漁  
課一案先已覈議會詳外本司等會查學政全書內載乾隆  
三十六年議准山陝之樂戶浙江之丐戶雖編籍由來無可  
確據而其相仍托業實屬卑污雍正元年因御史年熙鳴爾  
泰先後條奏准令除籍改業得爲良民正所以杜其邪僻之  
路非卽許其廁身衣冠之林也嗣後因酌定限制以清冒濫  
如削籍之樂戶丐戶改業爲良報官存案被濯舊污閱時久

遠爲里黨所共知者自不便阻其向上之路應以報官改業之人爲始下逮四世本族親支皆係清白自守方准報捐應試該管州縣取具親黨里鄰甘結聽其自便不許無賴之徒藉端攻訐若係本身脫籍或僅一二世及親伯叔姑姊尙習猥業者一概不許僥倖出身其廣東之蜑戶浙江之九姓漁戶凡有似此者悉令地方官照此辦理所有從前冒濫報捐各生均行斥革再此等甫經改業之戶惟不准遽行報捐應試至於耕讀工賈業已爲良應悉從其便如有勢豪土棍藉端欺壓訛詐者該地方官仍嚴行查禁懲治以儆刁風等語

茲據該府稟請革除九姓漁戶名目概令除籍改業爲良係  
爲杜其邪僻予以自新起見應請如稟辦理第查九姓漁戶  
雖准除籍改業非卽許其濫廁衣冠所有報捐應試應仍以  
報官有案之人爲始下逮四世果能清白自守方准捐考以  
符向例理合覈議會詳仰祈

憲臺察覈除詳

督撫憲外爲此備由呈乞

照詳施行

同治五年六月

日詳奉

撫憲馬批仰卽如詳轉飭遵辦至九姓漁戶現有何姓每姓現有幾戶並卽飭令查明造冊通送備案以資稽考仍候

督學部院堂批示繳又奉

督憲左批旣准概令改賤爲良復不准其報捐應試必俟四世清白自守方准捐考雖係遵奉從前雍正年間

諭旨辦理然未免仍涉拘泥計自雍正元年至今一百四十餘年已歷四世矣此次旣已准其改賤爲良若仍俟四世清白方准捐考是同治五年奉行雍正元年

諭旨也徒予勢豪士棍欺壓之柄沒漁戶清白自守之實於



義無取仰卽悉心覈議改詳備案仍候

浙撫學部院批示繳又奉

學憲吳批示會詳九姓漁戶改業下逮四世果能清白自守  
准其捐考等情如詳准行仍候

督撫部院堂批示繳

藩憲札稿

布政使司楊札開同治五年七月二十八日奉

督憲左批本司等會議詳覆嚴州府九姓漁戶准令改賤爲良緣由奉批既准概令改賤爲良復不准其報捐應試必俟四世清白自守方准捐考雖係遵奉從前雍正年間

諭旨辦理然未免仍涉拘泥計自雍正元年至今一百四十餘年已歷四世矣此次既已准其改賤爲良若仍俟四世清白方准捐考是同治五年奉行雍正元年

諭旨也徒予勢豪士棍欺壓之柄沒漁戶清白自守之實於

義無取仰卽悉心覈議改詳備案仍候

浙撫學部院批示繳又同治五年八月初八日奉

撫憲馬札開同治五年七月二十七日准

督部堂左咨同前由札司卽便遵照各等因奉此遵查學政全書內載乾隆三十六年議准山陝之樂戶江浙之丐戶雖編籍由來無可確據而其相仍托業實屬卑污雍正元年因御史年熙噶爾泰先後條奏准令除籍改業得爲良民正所以杜其邪僻之路非卽許其廁身衣冠之林也嗣後因酌定限制以清冒濫如削籍之樂戶改業爲良報官存案板濯舊

汚閱時久遠爲里黨所共知者自不便阻其向上之路應以報官改業之人爲始下逮四世本族親支皆係清白自守方准報捐應試該管州縣取具親黨里鄰甘結聽其自便不許無賴之徒藉端攻訐若係本身脫籍或僅一二世及親伯叔姑姊尙習猥業者一概不許僥倖出身其廣東之蜑戶浙江之九姓漁戶凡有似此者悉令地方官照此辦理等語推原例意蓋以捐考兩途須清流品若今日改賤爲良卽今日准其捐考旣難保無冒混之弊且授地方以攻訐之端矧捐考必開三代正所以稽其來歷若三代中曾經服習猥業其子

孫卽不准捐考是以例載必自報官改業之人爲始下逮四  
世清白自守方准報捐應試不以從前定例之年爲始也此  
案九姓漁戶准其改賤爲良其捐考期限似應請照前詳辦  
理於義例庶爲允協奉飭前因除詳覆外合行鈔錄現詳及  
前詳札飭札到該府卽便轉飭遵辦毋違特札

同治五年十月

日札

藩憲覆詳稿

布政使司楊為遵批覆議覆詳事竊奉

督憲左批本司等會議詳覆嚴州府九姓漁戶准令改賤為良緣由奉批既准概令改賤為良復不准其報捐應試必俟四世清白自守方准捐考雖係遵奉從前雍正年間

諭旨辦理然未免仍涉拘泥計自雍正元年至今一百四十餘年已歷四世矣此次既已准其改賤為良若仍俟四世清白始准捐考是同治五年奉行雍正元年

諭旨也徒予勢豪土棍欺壓之柄沒漁戶清白自守之實於

義無取仰卽悉心覈議改詳備案仍候

浙撫學部院批示繳又同治五年八月初八日奉

撫憲馬札開同治五年七月二十七日准

督部堂左咨同前由札司卽便遵照各等因奉此遵查學政全書內載乾隆三十六年議准山陝之樂戶江浙之丐戶雖編籍由來無可確據而其相仍托業實屬卑污雍正元年因御史年熙噶爾泰先後條奏准令除籍改業得爲良民正所以杜其邪僻之路非卽許其廁身衣冠之林也嗣後因酌定限制以清冒濫如削籍之樂戶改業爲良報官存案祓濯舊

汚閱時久遠爲里黨所共知者自不便阻其向上之路應以報官改業之人爲始下逮四世本族親支皆係清白自守方准報捐應試該管州縣取具親黨里鄰甘結聽其自便不許無賴之徒藉端攻訐若係本身脫籍或僅一二世及親伯叔姑姊尙習猥業者一概不許僥倖出身其廣東之蠶戶浙江之九姓漁戶凡有似此者悉令地方官照此辦理等語推原例意蓋以捐考兩途須清流品若今日改賤爲良卽今日准其捐考旣難保無冒混之弊且授地方以攻訐之端矧捐考必開三代正所以稽其來厯若三代中曾經服習猥業其子



孫卽不准捐考是以例載必自報官改業之人爲始下逮四世清白自守方准報捐應試不以從前定例之年爲始也此案九姓漁戶准其改賤爲良其捐考期限似應請照前詳辦理於義庶爲允協奉飭前因理合遵批會議覆詳伏祈

憲臺察覈批示飭遵除呈

督學撫憲外爲此備由呈乞

照詳施行

同治五年十月

日詳奉

撫憲馬批如詳飭遵仍候

督學部堂批示繳又奉

督憲英批示如詳辦理仍候

浙學部院批示繳

[illegible]

稟裁九姓漁課應詳請 奏咨由

敬稟者竊

卑府

前奉

憲札內開此項漁課銀兩惟該府提解藩庫府地丁一欸係屬造報達部其徵解欸口銀數內外檔案又皆不符自應毋庸

奏咨等因奉此

卑府

伏查九姓漁戶課鈔載入建德縣志並

賦役全書此時既奉裁革必須詳請

奏咨若由外辦恐日久仍復舊徵而此弊不能永除且查雍正年間議准山陝之樂戶浙江之丐戶除籍改業得爲良民

浙江九姓之漁戶亦准照此辦理而其所以相仍托業至今未改者實因漁課未裁之故今既裁漁課並准九姓報官改業應以改業之人爲始下逮四世清白自守方准報捐應試此事須俟定案後九姓各戶方能報官存案查九姓漁課年完銀九十四兩五錢五分八釐皆係嚴州府衙門支用之欸內除修倉刑具充餉等名目作爲府地丁按年解司

題銷有閏之年解銀一十九兩六錢七分一釐無閏之年解銀一十七兩八錢一分仍照舊由嚴州府衙門於辦公銀欸內照數籌解外其餘銀兩向不報部皆屬可裁之欸應請全

行裁汰伏祈

憲臺察覈詳請

奏咨實爲公便肅具寸稟虔請

鈞安

同治五年九月

日稟奉

藩憲楊批查建德縣年徵九姓漁戶課鈔抵解府地丁銀兩  
前已會詳

兩院憲奉批自同治五年爲始永免徵輸其府地丁一欸由  
府於辦公經費項下按年提解在案今該守以日久恐復舊

徵稟請

奏咨所慮亦是仰候行令該府縣存俟修纂志書全書之時  
續增備查一面詳請咨明

戶部立案可也此繳

藩憲詳稿

布政使司楊爲詳請立案事竊查嚴州府每年額解府地丁  
欸無閏年額銀一十七兩八錢一分有閏年額銀一十九兩  
六錢七分一釐向歸建德縣編徵九姓漁戶課鈔銀兩由府  
提解司庫彙入通省地丁項下造報

題銷漁戶卽素習猥業之戶九姓則陳錢林李袁孫葉許何  
等姓其欸之來由代遠年湮檔案燬失實已無從追溯各漁  
戶以船爲家藉完課鈔易船名爲江山裝載嚴江過往商旅  
並藉以窩留娼妓亦係由來有漸地方官屢禁終難盡遏兵



三  
焚之後與民更新前署府概令削籍改業一律將年徵漁戶課鈔稟請永免徵解奉飭議詳遵經本司會同臬司議將是項漁戶課鈔請自同治五年爲始永免徵輸其應解府地丁銀兩永由該府於辦公經費項下按年提解以補缺額自此次免徵漁課以後並責該府將江山船窩娼宿弊實力永除詳奉

憲臺批准飭遵在案茲復據前署嚴州府戴守以年徵漁戶課鈔載入建德縣志並賦役全書現既奉准裁免若僅由外辦理恐日久仍復舊徵稟請轉詳

奏咨等情到司據此本司查建德縣年徵九姓漁戶課鈔抵解嚴州府府地丁銀兩既准於同治五年爲始永免徵輸其府地丁銀兩由嚴州府按年解補缺額事涉更張期垂久遠該署府既虞日久仍復舊徵應行請咨

戶部立案仍飭該府縣存俟修纂志書之時續增備查除批示外理合備文詳請伏祈

憲臺察覈俯賜咨

部立案爲此備由呈乞

照詳施行

同治五年十月

日詳奉

督憲英批仰候

撫部院覈咨繳又奉

撫憲馬批仰候咨

部立案繳

撫憲咨稿

浙江巡撫馬爲詳咨立案事據布政使楊昌濬詳稱竊查嚴州府每年額解府地丁一欸無閏年額銀一十七兩八錢一分有閏年額銀一十九兩六錢七分一釐向歸建德縣編徵九姓漁戶課鈔銀兩由府提解司庫彙入通省地丁項下造報

題銷漁戶卽素習猥業之戶九姓則陳錢林李袁孫葉許何等姓其欸之來由代遠年湮檔案燬失實已無從追溯各漁戶以船爲家藉完課鈔易船名爲江山裝載嚴江過往商旅

並藉以窩留娼妓亦係由來有漸地方官屢禁終難盡遏兵燹之後與民更新前署府戴守概令削籍改業一面將年徵漁戶課鈔稟請永免徵解奉飭議詳遵經本司會同臬司議將是項漁戶課鈔請自同治五年爲始永免徵輸其應解府地丁銀兩永由該府於辦公經費項下按年提解以補缺額自此次免徵課鈔以後並責該府將江山船窩娼宿弊實力永禁詳奉撫部院批准飭遵在案茲復據前署嚴州府戴守以年徵漁戶課鈔載入建德縣志並賦役全書現既奉准裁免若僅山外辦理恐日久仍復舊徵稟請轉詳

奏咨等情到司據此本司查建德縣年徵九姓漁戶課鈔抵解嚴州府府地丁銀兩既准於同治五年爲始永免徵輸其府地丁銀兩由嚴州府按年解補缺額事涉更張期垂久遠該署府既虞日久仍復舊徵應行請咨

戶部立案仍飭該府縣存俟修纂志書全書之時續增備查除批示外理合詳請咨明

戶部立案等情到本部院據此相應咨明爲此合咨貴部請煩查照立案施行

一咨戶部

同治五年十二月

日咨

三

稟禁止江山船窩娼請飭杭紹金衢一體遵辦由

敬稟者竊

卑府

前稟請裁建德縣九姓漁課奉

憲臺札開轉奉

撫憲馬批開如詳辦理准自今年爲始永免徵輸仰卽由司  
出示曉諭一面責成各該府縣務將江山船窩娼船隻實力  
查禁驅除盡淨其非娼船仍不准藉端勒索致干拏究等因  
奉此

卑府

伏查九姓漁戶設立歸於建邑納糧向有頒給油

票門牌之例其餘別姓船隻卽由該管縣分辦理今漁課旣  
奉裁減九姓遵令改賤爲良名目永請革除所有江山船隻



門牌無容歸建德縣頒給自應由該管縣分給予門牌收管  
至窩娼宿弊應令各縣實力示禁

卑府

現查江山船隻嚴郡

建德縣只有一號係屬陳姓其餘杭紹金衢四郡皆有敬祈

卑府

憲臺通飭各府一體嚴禁庶可以挽頹風而除惡習除  
出示禁止外理合據實稟明肅具寸稟虔請

鈞安

附稟刊刻簡明告示移行各府一律頒給實貼由

再稟者竊

卑府

前奉

憲臺批示飭令禁止江山船隻窩娼宿弊

卑府

查得嚴郡止

有一隻其餘杭紹金衢四府皆有稟請

通飭各府一律禁止

卑府

查九姓漁戶船隻向歸嚴州建德

總管現擬刊刻簡明告示一道分給各船實貼俾得周知除  
建德船隻業經頒發外所有杭紹金衢四府船隻擬卽將告  
示移行各府轉飭各縣並各船局一律頒給實貼謹將示稿  
鈔呈

鈞電是否有當恭候

憲示遵行又稟

同治五年五月

日稟

藩憲楊批據稟已悉仰候札飭杭紹金衢四府一體嚴禁此  
繳

稟請出示嚴禁江山船隻窩娼飭各府一體勒石出

敬稟者竊

卑府

前請裁嚴郡九姓漁課並准改賤爲良禁止

窩娼宿弊以維風化已詳奉

憲臺通飭沿江各府一體查禁在案

卑府

伏查九姓漁船窩

娼積習由來已久其擾害商旅敗壞風俗莫此爲甚自奉

憲示後各船皆知歛迹所有嚴州原徵漁課地方以及杭州

府之錢江紹興府之義橋金華府之蘭谿衢州府之西安向

係各船聚處猶恐日久弊生復蹈從前故習亟宜勒石示禁

以垂久遠伏祈

憲臺給示通飭杭紹金衢嚴各府一體勒石永禁肅具寸稟  
虔請

鈞安

同治六年二月

日稟奉

臬憲王批已如稟札飭各府轉飭勒石示禁矣仰卽知照繳  
示鈔發又奉

藩憲楊批仰候通飭杭紹金衢嚴五府卽將現頒告示勒石  
永禁並候

臬司批示繳

移杭紹金衢各府文

移知事照得敝府詳請

奏裁建德縣九姓漁課已奉

各憲批示並奉

撫憲批准在案此次免徵漁課以後並責

敝

府將江山船窩

娼爲害宿弊實力永禁務使驅除盡淨

敝

府查江山船隻不

僅嚴屬之船

貴府屬下亦有此船隻漁課既裁自應一律禁止稟明

藩憲通飭遵辦並

敝

府刊刻簡明告示呈送擬每船各發一

道實貼俾船戶無不周知現奉

藩憲批准理合備文移明爲此合移

貴府將移送告示轉飭各屬各船局頒給九姓船隻實貼俾  
得咸知以杜宿弊望速施行須至移者

同治五年六月

日移

鈔札飭建德縣免徵漁課札

札建德縣知悉照得本府稟請

奏裁九姓漁課已奉

藩臬憲會詳轉奉

撫憲批准自五年爲始永免徵輸合行鈔詳札飭札到該縣  
卽便遵照所有應徵漁課一項永遠停止特札

鈔黏札稿

同治五年五月

日札



鈔詳札建德縣准令九姓改賤爲良報官存案札

札建德縣知悉照得本府前稟九姓漁戶准令削籍改業已  
奉

各大憲批准在案合行鈔詳札飭札到該縣卽便遵照凡有  
九姓之人赴縣報明卽行註冊立案毋任胥吏需索致阻其  
向上之路切切特札

鈔黏詳稿

同治五年七月

日札

給示飭建德縣頒發九姓各漁船實貼札  
札建德縣知悉照得本府稟裁九姓漁課已奉

各憲批准自五年爲始永免徵輸業經鈔稿札飭在案本府  
現刊刻簡明告示凡有九姓船隻按船給發實貼俾得周知  
合行札發札到該縣卽便遵照特札

計發告示三百道

同治五年六月

日札

府示

九姓漁課錢糧

出自江山船隻

向由建邑完納

給發門牌油票

本府詳請奏裁

已奉大憲批准

定自五年爲始

課銀一概免納

並准改賤爲良

革除九姓名目

船中窩娼宿弊

嗣後永行禁止

各宜凜遵毋違

婦女不許下艙

倘敢仍蹈故習

立即嚴拏究辦

府示

曉諭事照得九姓漁戶課鈔向歸建德縣完納頒給油單門牌歷來課銀徵數無多而胥吏差役以公濟私浮收需索加增無數各船婦女花粉所資大半飽胥吏囊橐殊堪痛恨現本府稟裁課銀已奉

各大憲批准自五年爲始永免徵輸並禁止窩娼宿弊疊經出示曉諭自漁課既裁之後九姓船隻住處卽由該管地方收管無容再由建德縣給發門牌又復稟明

藩憲並札飭建德縣在案爲此示九姓漁戶知悉爾等如仍

以船爲業果能清白自守凡有胥吏差役人等無故藉端索  
詐悉准指名稟控以憑嚴拏究辦決不寬貸毋違特示

同治五年七月

日示

藩憲示

布政使司楊  
按察使司高  
爲出示諭禁事照得漁課各屬錢糧顧名思義  
完自捕魚船戶豈容藉以窩娼查有嚴屬之建德縣年徵九  
姓漁課九十四兩五錢五分八釐承完各戶易船名爲江山  
自錢江以至金衢一帶裝載客商窩留娼妓由來固已久遠  
屢禁終難盡遏據署嚴州府戴守以永裁漁課可除積習等  
情稟奉

撫憲批示覈議業經本司會同議請自同治五年爲始永免  
徵輸應解銀欸永令於該府留給辦公經費項下按年提解

並飭將江山船窩娼爲害宿弊實力永禁毋托空言徒裁稅額等情詳蒙

撫憲批示如詳辦理此項漁課准自今年爲始永免徵輸仰卽由司出示曉諭一面責成各該府縣將江山船窩娼船隻實力查禁驅除盡淨其非娼船仍不准藉端勒索致干拏究等因除行嚴州府轉飭建德縣免徵禁逐並通飭沿江各府縣一體查禁驅逐外合行出示曉諭爲此示仰完納九姓漁課人等知悉自同治五年起漁課錢糧永遠裁革爾等毋須完納惟自後不得窩娼其有以船爲家者亦不准再作娼妓

倘敢陽奉陰違一經察出定卽盡法究辦各宜凜遵毋違特示

同治五年五月

日示





藩臬憲勒石永禁示

布政使司楊按察使司王爲勒石永禁事照得防淫所以止邪移風乃能易俗查江山船隻窩娼積習由來已久名爲九姓漁船實則無異妓船其擾害商旅敗壞風俗莫此爲甚前據署嚴州府戴守稟稱禁止江山船隻窩娼先裁九姓漁課免致藉口完稅本司業經會詳

督撫憲批准自同治五年爲始永免徵輸並出示嚴禁窩娼宿弊通飭沿江各府一體查禁在案嗣又據戴守稟稱准令九姓改賤爲良所有士農工賈悉聽其便惟不得據行報捐應

試自報官之人下逮四世清白自守方准捐考以符定例又  
經本司詳准該九姓船戶已准除籍改業速赴嚴州府建德  
縣衙門報名存案被濯舊污各自向上船中如再敢窩娼卽  
行嚴拏懲辦凡有挾妓之人一併照例嚴辦絕不寬貸本司  
訪聞示禁後各船已知歛迹誠恐日久弊生又蹈從前故習  
爲此示九姓船戶知悉爾等旣爲良民毋再由邪僻之路致  
干重咎特示

同治六年二月

日示

裁嚴郡九姓漁課並令改賤爲良碑記

嚴郡建德縣之漁課始於明洪武年間九姓則陳錢林李袁孫葉許何相傳陳友諒明初抗師子孫九族家屬貶入舟居使之身爲賤業幾無異於校坊之設也由明至今數百年來漁課照完舟中所居之婦女名爲眷屬實則官妓迄今日久年深九姓之姓常存九姓之名已難遍考近數十年來船隻名爲江山各船購買婦女作爲眷屬以此營生船以奉官爲名官吏旣徵錢糧卽有不能禁止之勢漁課雖徵銀無多而胥役之在外浮收需索曾不知加增幾倍今欲禁江山船之

婦女則必裁建德縣之漁課查建德縣船裝冊載原額徵丁口銀二百一十八兩零雍正年間已攤入田地山塘均勻帶徵無庸議裁漁課一項仍照舊徵收共銀九十四兩五錢五分八釐除解藩司衙門銀無閏之年一十七兩八錢一分有閏之年一十九兩六錢七分一釐照例另行籌解外餘係府衙門修倉充餉等用皆屬可裁之款余乃爲之請於督撫諸憲將九姓漁戶課鈔永遠裁革於

國課無損於人心有益並准九姓改賤爲良查乾隆年間議准山西陝西之樂戶浙江之丐戶雖編籍由來無可確據而

其相仍托業定屬卑污雍正年間因御史年熙噶爾泰先後條奏准令除籍改業得爲良民正所以杜其邪僻之路非卽許其廁身衣冠之林也嗣後因酌定限制以清冒濫如削籍之樂戶改業爲良報官存案被濯舊污閱時久遠爲里黨所共知者自不便阻其向上之路應以報官改業之人爲始下逮四世本族親支皆係清白自守方准報捐應試浙江九姓之漁戶悉令地方官照此辦理乃因漁課未裁百數十年各戶仍習賤業而未改今九姓之課旣准裁免九姓之人可以改業矣惟改業之戶不准遽行報捐應試自報官之人爲始

下逮四世方准照辦至於耕讀工賈業已爲良應悉從其便  
如有勢豪土棍藉端欺壓訛詐者嚴行查禁懲治以儆刁風  
我

國家之立法至周且備是在地方官遵而行之從此漁課裁  
而九姓之婦女不准再作娼妓所以節其流也漁課裁而九  
姓之民人可以漸入士林所以清其源也今大府咨部裁革  
諸憲亦出示嚴禁庶數百年之民患可除而積習爲之一變  
其所以維持風化者匪淺鮮也是爲記

同治五年十二月

日立

詳九姓各漁戶報明身家清白造冊通送出

爲造冊申送事竊

卑府

前於同治五年在嚴州府署任內奉

藩憲楊札開會詳九姓漁戶改賤爲良緣由轉奉

撫憲馬批仰卽如詳轉飭遵辦至九姓漁戶現有  
何姓每姓現有幾戶並卽飭令查明造冊通送備案以資稽考等因奉

此

卑府

遵卽轉飭建德縣查明開送今於本年四月到任查

得建德縣仍未造冊送府無憑轉送復又飭查茲據建德縣  
潘令申稱遵查此案原卷內開於同治六年間據明堂船戶  
錢星源等八十八戶又漁船戶陳有富等一百零八戶共計



一百九十六戶先後開具三代年貌清單稟請入冊備案前  
建德縣沈令編字按戶入冊填給執照在案此外並無續報  
漁戶造具清冊申送前來

卑府

查九姓漁戶報明有案者止

有一百九十六戶其未報者不少該漁戶等既不報明身家  
清白難免不仍舊窩娼除再出示曉諭各漁戶迅速赴建德  
縣報明備案並嚴禁窩娼宿弊以期化賤爲良漸革舊習能  
多一清白之民卽少一窩娼之戶於風俗不無裨益理合將  
已報九姓各漁戶先行造冊通送俟有續報再行補送除申

撫憲暨

臬憲

憲外爲此備由呈乞

照驗施行須至申者

--	--	--	--	--	--	--	--	--	--

九姓漁戶報案花名

第一號錢星泉 第二號錢官林 第三號錢順進

第四號錢官海 第五號錢清福 第六號錢清海

第七號錢順招 第八號錢順卯 第九號錢清德

第十號錢星良 十一號錢順富 十二號錢新發

十三號錢招狗 十四號錢祥福 十五號錢官喜

十六號錢官春 十七號錢官弟 十八號錢順忠

十九號錢永祥 二十號錢心壽 二十一號錢榮富

二十二號錢招友 二十三號錢維元 二十四號錢小陽

二十五號錢雙喜

二十六號錢官慶

二十七號錢官富

二十八號錢心

富月

二十九號孫蘭鳳

三十號孫招福

三十一號孫招友

三十二號孫元福

三十三號孫雨田

三十四號孫坤發

三十五號孫兆隆

三十六號孫右有

三十七號孫早坤

三十八號孫廣有

三十九號孫坤泉

四十號孫瑞玉

四十一號孫早

壽喜

四十二號陳子榮

四十三號陳天揚

四十四號陳阿七

四十五號陳子明

四十六號陳子壽

四十七號陳子

旺五

四十八號陳閨貴

四十九號陳運泰

五十號陳招有

五十一號許學堂

五十二號許招福	五十三號許亦五	五十四號許早高
五十五號許長財	五十六號許士友	五十七號許照紅
五十八號何通紀	五十九號何通鑑	六十號何招福
六十一號何觀有	六十二號何允裕	六十三號林蘭春
六十四號林高隆	六十五號林阿五	六十六號林寄奎
六十七號林寄東	六十八號林大壽	六十九號林天榮
七十號林天富	七十一號林九臯	七十二號林順富
七十三號葉有公	七十四號葉新春	七十五號葉招鈞
七十六號葉雙喜	七十七號葉招福	七十八號葉招友

七十九號葉蘭壽

八十號袁紀明

八十一號葉元善

八十二號葉長明

八十三號葉紅毛

八十四號袁全福

八十五號袁全才

八十六號袁雙喜

八十七號袁招富

八十八號袁會友

八十九號陳有富

九十號陳如方

九十一號陳顯遠

九十二號陳顯珠

九十三號陳足富

九十四號陳月明

九十五號陳富有

九十六號陳照狗

九十七號陳灶富

九十八號陳雙有

九十九號陳照壽

一百號陳丈蘭

一百一號陳子林

一百二號陳順發

一百三號陳子通

一百四號葉記富

一百五號陳子有

一百六號陳帶有	一百七號陳照狗	一百八號陳高壽
一百九號陳招弟	一百十號陳重陽	一百十一號陳天福
一百十二號陳魁洲	一百十三號陳羅壽	一百十四號陳上懷
一百十五號陳狼松	一百十六號許下涯	一百十七號許長淇
一百十八號許楊安	一百十九號許嚴州	一百二十號許照友
一百二十一號許和尚	一百二十二號許灶美	一百二十三號許招福
一百二十四號許招有	一百二十五號許招弟	一百二十六號許彩富
一百二十七號許三妹	一百二十八號許心榮	一百二十九號許官榮
一百三十號許雙富	一百三十一號許福貴	一百三十二號許士寶



一百三號許麻車	一百三號許阿狗	一百五號許化涯
一百六號許早福	一百七號許早狗	一百六號許早祿
一百九號許發壽	一百四號許發有	一百二號許家富
一百一號許官元	一百三號許春財	一百四號許富春
一百五號錢老五	一百六號錢新友	一百七號錢新珠
一百六號錢春狗	一百九號錢三妹	一百四號錢新財
一百一號錢順有	一百三號錢新喜	一百五號錢月標
一百四號錢新順	一百五號錢新富	一百六號錢萬春
一百七號錢文炳	一百六號錢新楊	一百九號錢草包

頁六號孫林壽	頁六號錢天壽	頁六號錢天月	頁九號錢長生	頁三號錢毛良	頁五號錢新發	頁六號錢清明	頁三號錢順太	頁六號孫永康	頁六號孫祝狗
頁五號孫永康	頁六號錢天云	頁七號錢百年	頁七號錢新來	頁三號錢順福	頁六號錢新高	頁九號錢新冬	頁三號錢新唐	頁五號孫榮太	
	頁五號錢天寶	頁六號錢新奎	頁三號錢妹妹	頁六號錢雙喜	頁七號錢萬壽	頁六號錢早狗	頁三號孫榮太		

一百七號陳高富

一百六號陳魁元

一百九號錢有文

一百九十號陳福喜

一百八號陳老六

一百三號許玉弟

一百三號許容高

一百四號陳如其

一百五號陳榮高

一百六號孫百玉

桐溪記畧

潤州戴槃澗鄰氏著

桐鄉禱雨記

桐鄉辦災記

桐鄉徵收冬漕記

接濟災黎記

保衛鄉里記

桐邑育嬰堂置田記

桐邑書院置田記

金  
桐邑掩埋枯骨置田記

重修桐邑城隍廟記

重修桐署土地祠記

重修桐邑節孝祠記

重修桐邑養濟院記

附刻

乙卯入闈記

浙闈疊韻詩

捐送田地通詳文

補請立案通詳文

[illegible]

桐鄉禱雨記

戴槃

余蒞桐鄉任之明年夏大旱五月不雨六月又不雨民以爲憂余乃虔誠步禱桐邑舊俗旱甚卽將各廟神靈聚集於惠雲寺院每日拈香祈禱士民觀者如堵再甚又將各神於日中之時聚於荒郊外作禱雨狀余步隨於後至其地則百拜稽首一日之內步行十餘里東西南北周厯各廟自朝至於日暮一而再再而三且桐邑各圖一百七十有三四境之神鄉人肩輿來城者更番迭至余罔不隨時叩禱凡行香後於士民齊集之所曉以常情喻以大義如家人父子聚於一堂



士民咸感余之誠古人云誠能動物豈不然哉夫天下不患有頑梗之百姓而患無撫綏之良吏不患無感動之人心而患無轉移之治術是年兩浙全旱嘉湖尤甚各地方鄉民藉災滋事相繼而起大吏不能阻遏邑宰不能禁止嘉屬毆官拆署層見迭出閭災之始首秀水海鹽繼之平湖嘉善又繼之其餘嘉興石門雖未滋生事端而鄉之人紛紛聚衆閭閻公堂亦復不靖惟余宰桐邑獨晏然無事余知下民感余之誠而祈禱益急自丙辰五月下旬至七月中旬方雨余終日禱求至於三無一間斷問之僚屬僚屬不能觀之耆耆老

不能責之書吏書吏亦不能余乃於酷暑烈日之中奔走四  
旬有餘而天始降甘霖俾地方不被全災雖不敢謂祈禱之  
靈然亦可以對桐之民人而無憾矣是爲記

--	--	--	--	--	--	--	--	--

桐鄉辦災記

戴 槃

天道不能有盈而無絀年歲不能有豐而無歉地方之有災患其偶然也厯考前人辦災之法按畝履勘標籤爲記成災之田必須認真確查以昭覈實其法良其意未嘗不美而後人之嫌繁瑣者或將田畝所有之災合一縣而均攤之此二者皆不足以爲法也丙辰年大旱桐邑被災最重查例載災歉至五分以上應行停徵緣近年來軍務倥傯兵餉不繼大吏欲剔除災歉外將成熟田畝仍令照常完納而災區不得不爲之明辨焉桐邑鄉有六區十有四都三十有一圖一百

七十有三將欲按圖細勘非累月不能竟其事且一人之耳目難周奸民或因此買災書吏或從中舞弊余以爲按畝定災紛紜繁擾必參差而不一如欲矯其弊而統縣均攤則又苦樂之不均然則將用何法以辦之乎曰我行我法桐邑東西南北共十四區余乃分區親勘歷時一月酌量地勢之高下分別災數之多寡每區明定分數一一榜示萬姓靡不帖然心服而奸民不得逞其說書吏無所施其計書云以公滅私民其永懷是以令出惟行弗惟反也乃白諸上官上官不能爲予定此策商諸同僚同僚不能代予籌此事余執兩用

中惟求順乎輿情毅然獨斷行之不疑邑之人心悅誠服無異說焉鄰境之民聞之均欲仿余辦法後嘉興石門等縣亦踵而行之於以見天下事不患無法而患立法之不得其當也是爲記

--	--	--	--	--	--	--	--	--	--

四

桐鄉徵收冬漕記

戴槃

豐稔之歲辦漕難荒歉之歲辦漕猶難浙省嘉湖地方賦稅之重甲於天下厯逢開漕時鄉民聚衆滋事者無歲無之是以大獄頻興而官之膺是任者咸惕然懼余蒞任桐鄉於下車之始首先整頓漕務書吏之玩法者治之士民之包漕者懲之是年完納冬漕較之厯任大有起色然此猶同官所能爲也若夫大旱之年照例應行停徵卽有成熟之田亦應並緩况桐邑被災尤重何能言徵乃大吏以京倉缺米兵勇乏餉令剔除災歉所有成熟田畝照數徵收余不能不仰體斯



意是時也人心洶洶羣相觀望嘉屬各同寅均已去任惟余獨留桐邑接辦此事桐邑介乎海甯海鹽之間被災情形相同此二縣均奉文停徵桐之奸民聞之竊思煽惑愚民妄希停止考之邑乘桐鄉田畝四十二萬有零地畝八萬有零余謂田有荒田地無白地卽以地畝計之應完漕糧八千三百餘石况以外田畝尙有成熟者乎並細訪情形富民所有田地田多而地少貧民所有田地地多而田少乃親歷各鄉剗切面諭示以分數責以大義俾其中曲折周知而小民乃其願輸將是年冬嘉興等縣均易新任小民紛紛聚衆者如故

嘖有煩言嘒嘒不已思欲罷漕上官不能勸止邑宰不敢催徵互相袖手絕無善策余乃毅然獨任首先提早開倉桐邑完漕向有公米民米之分正臘兩月二次開倉方能全納余悉令冬月同時完納未及兩旬而漕米均已登倉鄰縣之民聞之僉曰桐鄉人先公如此我又何抗於是各縣乃次第開倉百姓方肯照完是歲嘉郡各屬漕糧共計二十五萬石有餘均能如數徵足於京倉兵餉兩有所濟是誰之功與夫一邑滋事而各邑効尤一邑急公而各邑率從其爲道易明其爲教易行也余曰顧國計尤不可不恤民生獨請於大府將

應完漕米內截留數萬石以爲兵米之用余於收漕時先將  
殷戶完數之多者概令完納其餘小民無力完納歸入南米  
俟麥熟後再徵國計民生兩無妨礙大府以嘉郡辦漕不致  
再生事端者皆余桐邑倡首辦理得宜之功登諸薦牘余喜  
桐之人爭先完納俾嘉屬之人相率而爲善良也是爲記

接濟災黎記

戴 槃

咸豐丙辰夏大旱桐邑被災最重收成歉薄

朝廷撫恤災黎向有大賑緣軍政倥偬募兵輸餉度支日絀未敢籲請入奏頒發帑金邑中因辦接濟以紓民力邑有募化千金保甯清風永新梧桐六鄉爲里二十有一爲都三十有一地勢肥磽不同高下不等乃擇被旱較重之區分圖勸辦余首出錢五十萬并勸城鎮殷富竭力助輸其積錢數百萬米數百石遵循舊章舉事自丁巳二月以至四月編查戶口按月散給於是災黎貧戶不至啼飢粗糲藿食以待有年

之穀非敢詡爲富鄭公之善策然亦一時救荒之術邑之賢  
士大夫相與有成也是爲記

保衛鄉里記

戴 槃

稂莠不除嘉禾不植除暴非以示威也所以安良而已嘉郡與蘇州接界又與湖郡相鄰桐邑則介居其間風鶴易警余咸豐五年十月到任六年春甯國失守江南告警各處土匪蠢然思動將欲攘外必先安內故勸辦團練爲救時之要策而又患練勇藉事生風反致驚恐吾民且慮富者因此遷移余出錢二十萬置備器械旗鈴以防不虞並另選幹役數十名作爲練勇捐廉按日散給口糧分布城鎮授以機宜並查拏匪黨聲色不動得保閭閻於乂安自春徂冬又用錢八十

萬初未嘗勞民之力傷民之財也夏四月間有土匪結黨拜盟立捕數人餘悉解散六月旱鄉鎮聚衆攫食謂之坐飯此風行於嘉湖由來已久桐邑尤甚或則婦女幼孩千百成羣以爲殷戶莫可如何長官亦難禁止余擇爲首之婦女懲辦一人以警大衆而此風遂息邑有土棍徐坤源者號爲惡魁在鄰境叠出巨案前宰是邑者稔知其惡因附從者衆恐激成事端未能拏獲徐怙惡不悛愈逞鬼域余於是年冬十月訪其蹤跡密懸賞錢十萬購線徐遂就縛歸案審辦蓋一方之巨蠹旣除而善良得安於里井矣是爲記

桐邑育嬰堂置田記

戴 槃

東門外新橋西育嬰堂創始於乾隆六年知縣余君必夔邑人汪兆鰲嗣後遞有助產出資者賴以久而不廢然堂內堂外收養人數無多余自蒞任後恐有遺棄嬰孩勸令廣爲收養但經費不足余出錢百萬置田百畝名慈幼堂通詳立案計每年所入之費可多收養數十人夫育嬰堂之規模至善也年月有司事編號註冊哺有乳婦病有醫小民之瘠貧者嬰兒生不能自育得以翼而長之此仁政也康誥曰如保赤子矧茲啼笑甫形不猶爲惻隱之所繫乎古人起蟄不殺方



長不折騶虞蒹葭載於風詩人爲萬物之靈詎可令其天札  
孔子曰少者懷之此民吾同胞物吾同與之意也故多收養  
一人則免一人之拋棄多收養數十人則免數十人之飢寒  
余置田之意正未有已也是爲記

桐邑書院置田記

戴 槃

書院者廣學校之教所以考德行道藝也桐邑有分水書院在青鎮乾隆丁未邑人沈啟震實始創建知縣郭君文置几案孝廉徐以坤置田三十畝歲久蕪穢棄去於是山長無修脯之資諸生鮮膏火之費近年月課獎銀無多課藝寥寥山長束修由縣備送每年僅及百緡恐久益廢弛士氣爲之不振余自蒞任來以培養人材爲急務常進諸生教以通經致用行文必宗經立義無爲空疏纖靡之文並以余書經集句文賦稿各授一部以爲法程諸生讀余之文頗躋余言於是

枕經昨史皆知門徑而肄業書院者頗有佳作余迺出錢百萬置田百畝有餘通詳立案戶名曰敷文堂亦望邑人踵起而增之也余之始蒞也下車觀風凡以文來質者皆有獎贈今去任之日更出洋銀三百番擇孝廉諸生之寒苦者而分給之非以示惠也余更有望焉桐邑先賢有輔漢卿者實得朱紫陽之傳以爲後學式嗣後忠孝儒林文苑彬彬可考讀聖賢之書習聖賢之言當遵先則古仰承聖天子棧樸菁莪之化人才蒸蒸日盛豈不美哉是爲記

桐邑掩埋枯骨置田記

戴 槃

古人掩骼埋胔爲仁政之大端况爲民父母者乎桐邑舊義塚地在邑厲壇側及附郭東南二里又皂林鎮青鎮募化鄉千金鄉濮院皆有焉然歲久叢葬幾無隙地又境內皆種植農桑少曠土是以貧民每棄棺於荒郊余下車之始首先勸令民間將浮厝之棺悉令營葬貧民無地者必爲之購地以歛遺骸今出錢百萬置田一百畝通詳立案將所得之資歸於育嬰堂兼管不另設一堂經理其事以節費也逐年收埋可期久遠矣夫死者之於生者其父母耶其兄弟耶其夫婦

子媳耶皆關骨肉之至親生既同其室死不能斂其形甚至  
爲烏鳶所食糴貉所殘蚊蚋所姑嘍斷未有不傷心慘目者  
特限於其力生者不能餬口將填溝壑之不暇故因循浮屠  
不使死者安窀穸耳葬之爲言藏也所謂老有所終者此也  
誠得司土之吏與邑士大夫諄加勸勉則澤及枯骨余猶望  
於後之君子也是爲記

重修桐邑城隍廟記

戴槃

城隍之祀其昉於三代乎古者八蜡有水庸說者謂水者隍庸者城也然古今之禮不同神之所司亦異唐令天下通祀始崇城隍之名明制皆封爵都會曰王郡曰公縣曰侯伯實命以守土之司以陰翊教化凡水旱疫癘維神是鑒故獄訟有疑不決者宿而禱焉奉祀弗虔是有司曠厥職也桐邑城隍廟在縣治西北一里明宣德五年析崇德地置桐邑知縣趙君中實建茲廟厥後遞有增修迨乾隆丁酉知縣潘君安智廣拓規模殿宇宏壯咸豐乙卯八月祝融告警正殿後寢

一炬而燼余十月蒞任後捐資五十萬錢勸諭城鎮共出資  
錢數千萬鳩工庀材丙辰八月正殿落成丁巳秋寢宮亦就  
廟貌巍峩棟宇邃穆更盛於前余懸額曰馮依在德誠以神  
之與人所謂陰陽表裏者也夫治民以仁事神以敬故神饗  
而民福此司土之責也自今以往雨暘無愆期人民無天札  
獄訟無枉濫詩云相在爾室尙不愧於屋漏豈俟夫鐘鏞之  
設酒醴之陳然後祭神如神在哉余願與後之守茲土者其  
勉之是爲記

重修桐署土地祠記

戴槃

桐署有土地祠者不知創於何時相傳以爲靈感凡遇獄訟有疑不決者宿而禱焉卽示以夢其靈驗如此前邑宰崔君爲余言之詳矣余自咸豐五年抵署捐資五十萬錢重加修葺奉祀維虔嗣後每逢朔望咸上香焉是廟也建於署內之西首殿宇狹隘旁有附屋丙辰冬十月役人不謹夜半旁屋火起烈焰甚張是屋在廟側逼近衙署上房其時滿署人心皇皇見火光外灼咸以爲不可撲滅余乃禱於土神前火旋滅衙署廟宇均各無恙閱日演劇以酬之余乃感神之有求



必應而靈莫靈於此矣夫神之與人惟德是依有司德不足以感神而神若無靈有司德足以感神而神愈顯其靈聰明正直而爲神神靈不同其靈感則一依人而行者也上古五行之官皆祀爲神勾龍司土也神爲后土詩云濯濯厥靈其桐邑土神之謂與而余更加敬焉余自蒞任後大獄未興人民無天賊氛逼近而地方之安堵如故雨澤愆期而黎庶之安分如故兩載以來災警頻仍而四境雍熙萬民和洽若相安於無事之天未始非斯神之所底佑也余乃報政成樂神惠焉是爲記

重修桐邑節孝祠記

戴槃

四德莫大於節百行莫先於孝

朝廷旌門有典專祀有祠俾春秋二仲上戊奉俎豆潔粢盛所以厚人倫正風化有其舉之莫敢廢也然則膺民社之寄者詎可忽諸桐邑節孝祠在縣治東肇於雍正二年知縣事陳君大慶擇明賢令曾君士彥祠基創立歲久傾頽乾隆壬寅知縣李君銓重修門堂呂君爾禧許君恂踵其成迄今六十餘年祠圯祀廢邑之紳士耆老盡然傷焉余蒞斯任讀徐始豐稿元末有禹淑卿者苗獠之亂投水死又讀貝清江集

明有濮彥仁妾龐氏唐氏自縊死未嘗不喟然太息自是厥後或夫死身殉或守志養姑教子載於志乘班班可考近日以來節義踵起凡志乘所不及書旌表所未及加與紳士大夫且將採訪而表揚之而顧使已列祀典者祐主委棄棟宇摧殘不獲灌鬱鬱獻祝帛久將無所稽焉非守土者之過乎余滋懼甚乃出錢五萬倡議興修凡節孝後裔感余之意踴躍助輸共得錢四十萬鳩工庀材輪奐一新迺於咸豐七年八月初二日舉行祭祀肅肅翼翼如也余考會典春秋每年祭祀銀五兩八錢一分七釐余更出廉銀六兩以爲祭費嗣

後春秋永定爲例是余區區盡職守之心願與紳士大夫共  
守之也是爲記



重修桐邑養濟院記

戴槃

城西門內舊有養濟院凡孤貧老民收養之以終天年舊志稱前後四聯其屋二十餘間養老民五十名爲額自乾隆八年迄今歲久傾圯老民外住者多在院者少余懼其漸歸廢弛將有名無實也余出錢二十萬以爲修葺之用賴邑之紳士大夫踵而成之夫王政在善養老古有國老有庶老有鄉飲酒之禮今禮文雖存幾成故事然老民之有子弟者教以孝弟雖貧猶不至凍餒若老而無子曰獨則無以爲家其親族鄰里絕無可依使無以收養之則此鮐背耆老之人不將

委於道乎是天生之假以餘年而人促之絕其生路也夫老者必多疾有瞽者有跛者有聾瞶者皆當矜憐而撫恤之故病則有藥死則有棺余之殷然於此事亦振頽起廢之一端也是爲記

乙卯入闈記

戴 槃

咸豐乙卯秋舉行鄉試適余自樂清辦理軍務事畢還省後  
卽派入闈余生平嗜文字自癸丑秋行抵江北留營辦理團  
練至乙卯樂清事竣將及三載武事畢而文教興余得與乎  
其間心竊喜焉獨念爲是事者亦大不易兩浙爲人文淵藪  
英才畢集不下萬餘人闈中同校者十六人每房分試卷六  
百有餘則例云三卷薦一五卷薦二遵是例也應薦二百餘  
卷豈不難乎余自分卷以來晝夜校閱凡有可薦之文不問  
典試者之好尙靡不呈薦是以同校諸君薦卷皆少而余獨



多其餘未薦各卷亦復重加校閱至於再三而後已焉蓋可信者人事也而不可知者天命也余亦盡余之心而已而此中更有奇焉者余在樂清辦理瞿逆謀犯一案因同謀之人名列膠庠者不少每與同官言曰今歲賓興溫郡士子如能中式一二人可以鼓勵衆心俾地方不致再生事端余所望也同官曰溫台等郡厯逢鄉試中數寥寥或數年而一中焉或十數年而一中焉此乃不可必得之事余聞其言而不敢過望迨至榜發日揭曉大半溫台處三郡中式者無一人余更無所望矣及填至七十有三名溫州瑞安劉生竟獲邀中

卽係余所薦之士諸同官對余言曰一念之誠可格上蒼其  
斯之謂與余謂人心卽天心也是爲記

[illegible]

浙闡疊韻

和薛慰農同年乙卯浙闡分校感賦六律卽步原韻

戴槃

卯歲重過舊夢圓

余膺癸卯鄉薦迄今一週

光陰虛度意悠然桂枝吐秀

爭新艷蘭譜同登證宿緣不信生平精藻鑑誰教文字落言詮鍾靈地愛湖山美鎖院掄才集衆賢

求賢子子召干旌衡鑒端憑哲匠明自是大才能大用須知經世本經生人誇足捷青雲上我願心清白水盟欲話當年辛苦味且欣分校盡豪英

四上春闈歷碌忙勞勞車馬者番裝鴻名自愧通經譽余刻

書文賦稿行世時鶚薦空膺選佛場余丁未壬子會試文集經均因額滿見遺漫

說入官緣學古敢云華國有文章宏篇鉅製琳瑯滿選向京

都費主張余壬子在京候銓有三科鄉會墨選

奮武揆文志願殊從來材藝不相符蜀岡羈跡頻年久余癸

京奉清帥福公咨留揚州大營委辦軍務甌郡從公與衆俱余以去臘赴溫州委帶練勇辦理糧台

歲月如流陰似箭秋風幾度露成珠戰場凱撤文場啟棘院

重遊欲問途

遙想金陵意亦灰武林返旆正歸來余五月下旬委赴江南查探軍情秋初回浙

儒生也作干城選

江南因粵匪盤踞士多投營効力者

碩彥空儲杞梓材

粵匪占踞

江南本科鄉試展期至戊午科

練勇先驅連潤邑

余籍隸鎮江奉委狂瀾欲勸捐辦團一載餘

挽仗雄才與君同是江南士惟冀天心意早迴

西泠毓秀盡英姿湖色山光亦逞奇人幸風雲多盛會兵銷  
日月耀重離傳心自有金針度放眼全憑玉尺持愧少瓊章  
酬唱答他山取助重相資

### 再疊前韻

皓月揚輝魄未圓棘闈重到亦陶然如雲多士添新侶舊雨  
聯吟話夙緣文字初交徵宿學詞源不竭具真詮雕蟲小技

皆餘事濟治從來重舉賢

連番疎雨冷簾旌忽喜晴開霽景明春色未看花縣滿

余壬子冬

部選桐鄉因留營至甲寅秋赴浙甲寅冬委署湯溪嗣因委赴溫州兩縣均未到任秋風正向桂枝生

登龍迴憶當年事附驥新尋此日盟

余籤掣十六房

二八升庭才濟

濟浙闈同考共十六人分行君獨領羣英

君掣籤第一房

檢點芸窗竟日忙安排經史不須裴居分西院鄰東院

浙闈東西

兩院余居西院喜得文場易宦場精見天心方講易吟符地數自成

章闈中詩題余擬作十首詩場鼓吹家聲遠麗句休誇錦繡張

莫謂同舟道誼殊辭章達到意均符

今科首題道不同兩章

詩賡伐木

殷勤和

次題詩云伐柯代柯三句

學共圍棋智慧俱

三題為是其智二句

漫說通經

文比玉誰能獻策語穿珠高吟況得江山助

詩題夜添山獨雨作江聲

關町畦早識途

紅燭燒殘蠟炬灰文章萬卷各分來

今科士子入闈者一萬二百餘人

甄陶

其沐菁莪化衡鑒誰為械樸材白屋功深覘實學

三場策問內有覘實

學之語

朱衣首肯即真才搜羅恐有遺珠賸子細評量閱幾迴

天開蕊榜盡仙姿文苑英華各吐奇彩筆花生都是夢元燈

光照已明離無才奪席慙虛譽

余書經集句文出作詩者有吾黨經生說戴憑之句

酒盈樽樂共持更幸一官同一郡爰山地近重先資

君補嘉興余授



桐鄉出聞  
後均赴任

三疊前韻

詩成玉潤又珠圓三疊重吟更自然身到棘闈新契合名登  
桂籍舊因緣未曾擊鉢連篇就欲待鳴琴治理詮莫謂曲高  
終和寡摛詞勉附衆英賢

回頭往事促行旌風雨重陽記憶明

余以去歲重陽後一日啟程赴浙家住

南梁經兩載

粵匪占踞揚鎮余移家南梁將近兩載

宦遊西浙訂三生良辰又

值登高節潔已常思勵水盟一詠一觴添雅趣敲詩但少菊

舒英

記曾歲杪出師忙薦及櫻桃始整裝

余壬寅臘月于役溫州樂城收復辦理善後至

今夏四月治佐赤城濱巨海

余壬寅冬委署台州同知今秋九月卸事

光明白地到

文場敢誇手筆空餘子

典試景公評余試帖詩有目無餘子之譽

自愧頭銜列薦

章

溫州事竣保奏以余收復樂城在事出力得加同知升銜

此處星輝奎壁照兵銷弓矢

不須張

南北東西道路殊

指兩江兩湖河南兩廣

幾人專闢掌兵符三年烽火

驚心久七省文闈展試俱

江左右及楚粵豫各省均停鄉試

虎氣深藏盈匣

劍蚌胎未吐媚川珠愆期更有黔陽地

貴州因土匪滋擾亦停鄉試

星使

言旋返半途

狼烟欲吐未成灰

今春粵匪竄入廣信徽州衢嚴兩府曾經告警

幸得羣英依舊來

地美湖山靈毓物天儲杞梓篤因材落梅空擬徐公畫

典試周公

評余試帖有如徐熙畫落梅偃仰欹側無一瓣平複之譽

香草難題薛子才

君以香草詩囑余題句尙

未屬筆

吟就如成三賦捷詩腸宛轉意頻迴

同詠霓裳倜儻姿吟風弄月莫稱奇鑒衡共信心能澈慈愛  
須知道不離甘雨隨車期渥沛文風振鐸賴維持此身願作  
循良吏尤藉觀摩益友資

### 四疊前韻

行欲端方智欲圓枯腸搜索韻依然重陽節過無多日三疊

吟成未了緣六十年前徽遠紹

余叔祖羨門制軍曾任山西臨縣乾隆乙卯分校棘闈

萬千卷裏妙能詮請君再把詞源倒況有聯吟哲匠賢

典試周公

和君原唱

多士心懸動若旌文章細勘校逾明詞壇錦繡胸中富學海

波瀾舌底生蟾窟分香攀桂子龍門得路結蘭盟題糕未擱

劉郎筆矢口成章質衆英

槐子黃時赴舉忙文闈試罷束歸裝驚心歲月曾三載過眼

秋風又一場詩並十聯皆鳳藻

今科闈墨試帖二十首

文符大衍盡鴻

章

今科闈墨四書經文共五十篇

待逢皓魄團團候

望日出榜

走馬同看蕊榜張

一樣題名數不殊竹林賢契適相符各房均中七名羣英領袖公明

占謂雪坡邊君得意揮毫我輩俱瑤階吳君與君均成三疊人綴巍科皆

是玉珍收滄海少遺珠諸君且答昇平樂自占文衡重宦途

多少英豪壯志灰嘉賓燕赴鹿鳴來門盈桃李初成蔭木樹

梗楠有異材羣萃俊人空地數浙闈正榜九十四名今科添額一名名符學士

副賢才浙闈副榜十八名惟期雲路同登客轉瞬春風得意迴

誰是游龍矯矯姿天生碩彥盡珍奇夢醒甜處都成幻興到

濃時又欲離句疊翻嫌分手速衡平常使寸心持今科考簾詩題鑑空

衡平積金空有詩囊富舊雨難酬贈別資典試周公余癸卯同年

五疊前韻

詞新面面意俱圓刻燭頻催蠟炬然廿四詩成添雅韻兩三

人契證前緣多聞益友吟相和難得乾剛理其詮

今科考簾文題吾未

見剛者一節

師訓未承函丈遠持衡同是爲興賢

余癸卯座師賈筠堂夫子今

科典試順天

聚奎堂啟駐文旌天上星輝分外明班斧弄成懷舊技

今科擬墨

敖君丹崖樂君蘭史吳君瑤階並君與余共成五藝

江花入夢感今生讀書愧我稱通

品余癸卯座師徐稼生夫子拈句憑君作主盟兩字功名

一字誤留心寄語後來英

君與吳君房中所得士卷因抬頭錯誤被黜

地近燕山選事忙桐溪再授束行裝

余原選順天順義縣因親老告近改選桐鄉

情因道路三千里試罷春秋四五場

余鄉試五次會試四次歸里難吟

東閣句

余癸丑春自都門返南揚鎮二郡均失守

歌詩頻頌北山章

余去秋抵浙親老至今

未能迎養

五旬未得平安報遙憶純鱸思比張

滇南冀北路懸殊次第分銓若合符

余胞兄壬子九月選雲南彌勒縣余十月選順

天順義縣蕊榜剛開英俊集

余銓選時值順天壬子科榜發後

花封疊選弟兄俱

壬子九月余胞兄弟次第銓

治求管見珍聯璧

余胞兄刻有求

治管見余刻有書經集

文未光騰櫝韞珠

余與胞兄同赴秋闈四次至癸卯鄉

薦兄已

以講武掄才心事異睽違兩地幾程途

余胞兄奏留皖省委辦軍

務現保舉以知府卽選

十年兩劫燼成灰

潤城道光二十二年夏夷人占踞咸豐二年春又被粵匪占踞

渡阻西津

莫往來

粵匪占踞揚鎮南北道路梗塞

試展南邦遲歲月場開北地聚英材

今科士子因各省展試均赴北闈

時逢卯運家聲振

余家科名卯年最多

學裕丁年國

士才虎榜題名期後輩

余受業胞姪赴北闈應試

桂宮能否折枝迴

水泛西湖有令姿鍾靈毓秀出英奇師門望切空惆悵

余癸卯

房師朱半塘夫子籍隸海甯去冬仙逝未能謁見

試院吟殘又別離父母名稱期不

愧余乙未入泮文題此之謂民之父母

膠庠教重化能持通經致用非虛語一

代文章百代資



六疊前韻

中秋節過月重圓休道更闌意索然矢口吟成添雅韻仙心

詠雜絕塵緣名占易卦會超俗

余刻有易經卦名試帖兩卷

和記詩章有

正詮起草未經標姓字不知誰是冠羣賢

爲表爲坊善其旌頻將鼓吹頌休明十年學積憑匡子四代

經傳本伏生

余嗜學經籍尤嗜讀書

理欲源頭心早判

余癸卯鄉薦首題顏淵問仁三

句公私眼界志常盟

三題詩云雨我公田三句

君恩高厚如天地

二題上律天時

四句

余選桐鄉癸丑引見時值湖北奏請揀發

同班三人均改往湖北余以親老告近未經發往得到西

冷拔俊英

負笈來遊士子忙衣冠雅稱是儒裝詩成舊雨聯新雨奎聚

南場憶北場中額廣添新俊秀

壬子春臨雍太學照例廣額今科北闈舉行

精心

同撰大文章觀聽回首園橋地

壬子臨雍余躬逢盛典

好句吟成紙幾

張

余親觀臨雍盛典和有詩章

吳越疆分地理殊歲逢卯兔運相符科名增減憑天定

庚子江蘇

中額誤加一名癸卯補皖省一名

文字興衰自古俱

今科江南因粵

減額一名今科浙省增額一名

匪占踞末能開科

一鑑高懸心若鏡六星朗照氣如珠獨鳴天籟成

天趣何必升階戀仕途

余入闈日浙省保加升銜薦章甫發兩江制軍怡以余在揚州大營督辦

團練防剿出力擬以同知留浙補用嗣於咸豐六年奉旨

幸得吹葭未動灰秋光猶記自西來湖山本是鍾靈地廊廟

誰爲出衆材去歲武功曾論賞

余督揚郡各屬團練擇出力之士保舉廿三人嗣奉兩江

督憲怡俯准所請會摺保

今科文事又衡才元戎褒語差稱

奏於咸豐六年奉旨

未奏膚功首莫迴

幹余留江北營漕帥福公司寇雷公咨

部考語有人甚勤幹人頗幹練之稱

鈞心鬪角挺殊姿象數麟編莫擅奇

今科文經到明通皆註

脚典試周公評余擬墨有

詞多附會總支離十三藝絕羣言

挹典試周公評解元文

有川六詩成大筆持自信斯文除漲墨

鐫梨留作後人資

余擬墨刻入

捐送田地通詳文

詳請立案事竊照

卑職

承乏桐鄉於茲兩載凡地方公事有

裨益於士民者無不盡心籌畫查桐邑向有分水書院爲生  
童肄業之所有嬰堂爲收養幼孩之地又桐邑風俗暴棺於  
野延不掩埋甚至有以火葬者以上三事

卑職

於撫字催科

之外細爲採訪知書院之膏火獎賞經費無多知育嬰堂之

養育撫綏經費不足並知民間之棄棺不葬一由於野無曠

土一由於貧無葬資當經

卑職

勉捐廉俸錢三千串置買田

地三百畝零每處各捐田地一百畝零發交各司事經管並

分別註冊立戶由各司事收租完賦作爲各處費用仍飭各  
司事議立規模於年終將經手進出各款呈縣備案以昭覈  
實誠恐事難垂久有初鮮終善舉廢弛仍無實濟思維至再  
理合備文呈詳仰祈

憲臺察核俯賜立案實爲公便爲此備由具申伏乞照詳施  
行

咸豐七年八月 日詳

咸豐七年十二月奉

府憲札轉奉

撫憲晏 批桐鄉縣具詳分水書院並育嬰堂及掩埋經費  
不敷現捐廉俸三千串置買田地三百畝交司事收租完賦  
作爲各處費用呈請立案緣由奉批捐錢置產以作書院嬰  
堂以及掩埋經費洵屬善舉據詳前情仰布政司迅卽核覆  
飭遵此繳等因除呈復並於縣詳批示外合行札知札府卽  
便轉行遵照批飭事理督令各司事妥議規條務垂久遠仍  
將收支各數於年終造冊送司查核毋遲又奉

藩憲徐 批該前縣戴令捐廉置產作爲書院嬰堂掩埋三  
款經費之用俱屬有益地方嘉惠士林之善舉洵堪嘉尙現

奉

撫憲批示仰嘉興府查照另札遵行飭令各司事設立規條  
務垂久遠切切此繳又奉

臬憲段 批該前縣戴令詳分水書院等經費不足捐廉置  
產買田詳請立案由奉批仰嘉興府核飭立案仍候

兩院憲暨

藩司核示繳等因奉此合行轉飭知照嗣奉

巡道憲葉

批據詳嬰堂書院等處經費不足該縣捐買田

產洵爲好義可嘉仰卽飭令各司事妥爲辦理毋使日久廢  
弛切切此繳又奉

糧道憲王 批據詳該縣地方書院嬰堂經費不足且民間  
有棄棺不葬之風業據捐置田畝以資各項經費具見盡心  
民事殊堪嘉尙仰將議立規條及經手司事姓名開摺呈候  
核奏毋稍遲延切切此繳



--	--	--	--	--	--	--	--	--	--

三  
フ

補請立案通詳文

爲補請立案事竊照

卑府

前在桐鄉任內捐廉三千串置買

田地三百畝零以爲分水書院育嬰堂及掩埋枯骨經費於

咸豐七年七月申詳

前撫憲晏暨

繼

憲均奉批示在案當飭經書魏學治協同

各董經理其事將田畝坐落圖分細數並佃戶姓名完米完錢數目造具清冊呈送由各堂司事逐年收租以歸公用在案現經兵燹各衙門冊卷蕩然無存茲特將原詳並奉

前憲批示鈔錄一紙補請立案所有田畝坐落圖分細數以

三  
及各佃戶姓名另鈔一冊札發桐鄉縣轉飭原董經書查照冊開按圖稽核清楚仍令各堂司事酌量收租歸公應用理合備文補詳仰祈

憲臺察核俯准立案實爲公便爲此備由具申伏乞

照詳施行

同治三年十一月

日詳

同治三年十二月奉

署理藩憲楊札轉奉

護理撫憲蔣批該守詳補送前在桐鄉縣任內捐置田地作

書院嬰堂掩埋三款經費原詳並憲批詳請備案等緣由奉  
批布政司飭卽照錄原捐田地坐落畝分及佃戶姓名細冊  
呈送備查並飭現任桐鄉縣將所收租息支用經費各數按  
年造冊通送核銷勿任違延此致鈔詳存等因奉此查據該  
守並詳到司除批示並札飭嘉興府轉飭遵辦外合行札知  
札到該守遵照卽將原捐田地坐落畝分及佃戶姓名細冊  
鈔錄一分逕送

撫憲另鈔一分送司查核毋違又奉

署理藩憲楊 批現據該守詳奉

護理撫憲批行到司仰卽查照另札遵行繳又准嘉興府許移開轉奉

代辦臬憲林批貴府稟前在桐鄉縣任內捐買田地以作分水書院膏伙收養嬰孩掩埋棺骨經費之用現經兵燹冊卷蕩然詳請立案等緣由奉批希嘉興府轉飭鈔詳立案並移該守知照仍候

撫憲批示此復又奉

兼護糧道憲薛批已札飭桐鄉縣將所捐田地按圖稽查交各堂司事收租歸公矣希候

撫憲批示此覆



自古通經致用三代下西京最多如賈長沙董江都匡鼎來  
劉中壘諸公皆本經學爲經濟其議論文章照耀史冊他如  
文翁治蜀龔遂治渤海張敞治京兆教養黎元咸以經術飾  
吏治爲兩漢循吏冠黃霸治潁川亦深得吏民心至天子下  
詔褒美賜一丈車可謂盛矣乃一登相府名譽遂減說者謂  
經學疏也公孫宏以對策躋大位經生譏其曲學阿世此又  
經術未純也戴崇從學張禹說經奪重席世稱其愷悌多智  
得與後堂絲竹師亦重其爲人此又敦行誼而非專以經學  
顯也然經學之重於古如此當今荒經蔑古大率皆空疏謏



陋間有能詩文名通經者試以吏治無論古之循良政績莫能舉也卽簿書狀判亦惛然莫辨無怪乎以異途進者輒譏經生爲迂濶而遠於事情嗚呼通經豈若是哉丹徒戴澗鄰觀察起家縣令初宰我桐鄉以實心行實政百廢具舉百姓愛之上遊重之

憲采

屬部民時幕遊江蘇偶一旋里晉謁知

非風塵吏也人皆知其文賦本於壁經風行海內羣艷稱之而不知其吏治之善皆由經學中來今公已擢升監司攝篆

睦州

憲采

於分水權鐸又以屬吏謁公見公名位日隆勲德

日懋而起居簡泊言論藹如仍是宰桐時書生本色此內重

外輕經學之力也益嘆公真不可及矣退而得讀其宦遊記  
畧大半記宰桐時治蹟皆憲采所耳熟能詳且嘗身受者也

其中如禱雨救荒養濟育嬰保衛鄉里皆養民善政也掩埋  
書院置膳田重修節孝祠皆教民善政也夫諸善政皆以實  
心實力行之卽擬諸兩漢循吏誰不謂然今雖遭浩劫善政  
至今尙存士民猶謳思不置嘗謂吏治之壞一壞於資郎以  
市道治一壞於書生以迂疏用彼此環相笑而民生日困倘  
得如公者數人分布於監司郡守間以身說法督勸吏治吏  
治日有起色民生亦日有生機乎余讀公之書有以見公之

心因跋數語以告世之實心爲民者同治四年乙丑嘉平月  
桐鄉孔憲采謹跋

桐溪記畧題辭

上元  
朱緒曾述之

解經不窮戴侍中詰屈盤詰文能通點竄塗改學韓子筆補  
造化真天工經綸手段試小邑釀爲甘雨噓和風舒之桐鄉  
昔朱邑禾之桐鄉今戴崇三年政成民俗化縣譜一一談始  
終中牟三異不足數使君八政福我桐巍峩廟貌肅城社明  
禋鐘鼓神無恫手置腴田贍膏火絃歌石室師文翁肉帛常  
給帶索叟黃口乳哺胥帡幪柏舟烈性保霜幹蒿里殘骸掩  
露叢束皙請雨足三日富公出粟飢爲豐探丸赤白縛且治

風鶴聲息無伏戎  
及基之山青如葱  
桐民頌遍君侯功  
君侯更躍五馬騶  
卽看郭伋迎兒童

新城楊炳子萱

使君八政飭官方  
治譜蔚然經籍光  
記畧一篇輿論在  
古今循吏兩桐鄉

雷封百里比諸侯  
接壤當年溯景猷  
愧我河陽曾綰綬  
蠻花攸鳥異中州

旌德呂朝瑞九霞

何堪一炬燼成灰  
吉日鳩工更庀材  
神所憑依原在德  
桐溪

幸有使君來

神敬

經術文章世其傳人才樂育教爲先寒儒都入春風座豈獨

膏腴百畝田

育士

謀深頤養一心殫燕息能教老者安從此棲身欣得所羣居

不畏雨風寒

養老

最憐拋棄是嬰兒收養毋教道路遺一念誠求如保赤斯民

均已被仁慈

慈幼

門旌節孝重

朝廷祀列春秋黍稷馨何忍摧殘梁棟圯一新輪奐慰貞靈

金貞

甲令森然甫下車首先營葬弊宜除傷心骸骨無人問立法

常留德澤餘

義尙

烈日炎炎禱上蒼民情愛戴不能忘天災竟使秋成薄惠及

黎元徧六鄉

恤貧

鄰氛逼近變潛生除莠安良令出行民力民財均未用閭閻

依舊樂

昇平

安良

通州

沈錫慶

鷺鄉

祭神如神在春秋祀典循威靈瞻赫濯廟貌一番新重修城隍廟

教學本為先士乃四民首培養百畝田法垂期可久分水書院置田

窮民無所告蔀屋宜周知不為秋風破老者恒安之重修養濟院

保赤在誠求毋令遺道右仁政本仁心斯民歌眾母育嬰堂置田

旌門重節孝松柏守貞操祠宇何堪圯經營不憚勞重修節孝祠

蔓草荒榛裏傷心暴骨遺掩皆仁政及經理事兼司掩埋枯骨

夏日炎如火災荒旱象成萬民仍飽德四境不呼庚接濟災黎

風鶴忽相驚滿目成荆棘思患而預防能令羣動息保衛鄉里

瀨水  
宋邦德  
惠人



口碑遙頌厥勳隆治術都憑學術通文字久傳江左右政聲

已播浙西東才施百里來鳴鳳路過雙橋映彩虹

雙橋鳴鳳里皆桐鄉

地名車下桐溪逢愛日駕行桑野重觀風菁莪育士英賢聚黍

稷升香廟貌崇夏屋同登偕白首春臺其上到黃童貞魂猶

表堅松操白骨無遺細草叢保甲常嚴爲警鶴呼庚不聽泥

哀鴻成功未待三年久向化都看一道同鶴俸頻分先倡首

雞廉自守克持躬飛鳧治洽稱朱邑想象人思仰召公豈獨

龍章邀寵錫

詔頒丹陛

聖恩洪

公在桐鄉縣任已膺二品

封典

金沙  
潘文耀  
星垣

膏澤如甘雨萬民歌召父鉅製傳八篇芳名足千古  
仁政行在心德政碑在口立功還立言三者俱不朽  
文章驚海內政治播浙中揮金先倡義兩袖仍清風  
幸上長安道與君話別離一斑今畧見豹向管中窺

無錫  
秦廣彤  
臨士

奪席高才世共推醇儒經濟復昭垂八篇鉅製爭千古卽是  
桐溪萬口碑

誰堪民俗挽頽風遺愛人爭仰召公從此政成登上考雙旌

五馬溯西東

叨同蕊榜十年餘又值京華慰索居我尙雕蟲君展驥冀黃

治譜又何如

同里 劉成忠 子恕

治術文章並擅長八篇雅記卽鴻章三升秩已黃堂晉

公在桐鄉

任三膺薦章去任時已保舉以知府補用

名達

天衢姓氏香

通經致用讀書家政事敷陳亦孔嘉爲令無慚平仲後猶留

遺愛頌西華

公去任時邑人公送匾額曰西華遺愛

供徧香花滿路稠邑中齊拜小諸侯四民願奉長生位

公去任後

節孝祠等處均  
供長生祿位

父老攀轅計莫留

扁舟無恙泛清波萬姓歡呼夾岸多六十里中喧鼓吹笙歌

一片達嘉禾

君去桐鄉赴禾郡邑人  
僱舟演劇送至嘉興

秀水沈濂蓮溪

憶昔出守古潤州下車問俗採名流人文會萃多豪傑通經  
惟君拔其尤未幾量移轉他郡果然鵬鶚騰九秋信是名下  
無虛士中心景仰不可求我今養拙林泉裏君今宦遊來浙  
水出宰桐溪會有時聞之竊爲蒼生喜當年相士識澹臺今  
日爲官推宓氏治邑不異烹小鮮愛民無殊保赤子救災捍

患遇權謀除莠安良靖閭里口碑載道同一辭但聽斯民歌  
樂只君之抱負本非常才大何可斗升量操刀一割聊奏效  
百里詎足騁龍驤况當強仕年方壯經術吏治世所望願君  
盡展平生志毋若老驥伏櫪徒自傷

嘉興  
錢應溥子密

三山鼎峙大江濱毓秀鍾靈自有人攜酒曾留高隱迹說經  
不愧侍中臣門開甲第家傳笏學富丁年席貢珍銓選掄材  
分兩泐翩然作吏到風塵

琴鶴相隨泛棹船盈盈一水赴桐川羣歌叔度來何暮共仰

王喬至若仙花落訟庭無累牘風清官舍聽鳴絃誰云百里  
非賢路且試牛刀割小鮮

無端亢旱害嘉禾賢宰焦勞奈歲何澤有哀鴻先撫字村無  
吠犬息催科仁孚子惠羣黎感民免庚呼德澤多冒暑勘災  
來四野車隨甘雨召天和

盤根錯節歷艱虞游刃方知利器須信是實心行實政從來  
名吏本名儒冠公願借安民社劉守難留餞道途早卜循聲  
推第一

君授職桐鄉時余贈聯句  
有循聲第一重吳公之句

果然名薦達

天衢

桐鄉

周士炳

蓮史

祝融災邑廟騶從未來旬鳧鳥飛翔至鳩工結構新馮依神

在德

君題邑廟額曰馮依在德

祈禱福斯民猶憶良苗稿油然降澤勻

敬神

廣廈貧寒庇慈君願不虛良田儲餼廩多士樂詩書表率延

鴻博侵漁禁蠹胥

公捐置田畝通詳立案以杜侵蝕

至今桐水側人共帶經

鋤

育士

鰥獨窮無告仁恩所必先旃幪依德庇衽席得安眠夏屋渠

渠地春臺皞皞天從茲看白叟引養盡餘年

養老

欲廣慈祥德君從幼幼推名無慚衆母惠更及遺孩黃口欣

含哺蒼生幸免災兒童騎竹馬賢守盼重來

慈幼

蔓草荒祠裏貞魂久不歸冰霜揚節烈榱桷建崔巍祭祀春

秋肅精靈左右依幽光潛必發風化振閭闔全貞

暴骨嗟無主仁人動慘悽生皆爲赤子死豈異黔黎藥土遺

骸斂碑文義塚題省耕來野外屢爲駐輪蹄尙義

旱魃爲災虐啼飢通道途捐廉先賑粟度地議蠲租境絕飛

蝗入丙辰歲旱並苦蝗桐邑民皆涸鮒蘇西華遺德政公去任時

閩邑公送匾額日西華遺愛士庶效揚掄恤貧

不禁荏苒盜鄉間曷以安渠魁身就縛餘黨膽俱寒守望家

爲保嚴威猛濟寬綠林羣歛迹四境共騰歡安良



桐鄉 陸秉樞 眉生

鳳凰鳴矣于彼中鄉梧桐生矣于彼高岡君子至止朱芾斯  
皇靖共爾位綱紀四方遠猷辰告萬民所望父母孔邇邦家  
之光

豈弟君子民之攸歸哀此鰥寡我儀圖之哀此惇獨于時保  
之小子有造飲之食之成人有德教之誨之羣黎百姓中心  
喜之

旱旣太甚民人所瞻六月徂暑赫赫炎炎以祈甘雨稅于桑  
田敬恭明神瞻仰昊天靈雨旣零迄用康年邠伯勞之四方

于宣

四牡彭彭入覲于

王邦畿千里道阻且長何斯違斯莫敢或遑繫之維之躋彼  
公堂召伯所憇蔽芾甘棠維桑與梓允懷不忘

桐鄉 嚴 辰 溜生

昔游京華地品概仰嶙峋心胸羅典籍懷抱裕經綸卯年登  
桂籍同譜迹相親文章驚海內讀之繫節頻忽聞膺

簡命來遊桐水濱歡心生鼓舞賢宰慶得人識面思已舊觀  
化喜從新盟心如白水有腳如陽春爲政無他求潔已而愛

民捐貲養老幼傾橐賑窮貧盈門植桃李礙道剪荆榛麥隴  
無蝗入桑田有雉馴居官方兩紀風化使之淳無奈神仙吏  
不久困風塵長途馳驥足巨壑縱鯨鱗君來深景仰君去曷  
遵循絃歌思雅化雨露感深仁何時鳳鳴鄉秉節復來旬

同里  
尤英  
杰菴

憶昔見君攜文詞羨君勇敢不自疑周誥殷盤信筆爲詩成  
得意珠璣垂又嘗聞君動高論風生獵獵流泉噴滿堂聽者  
無不遜攬言欲入安足溷生平膽畧類如此知君爲政亦復  
爾遠寄桐溪記相示果然百務煩劇理小民謳吟上官喜桐

溪西接吳淞水香名日至滿余耳卜君功業方未已不獨富  
貴耀鄉里

同里  
韓弼元 叔起

戴君示我桐溪記記中備述桐溪事政拙催科勤撫字桐溪  
流水清且淪中含惠化熙如春出作入息桐溪人君去桐溪  
今幾載桐溪溪色長不改道旁口碑與俱在五馬翩翩出  
帝都昔綰墨綬今銅符桐溪竹馬羣兒趨軍興郡邑多徵  
賦願君一視均仁恕不獨桐溪歌襦袴

同里  
莊兆曾 慕沂

桐溪之水何清駛黃童謳吟白髮喜使君政與爰山峙理明  
格出勤撫字洋洋沛澤及枯齒女貞之木靈光歸昊魑潛逝  
溝瀆起梧桐鸞鳳化棘枳尾間鏡清海波委朱邑桐鄉如一  
軌江東氛高夕烽紫道旁瘡痍走顛趾君來鄉邦勞化理蔀  
屋欣欣拭目視廣平甘雨差可擬不獨淞西歌樂只

同里  
顧敦敏 厚齋

其仰鴻猷裕流傳姓氏揚八篇真學問千古大文章奪席才  
難匹通經素所長名言宗四代雅韻逼三唐虎榜欣同列蟬  
蛻獨早望救荒勤梓里

簡命授桐鄉布政遲及邑從軍住蜀岡元戎期禦敵勁旅率  
成行棄甲人潛遁艱辛已備嘗成功先鐵甕作宦到錢塘台  
郡嚴分守威坪重設防除奸來樂邑校士入文場撤棘辭圍  
院鳴琴蒞政堂隨車甘雨至被野惠風颺郅治馨香薦英賢  
教育忙垂青深引養保赤重慈祥欲表丹心烈能令白骨藏  
發棠休請命除莠自安良次第洪綱舉從容細目張捐金膏  
澤下如玉德音臧兩載留嘉績三遷達薦章仁纔周綠野秩  
已晉黃堂頌徧循聲著生期祿位長

天顏方入覲

九陞沐

恩光

甘泉 錢國珍 子奇

注禮傳家世澤延宏才小試喻烹鮮說經早奪匡劉席布化  
同稱召杜賢仁粟溥施成義社慈雲分潤挹廉泉且看涇上

梧桐樹鳴鳳曾棲百尺巔

桐邑有梧桐涇昔有鳴鳳集其上

嘉禾惠愛澤甘棠攜李城中治績彰瑣院衡才襄玉尺

乙卯分校

書田養士散金秬

捐資置田爲分水書院膏伙資

催科先重農桑課判牘都

分翰墨香信是儒生能報

國由來經濟卽文章

漢家朱邑頌桐君治行超遷早軼羣五馬高門崇峻望雙熊

華轂表殊勲宦游徧覽湖山秀政績無忘夙夜勤數疊新詩  
珠玉富幸從藻翰領奇芬

公暇先將治譜修廉平矜式仰嘉猷清風蘇白薇堪紹茂績  
龔黃德最優驥足原難羈百里鴻名端合炳千秋他時旌節  
隄封廣猶記爰山宦跡留

饒宗孟

梅衫

城復于隍語義經卦義呈數問開殿宇三尺仰神明鬼膽真  
能破陰天入望驚馨香通治理消厲召和平

敬神

石室傳文黨絃歌起武城萬言師賈誼六藝問康成望汝鵬



程遠慙余鶴俸清不須銘陋室長吏已經營

育士

衰年筋力盡煢獨一身單骨瘦雙肩聳腸枯百慮攢西周王

者養東魯聖人安起廢添升斗長涸涸鮒瀾

養老

名言徵老氏林總聖人孩況此呱呱泣能無惻惻哀漏天憑

石補寒谷待春迴不負歌慈母羣歸保抱來

慈幼

厯盡冰霜苦頽垣劇可傷喜來新令尹重煥舊祠堂克荷綱

常重能爭日月光兩家欽姓氏瞻主拜蒸嘗

全貞

不作莊生達恩深到九泉青邱護松櫨白骨遠烏鳶霜露情

何極賢愚魄共連使君多善政此澤足千年

廣仁

救荒籌善策棘手濟時艱貶食先殷富揮金起病孱聚防瘟

作祟散慮吏爲姦百里權輕重無私痛癢關

恤貧

除暴安閭里兼防賊暗挑養鷹追狡兔拔莠護良苗月夜風

頻警花村犬不囂器欵隨手正裘帶仰丰標

安良

同里

丁紹德

稼軒

一自瓊枝折桂林便將治績媿鳴琴興除不愧親民職寬猛  
無非濟世心鶴俸屢捐冰自飲鼠牙頓息鏡高臨卽當出領  
嘉禾郡竹馬兒童戴德深

由來學術裕經綸曾助朱衣相士真集錦文章先入妙聯珠

詩句更翻新玉壺朗比胸中鑑珊瑚搜皆海內珍誰似公門  
桃李茂一編治譜合傳薪

未曾捧檄布嘉猷先蒞軍門借箸籌練卒志期收北固防邊  
功在障東甌餉能飽士兵堪用律重殲渠獄不留兩地剡章  
齊入告煌煌

褒語下

螭頭

天台宦轍偶徜徉琴鶴追隨太守裝惠政昔曾推卓魯循聲  
今又頌龔黃遠傳棠舍謳東海近喜萱花茂北堂慚愧臨民

無識學何能娓娓示周行

上元  
葉庭鑾  
金門

昔年讀君尚書篇卜君政績媿前賢往年過君棠蔭處口碑  
輿頌確有據頌君敬神不瀆神爲民祈福心精純謂予不信  
瞻西谷棟宇深邃德爲鄰頌君造士兼養士藝必宗經式以  
已謂予不信書院新國華廣藉敷文始老有所終幼有長表  
揚節孝肅將享埋齒掩骼敷宏仁經理有方關痛痒丙歲荒  
旱人呼庚鄰氛風鶴兼相驚接濟災黎陰巨猾至今井里樂  
安平我聞德政思遙質早知治術原儒術古人考績猶三年

大澤那從再棋溢路轉嘉禾接笑言有功不伐泯囂喧舉酒  
但教傾叔子買絲直令繡平原殷勤餞賸仍加厚逢人說項  
孚盈缶一卷秋闈疊韻詩贈言臨別珍瓊玖鷦鷯巢林苦無  
枝途窮依舊來京師值君入

觀承

天寵惠文解服

拜 丹墀往來晉接同前夕手授新編傳擘畫印證前聞信  
有徵從知才大無煩劇能吏何嘗之治功豈如良吏治由中  
斯之旣信優于仕誰道經生變不通建節勳名君家裕君今  
指日應追步安得重來兩浙遊揮毫紀實名兼附

桐鄉

蕭儀斌

琳村

幽明本無殊陰陽各有職吾侯宰吾鄉明神亦馨德廟貌褒  
祝融重興宜亟亟捐俸首倡之衆人助頗力落成及三年巍  
峨增舊式至誠格蒼蒼錫福永無極

敬神

公爲百里侯士乃四民首性道本相通公乃視爲友樂育不  
告疲愛才亦孔厚膏火助寒儒爲置田百畝獎飾在臨岐頌  
者碑在口

育士

垂老苦無依此腹嗟負負公也心惻然如溺將援手有院已  
蒿萊名實兼何有捐金重修之俾各餬其口撫恤振頽廢惟  
公倡其首倡首惠無疆春風滿窗牖

養老

孩也本無知棄之如途人育嬰賴有堂收養全其身收少棄  
仍多哀哉此編氓吾侯盡于心更出篋中銀置田以贍養慈  
幼以廣仁立案計期久名堂義何新賢者民父母千秋仰令  
名慈幼

婦以夫爲天失天將何恃德以節爲大守節斯爲美 朝廷

重節孝 旌門且專祀治東祠巍然雍正年經始迄今逾

百載祠宇亦形圯賢侯重興之倡議拓其址鳩工而庀材輪  
奭條如此貞魂得憑依春秋薦芳沚嘉惠及幽泉豈惟歌樂

只全貞

白首臥荒原掩埋誰計此邑有賢令尹恤生更恤死命將遺骸收毋令飽犬豕出錢壹伯萬置畝使經理經理附育嬰善哉侯之旨我

朝重仁政我侯能體是爲誦謝公詩惠心奮千祀

廣仁

時維丙辰夏炎熇熇烈日不雨三月餘收成白無一朝廷

憂災黎大吏籌撫卹我侯出編戶僕僕遑敢逸首領囊中金

勸輸諭盡力民忍須臾死不久所皆得緬彼富鄭公斯民均

食德

恤貧

安良宰之職敢暴宰之力吾侯宰桐鄉民皆歌公德公德良



無涯指難屈一一時當風鶴警奸民肆奸術械鬪官不禁攘  
奪亦不詰巨案積如山長吟而抱膝侯也深警之搜剔窮鬼  
域懸賞出千金此輩務須獲渠魁果歸案神明頌何極

安良

嵇又駿 春原

獨矢瞻韓願難爲訪戴行青山羈魯國明月夢江城吳越方  
憂餉金衢正苦兵何時花下酒一敘十年情

善政記桐鄉開編吐異香謀時大經濟翼世古文章動我瘡  
痍感見君忠愛腸還期沛霖雨露灑遍遐方

聞說春風旆長安道上馳驛花紅送客門柳碧垂絲披拂凌

雲筆賡吟湛露詩好將民社苦奏與

聖明知

文字憐新契江湖感暮齡孤燈頭欲白浮世眼誰青  
泉石詎甘隱箏琶疇耐聽願言求治本與子溯遺經

同里

吳世鈞

子和

吾鄉戴氏五經笥讀書觀國生平志侍中原非百里才割雞  
偶爾牛刀試濟時德政井有條揮金倡義心胸超欽禮神靈  
廟巍煥培養士類田肥饒恩波下逮遍老幼饑年賑恤全民  
凋宰官德澤抑何廣仁慈更復及泉壤建祠設塚感幽冥除  
莠安良靖擾攘百廢具舉弊亦除士民歌頌大吏獎大才小

用見一斑措之天下如示掌官階上達今三遷行看鵬翮騰  
九天況復同官傳轍軾一時兩美眞璧聯君以通經而致用  
古之良吏奚愧焉冰臺奎閣稱茲職蜺旌龍節期他年四方  
但祝憲臣至福星一道推君賢

同里

吳永謙 又謙

事非經聞見曷由遽表揚偕君浙水遊三載易星霜惟能知  
之確是以言之詳憶昔樂城陷賊勢甚猖狂撫綏賴君力烽  
火息邊疆凱旋策功勳頭銜列薦章是秋逢大比分校入文  
場杞梓搜巖穴桃李羅門墻秋闈方撤棘捧檄蒞桐鄉飛鳧

天際降竹騎迎道旁下車未兩月政令肅紀綱案牘清訟庭  
漕艘輸京倉來歲天苦旱無雨插新秧河流車斷絕道渴走  
倉皇炎炎烈日中冒暑叩彼蒼幸賴神祇佑雲霓慰民望災  
稔雖見告禾稼未全傷無者受撫卹有者効輸將酌盈而劑  
虛多寡費評量荒政旣秩然治具次第張邑廟遭回祿鳩工  
建棟梁祠宇廢節孝崇祀達馨香白首窮無告引養壽而康  
黃口噉待哺怙恃慈而祥保衛安閭里樂育宏膠庠仁恩及  
朽骨毅力鋤梗強比戶聞絃誦四野勸農桑洪纖靡不舉士  
庶益難忘回思去縣日父老餞酒漿鄧侯挽不留遮道競牽

裳撫軍聞乃績考最稱賢良奏牘達 丹除晉秩開黃堂願  
推仁民心政治媲美黃堂惟及山側遺愛留甘棠

同里 陳桂傳 小泉

丙辰之歲九月秋我爲訪戴桐溪遊驅車入境二三里桑麻  
遍野民人稠偶遇父老進詢問長官宰此賢與不父老齊聲  
頌莫輟德化所被咸歌謳善政一一不勝述敬神育士爲其  
尤矜全老幼恤孤寡澤及枯骨恩膏周六月天旱久不雨長  
官泣禱心誠求哀鴻嗷嗷苦無告捐貲備穀相賑燭烽烟未  
靖寇氛逼訓練士卒戈矛修捍患禦災弗辭瘁軫民之瘼紆

民憂我聞斯語實心喜吏治如此誰能侔廉明不數遷密卓  
正直欲駕江陵劉憶昔少年同學時君姿角犖超羣儔通經  
名譽滿江左讀書稽古勤旁搜別開生面闡奇旨詩才賦筆  
皆清適芹宮勉作後塵步桂闕獨讓先鞭抽君騎五馬往兩  
浙我餐苜蓿增顏羞至今相別重相憶賣沽苦心夷滄天  
生驥足自當展呈金輅才優封疆大任會有日惟願

昇平黼黻襄

皇猷

同里 陳桂琛 秋巖

文章生面獨能開治術都由學術來不愧通經延廣譽果然

製錦仗奇才棠陰化被神人悅鞠育恩從老幼推更喜崇儒  
敷聖教滿城桃李荷栽培

使君憂樂與民同花放河陽一縣紅忍使素心悲夜月應無  
白骨泣秋風籌防爲警天邊鶴勸賑尤哀澤畔鴻聞道至今  
爰嶺下口碑猶自頌文翁

海甯  
錢保塘

撫字勤勞政績隆振頽起廢仰神公蘋蘩薦獻修明祀桃李  
栽培仗化工澤溥眉黎憐絳老恩深翼卵到黃童口碑處處  
無他語一片丹忱兩袖風

儒修吏治百城宗異政何須說魯恭漆室鴛機旌苦節荒郊  
馬蠶蕭崇封庭陳金帶謀民食隊整銀刀息驛烽底事桐溪  
三疊水牽船莫挽使君蹤

擊柝相聞等隸氓早從鄰境稔循聲

海昌距桐鄉甚邇

袴襦充室宵

無禁桴鼓凝埃晝不鳴一鶴隨官趙參政四蠶奏瑞尹思貞  
西京朱邑尋常事肯使前賢獨擅名

姚景崇

景仰桐溪德政碑名儒名吏信如斯寅清夙夜心常勵子惠  
黎元教並施八則宏敷經術擅三年最報  
聖人知願他



當世司民者同奉平原買繡絲

催科不重重民生百里絃歌播治聲仁政舉施分鉅細惠心  
廣布本廉清鼠牙久已消辭訟豈繡何妨淡利名我亦一行  
曾作吏功兼教養媿無成

雒水

黃炳垣

石琴

從來良吏政必美仁心仁聞甦赤子欣當澗鄰戴使君慈惠  
之師來蒞止桐鄉何幸得賢侯敷政優優臻上理勞心撫字  
清慎勤衆善勿使遺銖累繼絕續乏廢墜修微顯闡幽延廟  
祀老老幼幼安懷之掩骼埋胔澤並被哀鴻嗷嗷俾旌席除

莠拔薤保鄉里菁莪作人鳴雅化助之膏火以繼晷井井奉  
行不少懈勒爲成書明其旨聞君輿論頌君賢口碑載道誦  
樂只卽茲蕞爾擴而充博施濟衆從此始指日典郡鎮雄區  
爲民請命應如是會當霖雨及蒼生小信小惠安足儼

雒水

黃炳城 錦江

桐鄉朱使君馨香奉一邑仁政入人深至今民感戢觥觥戴  
大令望古意遙集本非百里才尤急萬人急有舉莫敢廢懇  
懇勤修葺崇祀恤災沴全貞示表率老幼恩必周齒豁澤並  
及以教遂民生多士訓汲汲哀鴻澤中鳴軫恤慶乃粒有備

而無患五伍兼十什如此諸惠政縝密持以栗殷殷筆之書  
矜式示抱一敬誦子輿言是乃爲仁術

吳夢齡

衙鼓威宣法令森伊誰復解化鳴琴京江才子人爭羨桐水  
神君我倍欽自昔拊循流黍雨而今蒞憩愛棠陰信知吏治  
由儒術八政敷陳學力深

徐 鏐

丹衷不愧帝天臨清慎勤看三字箴宦跡自能繩祖武勲名  
洵足重儒林風清草野嚴除暴雲覆茅檐普作霖何日成連

重邂逅移情 學伯牙琴

同里 張維翰 屏周

政事淵源本讀書通經致用刃游餘賢勞兩載飛鳧舄爵秩  
三遷耀鹿車志切東山難遽遂 恩來北闕會眞除大才  
大用終無負豈獨烹鮮治邑如

海甯 朱葆彝 秉之

官民之間有眞意不有良吏何由知堂皇坐擁自矜重忍以  
黎庶供鞭笞赤緊繁劇撫百里民氣易感非難治農桑教養  
古所重慎哉此事誰攸司惟君不負魏科選江都對策醇無

疵 明廷慎簡綰墨綬桐鄉出宰咨 丹墀知君讀書通讀  
律力提黔首追皇義韓歐古來稱制作但以餘力爲文詞後  
先輝映無軒輊任事不避多艱巖詩書潤飾不在貌民意本  
厚期無欺三載報績登上考斧柯藉手惟其宜召父杜母媿  
丰采撫字只在公滅私今君五馬卽超遷臨歧咸切攀轅思  
愧余單寒未樹立鳴琴餘暇恒追隨誦芬勗余承先澤勵志  
期余奮清時君來羣叨廣厦庇君去誰登春臺熙祝君但訝  
臺萊詩福星長照江之湄

一 胡慶祺

仁暴原從敬肆分非緣默相乞靈勤敢誇他耀惟荒度卻慄

前愆不戢焚

前廟燬於火

朱邑是宜尸祝報鄧攸應惜統如聞一

時羅拜衣冠肅並熱心香棟宇薰

重建城隍廟

天生杞梓屬良材爲棟爲梁視所培漂梗何從施雨露有基

始足長根芟便便腹養詩書氣落落胸含經濟才他日萬鍾

歡鼎食莫忘升斗此胚胎

增置分水書院田產

養老先爲熒獨哀經營廣厦久安纔負隍南牖理黃髮捫蝨

東榮掃綠苔風雨門無關嗒喪晨昏食不乞嗟來問他溫飽

伊誰力定道官於何有哉

修養濟院

民胞物與總相關忍使嬰孩棄草菅切切倒紉三載內呱呱  
啼乳一堂間好還知卜椒繁衍大德能教天破慳縱使鰥生

深贊頌豹斑仍就管中窺

增置育嬰堂田產

闡揚幽隱挽瀾心邑乘名傳自古今不見節貞松竹操須知  
德重鬼神欽中庭機杼燈光暗野渡蚊蟲月色沈祠祀大書

揚寵錫雛烏幾處噪棠陰

重修節孝祠

陰蟲過半嘅枯黼掩袂難遲漏澤施蔓草荒郊烟漠漠白楊

寒食雨絲絲代營幽壤得歸所想見黃泉啣感時簿錄不無

才鬼在啾啾聽唱鮑家詩

掩埋枯骨

軍興歲歉度支偏康濟斯民見宰賢萬口喁喁雛待哺一噓  
潑潑鮒投淵曼卿贈麥非交故汲黯開倉恐詔專厚地高天  
生我德流傳史冊古無前

接濟  
災黎

赤白丸探惡少家狐鳴叢箐月沈沙置屏解拔麗參殪繞郭  
看栽潘岳花處處譙樓朝霧迴亭亭斥堠夕陽斜春秋社散

村龍靜白叟黃童笑語譁

保衛  
鄉里

同里

尤淦

國家設官重守吏興利除弊任獨寄禍吾民兮福吾民歷歷  
視吾之政治憶昔甘棠遺愛留理煩治劇素稱優况今民生



日凋敝撫馭尤期得所求不有才猷裕諸已妄希一旦權治  
理每當祁寒暑雨時怨咨已在下車始桐溪有幸福星來經  
術宏爲吏治才撫字盡心復盡力衆人洩洩登春臺讀君記  
畧見君志想見當年經畫至召父廉明杜母慈兼斯二者成  
政治我嗟世風涼太息民膏入宦囊我爲羣黎懼由來宦轍  
皆民蠹侵漁肆虐無已時遑計民艱慨助資得君善政一一  
舉傾囊不惜一何慈仁恩廣被及鰥寡白傅之裘杜陵屢得  
以安枕易倒懸歡聲繼起盈四野世間缺陷實堪矜况是斯  
民父母稱安得人人有惠政盡使天下寒士衽席之咸登

湖山生色五雲飛  
白傅襟懷玉局微  
日暖桐溪先沛澤  
星臨棘院有餘輝  
儒臣亦與戎行選  
吏治難將經術違  
不少故鄉人仕漸  
算來官是孝廉稀

嘉興 王福祥 春漁

使君匡濟劇堪師  
經術原從治術施  
存沒民生沾德澤  
輿輪里社妥神祇  
培才聿廣菁莪化  
勵俗常懷節義思  
咫尺桐溪棠蔭遍  
拈毫爲譜召南詩

桐鄉 李日熾 鶴杉

十年叩別月重圓  
千里霓旌望肅然  
公有大名垂蓋世  
我慚

小草證前緣官聲但聽輿人誦政術爭看治譜詮自古通經  
原致用獨勞從事仰名賢

東甌于役記麾旌曾見前驅隊仗明一鼓殲渠先獲醜萬夫  
効力慶重生斑春有腳陽春轉愛日心同噉日盟知道至誠  
神默佑頭銜新擢冠羣英

江北江南捧檄忙簡書期迫促戎裝運籌大府資奇畧講武  
威聲壓看場薦牘早登標爵秩 國恩思報藉文章行旌到  
處帡幪遠不獨千間廣厦張

政績爰山迥自殊廉能直與道相符楊劉詞賦當年重卓魯

聲名此日俱課士焚膏都潤筆恤農擲米悉成珠虛堂鏡朗  
人人照老馬由來自識塗

示警吳回廟已灰經營不日庶民來反風別顯神旗力滅火  
能全大厦材電掃訟無留案牘雨甘祁有濟時才至今父老  
思遺愛猶祝庚桑去復迴

保赤難忘玉雪姿恩施無告不矜奇探丸俗化椎埋習掩骼  
情傷骨肉離講舍置田文教振貞珉表節古風持要知去後  
思何武成法猶堪舉世資

奇文磬徹與鈴圓孔壁遺經集自然四岳興雲天廣大千花

成塔佛因緣詞聯渾噩咸歸雅賦到疏通不待詮注禮名家  
書更習夏侯難得替人賢

詩成帖體別揚旌學易田何卦義明獨步競推江左彥傳經  
又起濟南生鼓琴豪族非同調奪席騷壇舊主盟今日浙東  
衣被遍羔裘風度想三英

徵車連辟馬蹄忙花縣封符早俶裝挾冊鎖闌留夾袋隨身  
竿木又逢場蠶聲筆下無雙譽鹿野笙吹第一章取土盡歸  
冰鑑好珊瑚明處網羅張

錦坊花樣逐年殊模索朱衣暗裏符校藝萬千虹氣繞升庭

二八鳳鳴俱程文縝密篇篇玉疊韻勻圓字字珠看到衆仙  
齊嘯樹諸生引領出泥塗

重逢安國又燃灰琴鶴翩翩夾道來嚴瀨高風同勵志豫章  
嘉樹盡成材勲猷世重三旌望著述人欽八斗才昔日部民  
今屬吏感恩深處首頻迴

使君瀟灑出塵姿治郡何煩術尙奇問俗看花歸緩緩行田  
彼黍感離離乾坤劫重經磨鍊桑海瀾迴仗主持遙指幬帷  
雲裏住竊窺美富得師資

兄  
肇辰

太上立功德次惟立言久賢哉汝澗鄰夙志三不朽一命拜  
詔書桐溪綰墨綬下車政令新兢兢慎官守寸心鑒神明實  
澤被稚考公門植桃李草野去秕莠全貞興節孝賑荒漑升  
斗枯骼尙蒙澤生者况親受囊解千萬緡田闢數百畝祇盡  
區區心豈曰頌父母憶與汝別時風雨一揮手吏治最諄諄  
所學期不負我羈戎馬間僕僕勞奔走汝官澗水西道路碑  
在口厯亭喜相見一編珍瓊玖惟此功德言堪以示我後時  
局方艱難勉旃報高厚

姪  
煒

歷朝封典載煌煌赫濯威靈鎮此方四境人民叨庇佑千秋  
俎豆重烝嘗劫灰原有神明質焦土偏嗟棟宇荒廟貌重新

隆祀事憑依在德信無疆

重建城隍廟

桐溪清折毓英賢培養無資少沃田爲惜鴻才空費冷卻將  
鶴俸解囊捐仁風和霽扶文運化雨沾濡被講筵致用通經

留至訓菁莪教育樂歌絃

置田分水書院

王政由來重老更飢寒時恐促餘生縱無酒醴尊崇意敢廢  
衣衾撫恤情炎夏乘涼眠北牖隆冬負曝向南榮請看扶杖

觀風處涕泣成行播頌聲

重修養濟院



不幸孩提出瘠民道旁捐棄徧荆榛育嬰自古傳仁政懷少  
於今志聖人哺乳有方天札免慈祥多術性天淳若逢竹馬

爭迎日應識當年作宰身

置田育  
嬰堂

節孝洵爲百行先天恩褒獎志書傳可堪荒草埋顏宇無那

春風泣杜鵑輪奐一新靈可鑒馨香昭告禮尤虔貞魂烈魄

應何負皎皎光爭日月延

重修節  
孝祠

生有所依死有終奈將骸骨委沙叢烏鳶噉啄深林外糞貉

傷殘絕壑中善政澤枯施潤雨仁人隕涕感西風捐田不惜

籌經費義塚纍纍徧郭東

掩埋  
枯骨

亢旱原非天不仁劫災偏值此鄉民  
救荒忍閉秦人糴市義  
先推魯肅園里判邇遐期弗爽戶分大小派俱勻蒼黎盡解  
倒懸厄鼓腹咸謳吏治循

接濟  
災黎

半壁東南擾甲兵居民時覺不聊生  
曾籌團練安桑梓又衛  
閭閻去棘荆木柝聲中開夜戶桐花香裏看春耕  
扶良鉏惡  
威兼愛豈獨臣心似水清

保衛  
鄉里

姪  
燮元

桐溪一水潨爰山兩峯矗昔者朱仲卿  
理治振風俗循聲誰  
可追惟我澗鄰叔叔非百里才小試作民牧  
兢兢清慎勤听

夕勞案牘撫字兼催科令出政行速上不負

國家下不負所學厥要有八則我願詳其目祠主祀城隍有  
司禱必宿無端委劫灰幽明有同辱叔乃戚然傷鴈工吉日  
卜棟宇煥一新至誠昭於穆惟德斯馮依一瓣心香祝書院  
培人材義重庠與塾歲久田寢蕪毋乃失教育叔乃惄然憂  
月試親教習講堂啟敷文造士歌棫樸老者無所依哀哀此  
熒獨幼者無所長父兄弗字鞠叔乃安懷之解推衣食足有  
藥疾相扶有田命始續稚耆欣然怡如蒙再生福節孝百行  
先祠宇竟傾撲胔骼棄道路生死同骨肉叔乃矜全之政美


性益篤聞幽慰貞魂施惠被枯蠲九原若有知感恩必匍匐  
昔者丙辰夏天災流行酷禾麥繼書無老弱轉溝瀆叔乃救  
以賑輸金且餽粟棠未發齊王困先指魯肅災黎恬然安含  
哺更鼓腹飢饉偶相因兵戎況久屬稂莠若不除害將及嘉  
穀叔乃威濟愛土豪悉穀觶坐飯挽頽風惡魁馴以伏凡茲  
數大端從容無煩促四方零雨流一片慈雲覆民愛若父母  
衆瞻若喬嶽去兮繫民思治行誠超卓我叔將典郡 天  
恩正優渥拭目觀化成願讀名臣錄

051  
1

1210150



21101000196933



202